

ادبِ خزانے

حصہ اوّل

(پنجابی اُمتیاری)

یارھویں جماعت لئی



پنجاب سہیٹا اکیڈمی، لاہور

ادبِ خزانے

حصہ اوّل

(پنجابی اختیاری)

یارھویں جماعت لئی



پنجاب یونیورسٹی بک بورڈ، لاہور

تعداد اشاعت
۱۵۰۰۰

بار
دہم

ایڈیشن
اوّل

سال اشاعت
اپریل ۲۰۰۰ء

ب

جملہ حقوق بحق پنجاب ٹیکسٹ بک بورڈ، لاہور محفوظ ہیں۔

تیار کردہ :- پنجاب ٹیکسٹ بک بورڈ، لاہور۔

منظور کردہ :- قومی ریویو کمیٹی، وفاقی وزارت تعلیم حکومت پاکستان، اسلام آباد۔

بموجب مراسلہ (No. F-9-5/92-UR) مورخہ ۲ جنوری ۱۹۹۳ء

- مؤلفین ڈاکٹر سید اختر جعفری
- ڈاکٹر محمد اسلم رانا (مرحوم)
- ڈاکٹر عصمت اللہ زاہد

ایڈیٹر ○ سجاد حمید (مرحوم)

○ نائکہ صف

○ نائکہ صف

سید محمد صفدر شاہ

○ کتابت محمد نعیم جٹ سیالوی

○ پرائیس زمان آرٹ پریس، لاہور

○ طابع تخلیق مرکز لاہور

○ مطبع ندیم افضل پرنٹرز آؤٹ فال روڈ لاہور

ج ترتیب

(حصہ شری)

- | | | |
|----|----------------------|----------------------------------|
| ۱ | مولوی محمد سعید | ۱ - معراج شریف |
| ۵ | محمد آصف خاں | ۲ - پنجابی زبان دی کہانی |
| ۱۰ | ڈاکٹر مہر عبدالحق | ۳ - حضرت بہاء الدین زکریا ملتانی |
| ۱۵ | ڈاکٹر محمد باقر | ۴ - پاکستان بن گیا اے - |
| ۲۴ | اشفاق احمد | ۵ - ٹاہلی تھلے |
| ۳۶ | بشیر حسین ناظم | ۶ - شاہ عبداللطیف بھٹائی |
| ۴۲ | محمد منشا یاد | ۷ - کھوپڑیاں تے آہنے |
| ۴۹ | ارشاد میر | ۸ - لندن دے ٹیوب ٹیشن |
| ۵۸ | پروفیسر محمد اسلم | ۹ - راتے احمد خاں کھرل شہید |
| ۶۳ | عبدالمجید مالک | ۱۰ - کیاہ وچ |
| ۶۷ | ڈاکٹر سید اختر جعفری | ۱۱ - لوک گیت |
| ۷۵ | ناصر بوج | ۱۲ - ان دٹھے روگ |

نظم (حصہ شری)

- | | | |
|----|------------------------------------|------------|
| ۸۳ | میاں محمد بخش | ۱ - حمد |
| ۸۵ | حفیظ تائب | ۲ - نعت |
| ۸۷ | حضرت بابا فرید الدین مسعود گنج شکر | ۳ - شلوک |
| ۸۹ | شاہ حسین | ۴ - کافیاں |

- ۵ - ابیات
۹۱ حضرت سلطان باہو
- ۶ - چار بیتے / دوہڑے
۹۳ شاہ مراد
- ۷ - ابیات سی حرفی
۹۵ علی حیدر ملتانی
- ۸ - کافی
۹۷ سید بلھے شاہؒ
- ۹ - منت دزاری کردن برادران
۹۹ سید وارث شاہؒ
- ۱۰ - دوہڑے
۱۰۱ ہاشم شاہؒ
- ۱۱ - کافی
۱۰۳ خواجہ غلام فریدؒ
- ۱۲ - حضرت یوسفؑ اپنی ماں کی قبر تے
۱۰۵ مولوی غلام رسولؒ عالمپوری
- ۱۳ - کلام عشق لہر
۱۰۸ استاد عشق لہر
- ۱۴ - سی حرفی / ابیات
۱۱۰ احمد علی سائیں
- ۱۵ - غزل
۱۱۲ پیر فضل گجراتی
- ۱۶ - غازی تے شہید
۱۱۵ ڈاکٹر فقیر محمد فقیر
- ۱۷ - اپنی سہان
۱۱۸ حکیم شیر محمد ناصر
- ۱۸ - توقیر حسینؒ
۱۲۱ داتم اقبال داتم
- ۱۹ - اوڑک ہوندی لو
۱۲۳ شریف کنجاہی
- ۲۰ - غزل
۱۲۵ عارف عبد المتین
- ۲۱ - نواں نواں بُوڑ
۱۲۷ احمد راہی
- ۲۲ - ہک بوٹا
۱۲۹ باقی صدیقی
- ۲۳ - تن نظاماں
۱۳۲ منیر نیازی
- ۲۴ - جمعہ بازار
۱۳۵ انور مسعود
- فرہنگ
۱۳۹

اپنی گل

پاکستان وچ پنجابی بولن والیاں دی تعداد پنج کروڑے لگ بھگ اے۔ پر انے
 وقتاں وچ جتھے مسلمان صوفیاں تے مبلغاں نے اسلام دی تبلیغ لئی پنجابی زبان نوں وسیلہ
 بنایا او تھے تحریک پاکستان وچ وی ایس زبان نے مان یوگ کردار ادا کیتا۔ ایس توں دکھانج دک
 دور دے نویں علوم تے ویلے دیاں لوڑاں نوں مکھ رکھ کے نظم تے نثر دوواں صورتاں
 وچ قابل قدر ادب وی ایس زبان وچ تخلیق ہو یا اے تے ہو رہیلے۔

قرآن مجید فرقان حمید دے ترجمے تے تفسیراں توں لے کے اجو کے دور دیاں زبانناں
 دے فن پاریاں دے ترجمے وی ایس زبان وچ ہوئے نیں۔ ایہہ سبھے کچھ ایس گل دی
 دلیل اے پئی نویں نسل دے کردار تے اخلاق دی تعمیر تے تشکیل لئی پنجابی زبان وچ قہریم
 دے مضمون تے علوم بیان کرن دی صلاحیت موجود اے۔

اُنچ وی ایس حقیقت نوں جھٹلایا نہیں جاسکدا پئی جنی چھیتی طالب علم اپنی ماں بولی
 وچ علم سکھدا اے کسے ہو زبان وچ نہیں سکھ سکدا۔ ایسے طرحاں جتنے سچے ڈھنگ نال اوہ
 اپنے خیالاں تے جذبیاں دا اظہار اپنی ماں بولی وچ کر سکدا اے ہو رکسے زبان وچ ممکن
 نہیں۔ کیوں جے اپنی تہذیب، ثقافت زبان تے دھرتی نال اوہا مضبوط رشتہ ہوندا اے۔
 ایسے حقیقت نوں مکھ رکھدے ہوئیاں حکومت نے پنجابی زبان تے ادب دی تدریس لئی
 انٹر میڈیٹ دے طالب علماں لئی اک نصاب مرتب کیتا اے۔ ”ادب خزینہ“ دی نینہ
 او س نصاب دیاں مقرر کیتیاں گیتاں خداں اُتے اُساری گئی اے۔

”ادب خزینہ“ مرتب کرن ویلے ایس گل دا خاص خیال رکھیا گیا اے پئی پنجابی

زبان دے مشہور لکھاریاں نال طالب علماں دی جان پچھان ہو جائے تے نظم، نثر دی کوئی
دی مشہور صنف اوہناں توں اوہلے نہ رہ جائے۔ طالب علم جتنے مختلف ادبی صنفاں نال واقف
حاصل کرن اوہناں اندر ادب پارے نوں پرکھن تے جانچن لیتی تنقیدی شعور
دی پیدا ہونے تے اوہناں دیاں تخلیقی صلاحیتاں بیدار ہون۔

کتاب دی ترتیب وچ دلچسپی دے کچھ دا خاص خیال رکھدے ہوئیاں سوکھیاں تے
دلچسپ تحریاں شامل کیتیاں گئیاں نیں۔ ایہدے نال نال ایس گل ول وی دھیان دتا گیا اے
کہ پنجاب دے سبھے علاقیاں تے لہجیاں دے شاعراں تے ادیبوں نوں جتھوں تیک
ہو سکے ودھ توں ودھ نمائندگی دتی جائے۔ کوشش کیتی گئی اے کہ پنجابی زبان نوں
ہندی یا سنسکرت دی بجائے قومی زبان دے زیادہ توں زیادہ نیڑے رکھیا جائے تاں جے
تدریس دے فائدے وی حاصل ہون تے قومی ایکتا نوں ودھان وچ مدد ملے۔

”ادب خزینے“ لئی ادب پاریاں دی چون کر دے ہوئیاں ایس گل نوں خاص طور
تے مگھ رکھیا گیا اے کہ ایجہاں تحریاں شامل کیتیاں جان جینہاں وچ اسلام، نظریہ پاکستان
حُب الوطنی تے اپنی تہذیب تے ثقافت دی بُو باس رچی بسی ہووے تے نالے ایہہ
تحریاں انٹرمیڈیٹ دے طالب علماں دی ذہنی سطح دے مطابق ہون۔

ایہہ حقیقت اے پئی پنجابی وچ نثر گھٹ تے شاعری بوہتی موجود اے تے اجو کے دور
وچ وی نثر نالوں نظم بوہتی لکھی جا رہی اے۔ ایس لئی نثر دے نال نال ”ادب خزینے“
وچ نظم غزل دوویں شامل نیں۔ ادب بھرے بھنڈار وچوں کجھ انتخاب کرنا واقعی اک
اوکھا کم اے، پڑ ادب خزینے ”وچ کوشش کیتی گئی اے کہ اوہ سارے شاعر تے نثر نگار شامل
ہو جان جینہاں پنجابی ادب نوں نویں مہاڑ عطا کیتے نیں تے ادبی دنیا وچ خاص مقام
رکھدے نیں۔



مولوی محمد سعید

مولوی محمد سعید بالکوٹ دے اک پنڈ کلاس والادے رہن والے سن۔ آپ نے اپنے پنڈ دے مولوی عبدالحی توں دینی تعلیم حاصل کیتی۔ مولوی عبدالحی قرآن پاک تے حدیث دے بہت وڈے عالم سن۔ آنحضرت محمد مصطفیٰ احمد مجتبیٰ صلی اللہ علیہ وسلم دی پاک جیاتی دے چنگے جانو سن۔ مولوی محمد سعید اوہناں دی حدوں ودھ عزت تے احترام کر دے سن۔ آپ نے حضور پُر نور صلی اللہ علیہ وسلم دی پاک سیرت بارے جانکاری اوہناں توں حاصل کیتی۔ فیرا وہے وچ اپنا علم تے محبت شامل کر کے دلچسپ اسلوب راہیں بیان کیتا۔ آپ دی کتاب ”محمد صلی اللہ علیہ وسلم“ مفید معلومات تے من کچھویں اسلوب پاروں عوام وچ بہت مقبول ہوئی ایتھے ایس کتاب وچوں اک اقتباس پیش کیا گیا اے۔

معراج شریف

نبوت نوں دس ورھے ہو گئے سن۔ ڈاڈھے اوکھے دس ورھے۔ رجب دی ۲۷ تاریخ تے سوموار سی۔ انگریزی ۲۲ مارچ ۶۱۰ء سی۔ ایس رات حضور اپنے چاچے ابوطالبؓ دی بیٹی اُمّ ہانیؓ دے گھر تے ہوئے سن کہ اللہ تعالیٰ نے اوہناں نوں آسماناں دی سیر کرائی تے ادھ بھیت دے جیہڑے آدم دی اولاد وچوں کسے نوں نہنیں دے گئے۔ قرآن مجید دی دسویں سورت انج شروع ہندی اے۔

ترجمہ: ”اوہ ذات بڑی پاک اے جیہڑی اک رات اپنے بندے نوں خانہ کعبہ توں اوس دُراوٹی مسیت تک لے گئی۔ جیہدا آل دوالا برکتاں نال بھریا ہویا اے۔“

تے ایس واسطے لے گئی کہ اوہنوں اپنیاں کچھ نشانیاں دکھائے :
 دیکھو مولادے رنگ ، جدوں دنیا تنگ ہوئی تے اسماناں دے بُوہے کھل گئے۔
 فیرا جیسے کھلے کہ اج تیک ایس سفر نے دنیا نوں حیران کیتا ہویا اے کہ کسویں اک بندہ
 تاریاں تے چناں توں لنگھدا ہویا اوہناں تھاواں تیک پہنچیا جتھے نہ وہم جاندا اے نہ
 خیال۔ تے فیر دنیا دا کوئی بشر نہیں جہدے واسطے ایہدے وچ کوئی نہ کوئی سبق نہ ہووے۔
 صوفیاں ایہنوں ہر طرحاں سمجھیا۔ علماں ہر طرحاں جانیا۔ شاعران ایس سفر توں ہر طرحاں
 لٹی۔ ہر کے نے اپنے اپنے مقدر نال ایہنوں جانچیا۔ اُبوہل نے سُن کے ٹھٹھا ماریا۔ ابو بکر
 نے سُن کے آمنا و صدقنا آکھیا۔ اک گمراہواں دا سردار بن گیا ، دو جانیکاں دا سردار بن گیا۔
 قرآن شریف وچ تے صرف ایناں امی اشارہ اے۔ پر حدیثاں وچ کل بوہتی کھول
 کے بیان ہوئی اے۔

حضور فرمادے نیں۔ میں گُوڑھی نیندر رُتا ہویا ساں جدوں جبریل آئے تے نال
 بُراق لیائے۔ ایس جانور جیہا کوئی جانور زمین اُتے نہیں۔ ایہہ کھوتے توں ذرا وڈا تے
 خچر توں ذرا چھوٹا سی۔ اوہی جت برف نالوں ودھ چٹی سی۔ مومنہ آدمی وانگوں سی پرندیاں
 وانگوں دوپرسن۔ اوہی ایال پوشل تے کھنڈ تے سینہ انمول موتیاں نال جڑے ہوئے
 سن تے رنج لشکارے مار دے سن جویں تاریاں دیاں لڑیاں ہون۔
 میں ایس جانور دی کنڈ تے بہہ گیا۔ اکھ جھپکدیاں ایہہ مینوں حرم شریف توں مسجد
 اقصیٰ لے گیا۔

ایتھوں ویلے ہو کے میں براق سمیت صحرہ تے چڑھ گیا (صحرہ اک وڈا پتھر سی جیہدے
 اُتے اج کل اک سوہنا جیہا گنبد بنیا ہویا اے تے اوہ بیت المقدس دے اندر حضرت
 عمرؓ دی مسجد وچ لے) ایسے پتھر توں میں اسماناں وچ چڑھ گیا۔ حضرت جبریلؑ نال سُن۔
 ساں اسماناں وچ جیہڑے پیغمبر میرے راہ وچ آئے میں اوہناں وچوں حضرت

ابراہیمؑ، حضرت موسیٰؑ، تے حضرت عیسیٰؑ نوں ملیا بفرجاری سی۔ میں ایس طرحاں دی آواز سنی جس طرحاں دی آواز لکھن لگیاں قلماء وچوں نکل دی اے۔ کتاب تقدیر دی سی تے آوازاں حمد، ثنا کر دیاں ہو یاں فرشتیاں دیاں سن۔

آخر میں بدرۃ المنتہیٰ تے پہنچ گیا (سردہ پیری دے درخت نوں آہندے نیں۔ ایہہ خاص درخت اوس حد دے اُتے اک نشانی وانگوں کھلوتا ہویا ہے چتھوں تیک فرشتیاں دی پہنچ لے) ایتھے اپڑ کے جبریلؑ نے کہا ”بس حضورؐ، میری اپڑ ایتھوں تیک امی سی۔ ایہہ علم دی آخری حد لے۔ میں اک پیر دی اگانہہ پٹیا تے تجلی نال میرے پر سڑ جان گے حضورؐ تئیں بنیاں دے سردار او۔ دنیا جہان دے مالک دے یار او۔ اگانہہ ودھ دے جاؤ۔ اتانہہ چڑھ دے جاؤ تے اپنے نور دے لشکاریاں وچ پیئڈا ممکنہ دے جاؤ۔“ پیئڈا اخیر تک گیا تے آپ رب دے حضور جاپنچے تے اوس تجلی دا جہنوں کوئی نہیں سی جھل سکیا، کھل کے نظارہ کیتا۔ ”سبحان اللہ۔ اک شاعر آکھدا اے ”حضورؐ تہاڑے کیا کہنے۔ طور پہاڑ تے اک لشکارا پیا تے موسیٰؑ بیہوش ہو کے ڈھیہ پیئے۔ تئیں ذات پاک نوں عین سامنے دیکھیا تے لبیاں تے مسکراہٹ رہی“ ایس ملاقات وچ جیہڑا تحفہ اللہ دی ذات و توں حضورؐ نوں ملیا اوہ پنجابہ (۵۰) نمازاں سن۔ روایت اے کہ واپسی تے حضرت موسیٰؑ ملے۔ گل بات ہوئی تے حضرت موسیٰؑ کمن لگے۔ اُمت تے بڑا بھار جے، گھٹ کر او۔ واپس گئے۔ خیر نمازاں گھٹ ہوندیاں ہوندیاں پنج (۵) رہ گیناں۔ پنجاب تے پہنچ کے حضورؐ فیر پت کے نہ گئے پتی اُمت تے ایہہ بھار کوئی بوہتا بھار نہیں بلکہ آکھیا کہ نماز مومن دی معراج لے۔

حضورؐ نوں مولا کریمؑ نے گزرے ہوئے بنیاں توں علاوہ رنگ برنگ مخلوق دکھائی۔ دین دنیا وچ ایس آکھنے ہاں ”ملک ماہی داوے۔ کوئی رومے تے کوئی ہتے“ ایسے نقشے اُتے اسی اکلا جگ اے۔ کوئی ہسدا اے کوئی روئدا اے۔ ہسدا اے اوہ میں جیہناں نیک عمل کیتے

تے روندے اوہ نیں جینہاں دے کرتوت بھیڑے رہے۔

حضور نوں بہشت دکھان لے گئے۔ نیک لوک تے نیک پیسیاں سوہنے دسدے
ٹھنڈیاں چھانواں، دُفھ شہد دیاں نہراں، پھلاں نال لدیاں ہوئیاں ٹہنیاں جھک
جھک کے زمین نوں چھوندیاں۔ چار چوہیرے رنگ برنگے پرندیاں دی چہکار سلامتی
سلامتی دیاں آوازاں۔ سوہنے موٹہ تے سوہنیاں گلّاں۔

حضور نے ایہہ وی دیکھیا کہ اک دے بھانبر پے بلدے نیں۔ اک شوکران تے
بھبھکاں انج بھر دی اے جویں غصے نال کسے دا وجود پاٹ رہیا ہووے۔ انگیارے انج لکدے
جویں لال اوٹھاں دے اجڑ کھلوتے ہوتے ہون۔ خلتقاں دھوئیں تے لمبواں دیاں ماریاں
باہر نکلیں نوں دوڑن تے دربان چک چک فیروچ ٹٹن جھلیاں ہوئیاں چمڑیاں تراس
دے مارے ہوتے اوٹھاں وانگوں پانی لئی جھلے ہوئے کوہجے موٹہ کوہجیاں بولیاں
چیکاں تے فریاداں۔ اللہ رحم کرے۔ گل کردیاں وجود کنسب جاندا اے۔

حضور نے ایہہ سب کچھ دیکھیا تے جو کچھ دیکھیا تے آکے دیا۔ ایتھوں اک گل بڑی پکی طرحاں
ثابت ہون دی اے کہ ایس لوک اسی جا جا کے اوہ دنیا آباد کرنے ہاں۔ جے ایہہ دُنیا سنوڑی
ہوئی اے تے اگلی وی سنوڑی ہوئی اے۔ جے معاملے ایتھے چوڑ چپٹ نیں تے
اگے دی چوڑ چپٹ۔ اوٹھے دے سکھ تے دکھ ایس زندگی دا پھل نیں تے ایہہ دنیا کوئی
مداری دا کھید نہیں۔ گھڑی نظر دے فریب وچ پھسے تے فیر سرب وانگوں اے۔

محمد آصف خاں

محمد آصف خاں ہو ری ۲۹ نومبر ۱۹۲۹ء نوں بستی دانشمنداں ضلع جالندھر، مشرقی پنجاب (بھارت) وچ پیدا ہوئے۔ ۱۹۴۷ء وچ پاکستان بنن مگروں ہجرت کر کے لاہور آن وئے۔ سرکاری ملازمت دے نال نال اُردو وچ علمی تے ادبی کم دی کر دے رہے۔ ۱۹۵۶ء وچ پنجابی زبان نوں اپنے وچاراں دے اظہار دا ذریعہ بنایا تے ایسے دوران ایم اے پنجابی تیک تعلیم مکمل کیتی۔ فیر پنجابی مجلس دے سیکرٹری تے رسالہ ”پنجابی ادب“ دے مدیر وی رہے۔ پہلاں شاہ حسین کالج لاہور وچ پنجابی دے اُستاد رہے، فیر پنجاب یونیورسٹی دے شعبہ پنجابی وچ ایم اے دے طالب علماں نوں پڑھاندے۔ محمد آصف خاں کہانی کار، محقق، نقاد تے لسانیات دے ماہر سن۔ آپ اُردو، فارسی، انگریزی، پنجابی، سندھی تے ہندی زبانناں دے چنگے ماہر سن۔ ہُن تیک اوہناں دیاں تحقیق، تنقید تے ترتیب دتیاں ہوئیاں ایہہ کتاباں چھپ چکیاں نیں: ”اجو کی کہانی“ ”مڈھلی لفظالی“ ”اکھیاں بیا فرید نے“ ”احمد خان کھرل“ ”ہیر د مودر“ ”تیک مسک“ ”سندھی ادب“ ”اکھیاں بھٹے شاہ نے“۔ آپ پاکستان پنجابی ادبی بورڈ دے سیکرٹری تے سہ ماہی رسالہ ”پنجابی ادب“ دے مدیر وی رہے۔ ۷ مارچ ۲۰۰۷ء نوں اللہ نوں پیارے ہو گئے۔

پنجابی زبان دی کہانی

ایہہ اک مننی پر مننی حقیقت اے پئی زبان وسیب توں امی پھٹدی اے تے وسیب بندیاں نال اسی پنگر دا لے۔ جے بندے نہیں ہون گے تے وسیب نہیں ہووے گا۔

تے جدوں ویسب نہیں ہوئے گاتے فیر زبان داکدھرے ناں تھیمہ نہیں ہوئے گا۔
 زبان دی لوڑ اوہدوں محسوس ہوندی اے، جدوں بندیاں وچکار لین دین تے
 وچار وٹاندر اہوندا اے۔ کیوں جے اوہ زبان راہیں اپنیاں سوچاں، سدھراں تے
 خیال دوہے لوکاں تیک اپڑاندے نیں تے اوہناں دے خیالاں تے سوچاں نال
 واقفی حاصل کر دے نیں۔ ایس طرحاں زبان بندیاں وچکار اک اچھا رابطہ اے جیہڑا اوہناں
 نوں اک دوجے دے نیڑے لیاؤندا تے اوہناں وچ محبت تے بھائی چارہ پیدا کر دالے۔
 تاریخ دسدی اے پئی پنجاب دے علاقے پوٹھوہار وچ سواں دریا دے کنڈھے
 پُنگرن والا ویسب، دُنیا دے سبھ توں پُرانے ویسباں وچ خاص اُچھ رکھدا اے۔ ایس
 توں اسیں ایہہ وی گویڑ لاسکدے ہاں کہ اچھا ویسب پورے پنجاب وچ پُسر یا ہویا
 سی۔ لوڑ صرف ایس گل دی اے کہ ہور پھر ولا پھر ولی کیتی جاوے۔

تاریخ توں ایہہ معلوم ہوندا اے پئی اُج توں پنج ہزار ورھے پہلاں پنجاب تے سندھ
 وچ دراوڑی تہذیب ٹیسی اُتے سی۔ دراوڑی ایتھوں دے وٹیک نہیں سُن، سگوں
 باہروں آکے ایتھے آباد ہوئے سُن تے دکھری زبان بولدے سُن۔ اوہناں دے ویسب
 تے زبان نے دی مقامی زبان تے چوکھا اثر پایا۔

فیر ۱۵۰۰ ق م دے نیڑے تیرے وسط ایشیا توں آریہ قوم پنجاب وچ دھل
 ہوئی۔ ایس قوم دی زبان سنسکرت سی۔ پہلاں ایہناں پنجاب وچ دستوں اختیار کیتی
 تے ایتھے بہہ کے اپنی مذہبی کتاب ”رگ وید“ تیار کیتی۔ ایہناں داجدوں ایتھوں دے وٹیکاں
 نال میل جول ہویا تاں ایہناں دی زبان دے کسی لفظ پنجاب وچ بولی جان والی زبان وچ
 شامل ہو گئے۔

فیر بھارت وچ اک نویں مذہب بُدھ مت دا ظہور ہویا۔ بُدھ پیر وکاراں نے
 پالی زبان نوں مذہبی زبان دا درجہ دتا۔ اپنے مذہب دے پرچار لئی اوہ پنجاب وچ دی آئے۔

راجہ اشوک دے زمانے وچ بُدھ مت نوں سرکاری مذہب دی حیثیت مل گئی۔ راجہ نے پاٹلی پتر چھڈ کے ٹیکسلا نوں اپنی راجدھانی بنایا۔ انج پالی زبان نے وی پنجاب دی زبان نوں چوکھا متاثر کیا۔

ایس طرح اسیں دیکھدے ہاں کہ جیہڑے قبیلے تے قوماں باہروں پنجاب وچ آوندے گئے، اوہناں دیاں زبانوں دے لفظ مقامی زبان وچ شامل ہوندے گئے۔ میانیاں دی کھوج پاروں اسیں آج ایسے جوگے ہو گئے آں کہ دس سیکھتے پتی کیہڑے کیہڑے لفظ منڈاری، دراوڑی، سنسکرت تے پالی زبانوں توں ساڈی زبان وچ شامل ہو گئے ہن۔ فیر بعد وچ عربی تے فارسی زبانوں دے ڈھیر سارے لفظ ساڈی لفظی داخلہ بن گئے۔

سیلے آکھدے نیں کہ باروں کوہاں تے زبان بدل جاندی لے۔ ہر علاقے دے طبعی، سیاسی تے سماجی حالات وکھو وکھو ہوندے نیں۔ ایہہ حالات اک پاسے اُچار انگاں نوں متاثر کر دے نیں تے دوجے پاسے لوکاں دی رہت بہت اُتے اپنے اثرات قائم کر دے نیں۔ ایوں باروں کوہاں تے جا کے لوکاں دا لہجہ بدل جاند اے۔ ایس بدلے ہوئے لہجے نوں علاقے دی مناسبت نال وکھاناں لے دتا جاند اے۔ جویں لاہوری، ملتانوی وغیرہ۔

چوتھی صدی ہجری وچ اک عرب سیاح ابن حوقل ریضغیر پاکستان تے ہند آیا۔ اوس نے اپنے سفر نامے وچ ملتان دی زبان نوں ملتانوی تے سندھ دی زبان نوں ہندی لکھیا اے۔ اوس مگروں اک تذکرہ نگار محمد عوفی نے دیباپتی لاہور دے اک مشہور شاعر مسعود سعد سلمان نے شاعری دے تن دیوان لکھے، جیہناں وچوں اک عربی، دوجا فارسی تے تیسرا ہندی وچ سی۔ یعنی یارھویں صدی عیسوی تیک پنجابی نوں ہندی یا ہندوی آکھیا جاند اسی۔ مولوی عبد الکریم جھنگوی نے ۸۶ھ وچ ”نجات المومنین“ اک کتاب پنجابی وچ لکھی تے آکھیا۔

فرض مسائل فقہ دے ہندی کہ تعلیم
کاراں مرداں اُمیاں جوڑے عبد کریم

ابو الحسن یمن الدین امیر خسرو (۱۲۵۳ء تا ۱۳۲۵ء) نے پنجابی زبان نوں لاہوری
زبان آکھیا اے۔ اوس زمانے وچ لاہور تے ملتان دو دھڑے دھڑے صوبے سن۔ ایس
پاروں صوبہ ملتان دی زبان نوں ملتانی تے صوبہ لاہور دی زبان نوں لاہوری آکھیا
جانداسی۔

شہنشاہ جلال الدین اکبر (۱۵۵۶ء تا ۱۵۶۰ء) دے زمانے وچ صوبہ لاہور، ملتان
تے پوٹھوہار دے علاقے نوں ایتھوں دے پنج دریاواں دی مناسبت نال پنجاب داناں
دنا گیا تے ایتھوں دی زبان نوں پنجابی آکھیا جان لگ پیا۔
سب توں پہلاں حضرت نوشہ گنج بخشؒ (۱۵۵۲ء - ۱۶۵۴ء) نے ایس زبان نوں
اپنے شعراں وچ پنجابی لکھیا۔

حافظ برنخوردار نے اپنی کتاب مفتاح الفقہ (۱۶۶۹ء) وچ وی پنجاب دی زبان
نوں پنجابی آکھیا۔

حضرت نعمان دافر مایا اس وچ اوہ مسائل
تُر ت پنجابی آکھ سناویں جے کوئی ہووے مائل

ایس طرح پنجاب دے وسیع علاقے وچ بولی جان والی زبان، پنجابی دے ناں
نال مشہور ہو گئی۔ ایہہ زبان دلی توں لے کے خیرپور (سندھ) تے پشاور (صوبہ سرحد)
توں لے کے جموں (مقبوضہ کشمیر) تائیں بولی تے سمجھی جاندی اے۔ پر مختلف علاقیاں
وچ ایہہ دے دھڑے دھڑے ناں نیں۔

ایہناں ناواں دی نکی ونڈ انج کیتی جاسکدی اے جسویں مشرقی پنجابی، مغربی پنجابی
تے مرکزی پنجابی، مشرقی پنجابی، بھارت دے کچھ علاقیاں وچ بولی جاندی اے تے مغربی

پنجابی، پاکستان دے کجھ علاقیاں وچ دکھرے دکھرے ڈھنگ یاں لہجے نال بولی جاندی اے۔ جسویں پوٹھوہاری، جہلم توں لے کے اٹک تیکر۔ سرائیکی، ملتان۔ بہاول پور۔ ڈیرہ غازی خان تے ہندکو، پشاور توں مانسہرہ تیک تے لہندی، راولپنڈی پار شروع ہو کے شمال وچ پوٹھوہار دے علاقے تیک بولی تے سمجھی جاندی اے۔

ایسے طرحاں رومی تے بیاس دریاواں دے وچکارے علاقے نوں ماجھا آکھیا جاند اے تے ایس علاقے دی بولی نوں ماجھی یاں مرکزی پنجابی داناں دتا گیا اے۔

پنجابی زبان دیاں ایہناں بولیاں یاں لہجیاں توں صاف ظاہر ہوندا اے پئی پنجابی زبان دا کھلار تے پسار کیڈا وڈا اے تے پنجابی زبان دیاں سرحدیں کتھوں تیک پھیلیاں ہوئیاں نیں۔

ڈاکٹر مہر عبدالحق

جنم یکم جون ۱۹۱۵ء لیہ ضلع مظفر گڑھ۔ ۱۹۵۷ء وچ پنجاب یونیورسٹی توں ایم۔ اے اُردو کیتا تے ۱۹۵۷ء وچ پی ایچ ڈی دی ڈگری لئی۔ جوانی وچ علامہ اقبال مولوی محمد شفیع تے سید عطاء اللہ شاہ بخاری ورگے عالماں کولوں فیض حاصل کیتا۔ درس و تدریس نوں پیشہ بنایا۔ قصیدہ بردہ تے قرآن مجید داسرائیکی وچ ترجمہ کیتا۔ خواجہ فرید دیاں کافیاں دا دیوان مرتب کرن دا اعزاز وی ایہناں نوں حاصل ہويا۔ پنجاب دی تاریخی تے تہذیبی زندگی بارے ڈونگھا مطالعہ رکھدے سن۔ صوفیا کرام بارے آپ دے لکھے گئے مضامین بوہت سلاہے گئے۔ زبان وچ روانی تے بیان وچ علمیت جھلکدی اے۔
۱۹۹۵ء نوں رب نوں پیاءے ہو گئے۔

حضرت بہار الدین زکریا ملتانی

آپ ۵۶۶ ہجری وچ رمضان شریف دی ۲۷ تاریخ نوں جمعہ دے دن لیہ دے علاقے کوٹ کر وڑ وچ پیدا ہوئے۔ بعض کتاباں وچ آپ دے جنم داسال ۵۶۰ ہجری تے ۵۴۲ ہجری وی لکھیا ہویا اے۔ آپ دے والد حضرت شیخ وجیہ الدین جیہڑے شیخ محمد غوث دے ناں نال وی مشہور سن بڑے اچے بزرگ سن اوہناں نوں شہرہاں تے ملکماں وچ پھرن تے سیر سیاحت کرن دا بڑا شوق سی۔ حضرت زکریا دی والدہ دانان فاطمہ سی تے اوہ حضرت شیخ حسام الدین دی دھی سن۔ شیخ حسام الدین جہوراں نوں شیخ عیسیٰ شمس الدین دی کندے سن۔ کوٹ کر وڑ دا شہر ایہناں دے ناں پچھے کر وڑ لال عیسیٰ جہلاندا اے۔ ایتھے ہر سال بھادوں دی چودھویں نوں بڑا بھاری میلہ لگدا اے

تے حضرت لال عیسن صاحب دِا عُرُس منایا جاندا اے۔

حضرت زکریا دی عمر اے ست سال وی نہیں ہوئی سی کہ آپ نے ستاں قرآناں نال قرآن کریم حفظ کر لیا تے آپ دا دل روشن ہو گیا۔ آپ بارہاں سال دے سن کہ آپ یتیم ہو گئے۔ آپ دے چاچے حضرت شیخ احمد غوث ہورالہ نے آپ نوں فضیلت دی پگ بدھی تے باپ دی گدی تے بٹھا دتا۔ کجھ چرتک آپ ملتان تے آس پاس دے عالم فاضل لوکاں توں علم حاصل کر دے رہے۔ کھندے نیں کہ آپ نے ساڈھے چار سو استادان توں علم حاصل کیا پر علم دی پیاس ایتھے کتھے بجھنی سی۔ آپ ملتان چھڈ کے خراسان چلے گئے تے او تھے ست سال رہ کے ظاہری تے باطنی علماں دیاں چشمیاں توں رَج رَج کے اپنی پیاس بجھاندے رہے۔ آپ دی علمی قابلیت دا اندازہ ایتھوں لگدا اے کہ خراسان جان توں پہلاں آپ نے بچپن وچ دو اہیسیاں کتاباں لکھیاں جیہڑیاں اچ وی بڑیاں اُچیاں کتاباں منیاں جاندیاں نیں تے ساڈے اسلامی درسوں وچ پڑھائیاں جاندیاں نیں۔ اک کتاب داناں ”صرف بہائی“ تے دوجی داناں ”کنز العباد“۔ پہلی عربی زبان پڑھن لئی گرامر دی کتاب اے تے دوجی فقہ دے مسائل اُتے لکھی گئی اے۔

خراسان دے بعد آپ بجنار چلے گئے تے او تھوں پھر دے پھراندے تے تھیں تھیں دے عالماں توں فیض حاصل کر دے مدینہ شریف اپڑ گئے۔ ایتھے پنج سال گزار کے بیت المقدس ول ٹر پئے تے سارے بنیاں دے مزاراں دی زیارت کر دے کھڑے اخیر بغداد شریف پہنچ گئے۔ ایتھے جناب حضرت شیخ الشیوخ مولانا شہاب الدین سہروردی دا بڑا چرچا سی۔ آپ حضرت شیخ دی بارگاہ وچ حاضر ہو کے اوہناں دے مُرید ہو گئے تے صرف اٹھاراں دناں وچ کمال نوں پہنچ گئے۔

شیخ شہاب الدین ہورالہ دے سینکڑے مُرید تے روحانی چیلے سن۔ اوہناں نے

جدوں دیکھیا کہ باہر توں آیا ہو یا اک شخص دناں دناں وچ مُرشد دے نیڑے تے اگیرے
ہوندا جاندا اے تے اوہناں حسد کہہ کے حضرت شیخ دے اگے فریاد کیتی۔ حضرت شیخ
مسکرائے تے آکھن لگے: ”تیں سارے اک اک کبوتر پھڑکے لے جاؤ تے اجیہی تھاں تے
ذبح کر لیاؤ جتھے تہاؤں ذبح کر دیاں کوئی دیکھدا نہ ہووے۔“ اوہ چلے گئے تے اپنے اپنے
گھراں وچ کوٹھیاں دے اندر لگ چھپ کے کبوتر اں نوں ذبح کر کے لے آئے۔ حضرت
ذکرؒ یا ہوری اپنا کبوتر جیوندا ای لے کے آگئے۔ شیخ نے وجہ پچھی تے آپ نے فرمایا: ”مینوں
ایس دھرتی تے کوئی وی تھاں اجیہی نظر نہیں آئی۔ جیہڑی مولاپاک دے وجود توں خالی
ہووے۔ میں کبوتر نوں کتھے ذبح کر دے۔“ حضرت شیخ نے فرمایا: ”اچھا ہُن تیں میت وچ
وچھان لسی گھاہ پُٹ لیاؤ۔“ سارے مرید ہر ہر تازہ لُکڑا گھاہ پُٹ کے لیتے تے ذکرؒ یا
ہوراں دے سر تے ٹکے سڑے گھاہ دی جتھی دیکھ کے ہس پتے۔ ذکرؒ یا ہوراں مُرشد دے
اگے عرض کیتی کہ میں جتھے دی گیا ہر تے تازہ گھاہ رب پاک دے ذکر وچ مشغول سی تے
ایہہ سکا گھاہ مینوں تبسح توں فارغ نظر آیا تے میں ایہنوں لے آیاں کہ میت وچ لوکاں
دے سجیدیاں لسی ٹھیک اے۔“ حضرت شیخ نے مریداں نوں آکھیا: ”تہاڈا چھیکڑا درجہ۔
ایس دا ڈھلا درجہ اے تے ایہہ تہاتھوں سینکڑیاں منزلاں اگانہ و دھ چکیا اے تیں
حسد نہ کرو۔“

بغداد توں خلافت حاصل کر کے آپ ۶۰۴ ہجری وچ مُلتان ول واپس ٹُری پئے۔
اوس وقت آپ دی عمر جوانی دی سی تے طبیعت وچ جوش و ولولہ تے نالے حوصلہ دی سی۔
آپ دے مُلتان وچ آون تے ایتھے وُسَن دا ارادہ رکھن دی خبر مُلتان دے عالماں تے
پیراں فقیراں نوں پہنچی تے اوہ بڑے گھبراتے تے حسد کرن لگ پئے۔ اوہناں نے
آپ نوں اک پیالہ دُودھ دا بھریا ہو یا بھجیا بھجدا مطلب ایہہ سی پئی ایتھے مُلتان پہلے ای
پیراں توں پُرا لے تھیں کہے ہو ر شہر ول ٹُری جاؤ۔ آپ پیالہ دیکھ کے مسکرائے تے پیالے

وچ گلاب دے پھل دیاں پتیاں پادرتیاں، جیہڑیاں دودھ دے اُتے ای اُتے ترن لگ پتیاں
ایس دا مطلب ایہہ سی پتی جیڑھاں دودھ دے پیالے وچ پھل دی پتی سما سکدی
اسے ایسے طرحاں میں دی ٹھاڈے وچ پیار ہواں گاتے تھانوں ذرا دی تکلیف نہ دیاں گا
نالے ایہہ وی اشارہ سی کہ اسیں گلاب دی جُشبو ورگیاں نور دیاں لپٹاں ہر پاسے کھلا
دینیاں میں تے تیس آپے ای ساڈی جُشبو نال مست ہو جاؤ گے۔

ملتان وچ اوہناں دناں وچ قرامطیہ فرقے دا زور سی تے شہر دے لوکاں توں
علاوہ پنڈاں وچ وی قرامطیہ مذہب پھیلدا جاندا سی۔ حضرت زکریاؑ نے لوکاں نوں
وعظ نصیحت نال ایس بُرائی توں بچالیا تے سچے اسلام دی راہ ول موڑ دتا۔ آپ دا چچا
ہند سندھ وچ ہون لگ پیا تے آپ دے مُریاں وی اک ایہی جماعت بن گئی جیہناں دا
عمل تے قول اک سی۔ آپ نے اپنے مُریاں نوں سندھ تے کیچ مکران ول دورے کر کے
تبلیغ کرن دا حکم دتا ایس طرحاں لکھاں گمراہ انساناں تیکر اسلام پہنچا دتا۔ آپ دیاں کجھ
ٹولیاں کشمیر تے دلی ول ٹر پئیاں تے کجھ افغانی قبیلیاں ول چلیاں گئیاں ایس طرحاں سارے
ملک وچ اسلام دا چرچا ہون لگ پیا۔

آپ دی خدمت وچ وڈے وڈے سردار، نواب تے بادشاہ حاضر ہون دے سُن
تے ہدایت دے نور نال اپنے دل دی ہنیری کوٹھڑی وچ چانن کر دے سُن۔ کافر ٹولیاں
دی صورت وچ آؤندے سُن تے آپ دے مبارک ہتھ تے بیعت کر کے لا الہ الاہ و اور
تے ”وَم بھار الحق“ دا نعرہ مار دے لگے جان دے سُن آپ دے دم قدم نال ملتان دی حالت
بالکل بدل گئی۔ ہر پاسے میٹیاں، خانقا ہواں تے لنگر خانے بن گئے تے اک بوہت وڈا
مدرسہ ملتان وچ قائم ہو گیا، جیہڑا سارے ہندوستان لئی مرکزی اسلامی یونیورسٹی داکم
دیندا سی۔ ایس مدرسے وچ دین تے دُنیا دے سارے علم پڑھاتے جان دے سُن تے
معقولات تے منقولات دی تعلیم دتی جاندی سی۔ حضرت زکریاؑ ایس سب توں وڈی

یونیورسٹی دے کارمختار تے طالباء دے پیرتے مُرشد سُن۔ طالباء دی گنتی ہزاراں تک
 پہنچ گئی سی، کیوں جے ایتھے تعلیم مُفت دتی جاندی سی۔ کھان پین تے رہن سہن دا
 انتظام وی مدرسے دلوں ہوندا سی۔ کتاباں تے لکھن پڑھن دے سامان دا خرچ وی
 نہیں سی لیا جاند ا۔ علم پڑھن والے ہندوستان توں علاوہ چین، پاکستان، مصر، بغداد
 عراق تے عرب توں وی ایتھے پہنچدے سُن تے عالماں وچوں حضرت خواجہ غریب نوازؒ
 حضرت قطب الاقطاب قاضی حمید الدین ناگوریؒ، حضرت جلال الدین تبریزیؒ تے بابا
 فرید الدین گنج شکرؒ ورگے دلی اللہ تے باکمال صوفی ایتھے آؤندے جاندے رہندے سُن۔
 ہندوستان وچ صوفیاں دا سہروردی سلسلہ حضرت بہاء الدین زکریاؒ توں شروع ہوندا اے
 ۶۶۶ ہجری دے صفر دے مہینے دی ستویں تاریخ نوں ظہر دی نماز دے بعد آپ
 دے وڈے صاحبزادے شیخ صدر الدین عارف خلوت خانے دے بوہے اگے کھلوتے
 سُن کہ اک سفید پوش شخص نے سلام کیتا تے اک مُہربند لقا فہ دے کے آکھیا کہ ایہہ
 خط حضرت بہاء الدین زکریاؒ دی خدمت وچ پیش کر دیو۔ حضرت زکریاؒ یاد الہی وچ مشغول
 سُن فارغ ہوئے تاں صدر الدین عارف ہوراں نے اوہ خط پیش کر دتا۔ حضرت نے
 خط کھول کے پڑھیا تے اللہ ہو دا نعرہ مار کے اللہ نوں پیارے ہو گئے۔ مکان دے
 ہر کونے توں آواز آئی۔

”دوست بدوست رید“۔ دوست اپنے دوست نال بل گیا۔ وصال دے وقت
 آپ دی عمر سو سال سی۔ آپ دامزار ملتان دے پُرانے قلعے تے سب توں اُچی تھاتے لے
 تے اُج دی ہزاراں لکھاں مریداں دی زیارت گاہ بنیا ہویا لے۔

ڈاکٹر محمد باقر

ڈاکٹر محمد باقر فیصل آباد دے نیڑے اک پنڈ وچ ملک حکیم دین ہوراں دے گھر
۴ اپریل ۱۹۱۱ء نوں پیدا ہوئے۔ آپ نے گورنمنٹ ہائی سکول گوجرانوالہ توں
۱۹۲۵ء وچ میٹرک، گورنمنٹ کالج گجرات توں انٹرمیڈیٹ، ایس ای کالج بہاولپور
توں بی اے تے پنجاب یونیورسٹی اورینٹل کالج لاہور توں ایم اے فارسی ۱۹۳۳ء وچ
پاس کیتا۔ انگلستان توں پی ایچ ڈی دی ڈگری لے کے مختلف کالجاں وچ پڑھاؤ دے
رہے۔ فیراؤنٹنل کالج لاہور وچ پہلاں پروفیسر بعد وچ پرنسپل ہو گئے۔

۱۹۵۷ء توں پنجابی ادبی اکیڈمی دے چیئرمین سن۔ آپ نے پنجابی زبان تے
ادب دی ترقی لئی بوہت کم کیتا اے تے پنجابی قصے کہانیاں دی چھان پھٹک کر
کے اوسہناں نوں دوجیاں زبانوں راہیں غیر پنجابی لوکاں تک اپڑایا۔ آپ ۲۷ اپریل
۱۹۹۳ء نوں اپنے رب نال جا ملے۔ آپ دے ناول ”ہٹھ“ نوں پنجابی ادب وچ اچھا
مقام حاصل اے۔

”پاکستان بن گیا اے“ آپ دے ناول ”ہٹھ“ وچوں اقتباس اے جیہدا مرکزی
کردار باؤ احمد مجید عرف اجماء، دلی وچ افسری۔ اک دیہاڑے اوہ دفتر گیا۔ پچھوں امدی
بیوی تے بچیاں نوں غیر مسلماناں نے قتل کر دتا۔ باؤ احمد مجید سودائیاں وانگر پھر دا
مسلماناں دے کیمپ لال قلعے گیا تے او تھوں گڈی راہیں پاکستان اپڑیا۔۔۔۔۔۔

پاکستان بن گیا اے

قلعے وچ اجماء کچھ دن تے مدہوشاں وانگر پھر دا رہیا۔ اوہنوں انج معلوم ہوندا

سی جویں اوہدا دماغ ہل گیا اے۔ بعضے لوک تے اوہنوں سچے مچے پاکل سمجھدے
سن۔ اوہنے کھانا پینا تے اپنا آپ سنبھالنا چھڈ دتا۔ کوئی جانو اوہنوں پھر کے
زیر دستی دال چاول کھوادیندا، پر جدوں دوجیاں لوکاں نوں اپنے کھان لئی دال تے
چاول نہ لبھدے اوہدوں اوہ احمے نوں وی کجھ نہ دیندے۔ پر احمے نوں ایس گل دی
پر واہ نہیں سی۔ اوہدے کپڑے پہلے پہلے ہوتے فیر پاٹن لگ پئے۔ جیہناں لوکاں کول
پیسے ہین، اوہ تے ٹھکڑے لے کے جہاز راہیں لاہور تے کراچی جان لگ پئے۔ پر احمے
کول تے ہن کجھ وی نہیں سی۔ اوہ اپنا بٹر کھا کے تے سب کجھ لٹوا کے نیم بہوشی دی حالت
وچ قلعے وچ آوڑیا سی۔ اوہنوں ہن تاں کھدی کوئی نہیں سی کہ اوہ اکجھ بن دا اے کہ نہیں
اوہ ٹٹے ہوئے چھتر پا کے سارا دن قلعے وچ پھر دار ہندا۔ نہ اوہ راشن لین جاندا نہ کے
کولوں کوئی ہور شے منگدا۔ اوہدے جانو کدی کدی اوہدے نال ہمدردی کردے
ہوتے آکھدے۔

”احمد مجید صاحب تیں اپنا راشن تے لے لیا کرو“

تے اوہ کجھ سوچ کے جواب دیندا۔

”کاہدے لئی؟“

”اپنے کھان پین لئی“

”جیہنوں جھکھو اسی نہ لگے اوہنے کیہ کھانا پینا اے“

”آخر بندہ بشر اے نا۔ جھکھ لگ ای پیدی اے“

”پتہ نہیں، میری جھکھ کتھے ٹر گئی اے۔ مینوں تے جھکھ نہیں لگدی“

ایہہ کہہ کے احمہ اگانہہ نگھ جاندا اے لوک گلاں کردے۔

”جیہدا ڈھڈ کھاں نال بھریا ہووے اوہنوں کیہ جھکھ لگنی اے“

”احما باؤ تے اپنی لاش نوں چکی پھرولے۔ دیکھو سک کے تیرا ہو گیا اے کوئی دم دا مہان“

”پرہے بڑی مٹھ والا۔ مجال اے جے کسے نوں اپنا دکھ دس جائے یا کسے کو لوں
ہمدردی منگے۔ اپنے آپ تے اسی سب کچھ جردا لے۔ ایہہ وی اللہ دی دین لے بندے
دا حوصلہ تے دیکھو، کیہڑے کیہڑے غم دیکھ کے وی جیوندار ہندا لے“

”بھائی مرنا تے اپنی آئی نال اسی ہوندا لے۔ پر ایہہ وی کیہڑا جیون دیاں وچوں آ
لاش لے بس لاش“

کدی کدی اچھے نے کنڈ کیتی ہوندی تے لوک اوہدیاں گلاں کر دے رہندے۔
اوہ چُپ چاپ ایہہ سب کچھ سُن کے جھولی پالیندا تے کسے ڈٹکھی سوچ وچ ڈبار ہندا۔
اوہنے حیاتی گذارن لئی بڑا اسی ڈوا جگرا بنایا سی۔ پر ہُن تے گل سرورں لنگھ گئی سی۔ اوہنوں
کدی کدی ایچ جا پدا جویں حالات اوہدے وڈے جگرے نوں چبا کے کچر کچر کھا گئے نیں
تے اوہدے جگرے والی جگہ اسی خالی ہو گئی اے۔

فیرا وہ سوچیں پنہ جاندا تے اپنے آپ نوں آکھدا
”اھمیا!“

توں نہ تے پاگل ہو سکیوں نہ مر سکیوں۔ تے فیر صبر تے حوصلے دے سوا ہو کیہڑا کم کر
سکناں ایں؟ دیکھ مولادے رنگ۔ توں پاکستان بنان لئی اپنے سال تڑن دار ہتھوں۔
پاکستان بن وی گیا تے تیری ترفاٹ وچ فرق نہ پیا۔ پتہ نہیں مولانے اکوٹ کیہ رنگ
دکھانے نیں“

اوہ ایہہ گلاں سوچ اسی رہیا سی کہ اعلان ہو یا کہ جیہڑے لوک گڈی راہیں
پاکستان جانا چاہندے نیں، اوہ اپنے ناں لکھا دیں۔ کسے نے اچھے داناں وی دفتر
وچ جا کے لکھا دتا تے دُوبے اسی دن اچھے نوں لاہور جان والی گڈی وچ بٹھا دتا گیا۔
گڈی وچ ایسی بھیڑ سی کہ اچھے نوں لوکاں دھکدیاں دھکدیاں ڈپے دیوں باہر
کڈھ دتا۔ نفسی پتی ہوتی سی۔ جدوں گڈی نکونک بھر گئی تے لاہور چلن لئی تیار ہوتی

کے نے اچھے نوں گھسیٹ کے گڈی دی چھت تے بہا دتا۔ او تھے ہور وی کئی
سو آدمی بیٹھے ہوئے سن۔ احمّا اک نو بکلی جگہ دیکھ کے او تھے لیٹ گیا۔

شام دے نیڑے گڈی امرتسر پہنچی تے گڈی تے حملہ ہو گیا۔ ہنیرے وچ
ہندوواں تے سکھاں نے گڈی دے اندر بیٹھیاں ہوئیاں مسافراں نوں لٹا تے
مارنا شروع کر دتا۔ بابا کارپتی تے احمّا اٹھ کے بہہ گیا۔ اوہنے چھت توں ہیٹھاں
اُترن دی کوشش وی کیتی پر اوہنوں کوئی راہ نہ بھیا۔ اوہ تھوڑا جیہا ای چلیا سی کہ
دوسرے مسافر نے اوہنوں گھسیٹ کے اپنے کول لٹا پالیا۔ تے آکھن لگا۔

”شدّا تیا کتھے چلیا ایں؟ ہیٹھاں تے وڈھدے ٹکدے پئے نیں۔ توں ایتھے

ای چپ کر کے بیٹھا رہ۔“

اچھے پچھیا؛

”کون کہنوں وڈھدا نکدا پیالے؟“

”ہندو تے سکھ، مسلماناں نوں وڈھدے پئے نیں۔“

اچھے نوں اپنی سوانی تے بچے خون وچ تر دے ہوئے یاد آ گئے۔ اوہدا
دل کیتا کہ میں گڈی دی چھت توں ہیٹھاں لہر کے سارے ہندوواں تے سکھاں
دیاں سوانیاں تے بچیاں نوں خون وچ ڈوب دیاں، پر نال ای اوہنوں خیال
آ گیا۔

اوہ خورے کون ہندو تے سکھ سن جیہڑے میرے بھرتوں خون وچ نہوا گئے
سن۔ ایتھے تے شاید اوہناں وچوں کوئی وی نہیں مینوں تے ہمیشہ ایہو ای دیا
گیا اے پتی انصاف کرنا چاہی دالے۔ تے ایہہ کاہدا انصاف ہو یا جے مارن دالے
تے راہ جان تے میں ایتھے امرتسر وچ دوجیاں نوں مارن لگ پواں۔ فیراک ہور
اوکھت دی سی۔ اوہدے کول ہے ای کیہ چیز سی جیہدے نال اوہ کسے نوں مار

ایہو سوچ سوچ کے اوہ فیہ چھت تے لما پھہ گیا۔ ہو رملوک سہے ہوئے
چپ سُن۔ اچھے نوں اوہ دیاں سوچاں تے چپ کرایا ہو یا سی۔

گڈی امرتساری رات کھلوتی رہی۔ پتہ نہیں کیہ وجہ سی؟ پہلے پہلے اچھے
نوں زخمیاں دیاں چپکاں تے کوکاں سُنائی دیندیاں رہیاں۔ فیہ ہوئے ہوئے بیہوشی
یاں موت نے سب دے گلے گھٹ دتے۔ احماسونا چاہندا سی پر آج دی رات نیندر
کدھرے نس گئی ہوئی سی۔ اوہ سوچن لگ پیا: پتہ نہیں گڈی پاکستان کدوں پہنچے
گی؟ پہنچے گی دی یاں نہیں؟ اوہ تے نال دے ساتھی کو لوں پُچھیا۔
”ایہہ گڈی پاکستان کدوں پہنچے گی؟“
ساتھی نے کہیا۔

”جدوں خدا پچائے گا۔“

پتہ نہیں اچھے نوں ایہہ خیال کیوں آیا؟

ایہہ شیطانی کم اے، جدوں خلقت دے دل وچوں خدا داترس ٹک جائے
اوہوں شیطان دی چڑھ مچدی اے۔ اوہ فیہ نفرت بن کے لوکاں دے دل وچ وڑ
جاندا اے۔ کدی اوہ مسلماناں کو لوں ہندوواں سکھاں دے گلے کٹواندا اے تے
کدی ہندوواں سکھاں کو لوں مسلماناں دیاں جڑاں پٹاندا اے۔ تے کدی کدی اوہ مسلماناں
کو لوں مسلماناں نوں امی مروانا شروع کر دیندا اے۔ شیطان دیاں عجیب عجیب
کھیڈاں انیں۔ خدا دی کھیڈ سب مخلوق نوں صاف نظر آوندی اے شیطان دی
کھیڈ نوں آج تک کوئی نہیں سمجھ سکیا۔

بندیا تیرا دل مومن اے۔ ایسے لہی توں اپنا بال بچہ کہا کے دی کسے ہندو

سکھ دے بال نوں انگلی نہیں لانا چاہندا

پاکستان وچ تے اسیں مارے اسی مومن ہوداں گے۔ اوتھے تے کوئی کسے
نوں آزار نہیں پہنچائے گا۔

اوہدے اندر لا احماد زور لا کے کہنا چاہندا سی۔

پاکستان کا مطلب کیا ؟

لا الہ الا اللہ

پرایہ لفظ اوہدے ہونٹھاں تے آکے شک جاندے سن۔ گڈی ہُن چل پتی سی۔
تے ہولی ہولی امرتسر دے ٹیشن توں باہر نکل آئی سی۔ گڈی راہ وچ رُک رُک کے ہنیرے
مُونہ لاہور پہنچ گئی۔

ٹیشن تے بڑا ہنیرا سی۔ ایناں ہنیرا احمے نے ایدوں پہلے کدی نہیں دیکھیا سی۔
مسافر چھتاں توں ہٹھاں اُترن لگ پئے۔ احمادی ملک چھت توں ہٹھاں لہہ آیا۔
اوہ پاکستان پہنچ گیا سی۔ اوہا بڑا دل کھدا سی اوہ نعرہ مارے۔

پاکستان زندہ باد

پرایہ لفظ وی اوہدے ہونٹھاں اُتے آکے ایویں سُک گئے جو یں راتیں
لا الہ الا اللہ دے لفظ اوہدے گلے وچ چھس گئے سن۔

ڈبیاں دے اگوں لنگھدا ہویا پلیٹ فارم تے ٹرن لگ پیا۔ ڈبیاں چول
بوہیاں تک خون دیہندا پیا سی۔ لوک مُردیاں تے زخمیاں نُوں ڈبیلیں وچوں کڈھدے
پئے سن۔ صرف چھت والے مسافر ای بچے سن۔ باقی زخمی ہو گئے سن یاں قتل۔ احماد دا اُڑدا
پلیٹ فارم دے سرے تے پہنچ گیا۔ اوہنوں کوئی پتہ نہیں سی ہن اوہنے کتھے جانا
اے۔ پلیٹ فارم دے مک جان نال اوہنوں انج جا پیا جو یں اوہ زندگی دی اک نوپ
منزل تے پہنچ گیا اے۔ پرایں منزل توں اگے اوہنوں کوئی راہ نہیں پیا بلدا سی تے ایں
منزل تے ٹھہرن دی کوئی جگہ نہیں سی۔ اوہ حیران ہو کے پلیٹ فارم دے سرے تے

کھلو گیا۔

آواگت کس نے آکھیا!

”سٹر احمد مجید! یہ آپ ہیں؟ بھئی یہ کیا حالت بنا رکھی ہے؟ اور یہاں کیا کر

رہے ہو؟“

احمے دے سامنے احمے دے ہائی سکول دا اک جماعتی کھلوتا ہو یا سی۔ احمے نے اوہاناں یاد کرن دی کوشش کیتی پر چلتے نے اوہا ساتھ نہ دتا۔ اوہ حیران ہو کے اوہدے ول ویکھدا پیا سی۔ جماعتی نوں سمجھ آگئی پئی احمے نے اوہنوں پہچان تے لیااے پر اوہاناں یاد نہیں پیا آؤندا۔
جماعتی نے آکھیا۔

”مجید صاحب، میں رفیع ہوں۔ رفیع جو نویں دسویں میں آپ کے ساتھ تھا میں پارٹیشن سے پہلے بمبئی میں تھا۔ اب بال بچوں سمیت یہاں آگیا ہوں۔ میرے خسر نے فسادات کے دوران ہی مجھے یہاں بلا لیا تھا۔ انہوں نے ایک خالی کوٹھی مجھے دلا دی ہے میں بمبئی میں جہازوں کی ایک کمپنی میں ہیڈ کلرک تھا۔ یہاں انہوں نے مجھے راشننگ کنٹرولر لگوا دیا ہے۔ پاکستان بن گیا ہے۔ ہم بڑے مزے میں ہیں۔ خدانے بڑی مہربانی کی ہے۔ اب بتاؤ یہاں کیا کر رہے ہو؟“

احما بڑی دیر تک رفیع ول ویکھدا رہیا۔ پاکستان بن گیا اے۔ ایہہ لوک بڑے مزے وچ نیں۔ خدانے بڑی مہربانی کیتی اے۔

اوہ سوچیں پنے گیا۔

پرایہہ ساریاں گلاں شاید اوہدے لئی ٹھیک نہیں سن۔ اوہدیاں اکھاں کچھلے پاسیوں دُور کدھرے دتی دیاں سڑکاں تے لال نشان لگی ہوئی کوٹھی نوں پٹیاں ویکھدیاں سن بجیہہ وچ اک بے گناہ عورت تے دو معصوم بچے خون وچ تڑدے پتے سن۔ فیرات دے

ہنیرے وچ ایہناں بیکساں دیاں لاشاں نوں دوچار آدمیاں نے ٹوہیاں وچ سٹ
 دتا تے فیر قلعے دا کاکورولا۔ چاول تے دال لین لئی لوک ہر روز ہتھاں وچ ٹھوٹھے
 پھڑکے نکل دے۔ بعضیاں دے ٹھوٹھیاں وچ کچھ پنہ جاندا تے اوہ جانوراں دا نگر برک
 مارن لگ پئیدے۔ بعضے خالی ٹھوٹھے واپس لیا کے نیلے آسمان ول دیکھدے رہندے
 احمہ حیران ہو کے چھتراں نوں گھسیٹدا قلعے دی اچی نیویں زمین تے اپنی جیوندی
 لاش نوں گھسیٹدا پھردا۔

رفیع نے یکایک احمہ نوں مونڈھیاں توں پھڑکے جھٹکا دتا۔
 ”دوست بولتے کیوں نہیں؟“

احمہ نے ہٹکورا لیا تے کہن لگا۔

”میں ایس گڈی توں اُتریا ہاں“

رفیع نوں جدوں احمہ دا حال پتہ لگاتے اوہ اوہنوں اپنی موٹر وچ بہا کے
 اپنے گھر لے گیا۔ رفیع کول چوداں کمریاں دی اک دڈی ساری کوٹھی سی۔ اوہنے احمہ
 نوں اک کمرہ دے دتا تے احمہ دے کہن تے اوہ وعدہ کر کے دفتر ٹر گیا۔ کہ میں تیرے
 لئی کوئی کم لبھنا ہاں۔

رفیع نے اپنے کچھ کپڑے دی احمہ نوں دتے پر احمہ نے اوہ کپڑے اپنی منجی
 دی پواندی رکھ چھڈے تے اوہ دن رفیع دی بیوی کولوں صابن منگ کے غسل خانے
 وچ اپنے کپڑے دھوتے۔

رفیع شام نوں دفتر د واپس آیا تے اوہنے فیر اصرار کیا کہ احمہ پاٹے ہوئے
 کپڑے لاہ کے اوہ دے کپڑے پا توے پر احمہ کے طرحاں وی نہ منیا۔ اوہ بار بار بیتاب
 ہو کے پچھدا،

”میرے لئی کوئی کم لبھا اے کہ نہیں؟“

رفیع اکھیا۔

”یار کیہڑی گل اے، کم بل ای جائے گا۔ توں حالی ایتھے آرام کرتے سُر ت
ٹھیک کر میں انشا اللہ، جلدی تیرے لئی کم لہجہ لواں گا۔ توں دلی وچ افسر میں۔ ایتھے
ہو رومی وڈا افسر ہو جائیں گا۔ گجھرانا نہیں چاہیدا۔ دفتران داملہ اے۔ نوکری
دے کاغذ دفتران وچوں کڈھان وچ وی کچھ وقت لگ دا اے۔ . . .“

مجلس

اشفاق احمد

اشفاق احمد ۲۲ اگست ۱۹۲۵ء نوں مکتبہ ضلع فیروز پور وچ پیدا ہوئے آپ دے والد ڈاکٹر محمد خاں ویٹرنری ڈاکٹر سن آپ نے مڈھلی تعلیم مکتبہ فیروز پور وچ حاصل کیتی۔ ۱۹۴۶ء وچ پاکستان آئے تے ۱۹۵۰ء وچ گورنمنٹ کالج لاہور توں ایم اے اُردو دا امتحان پاس کیتا۔ فیروزپال سنگھ کالج لاہور وچ لیکچرار ہو گئے۔ ۱۹۵۳ء وچ روم یونیورسٹی (اٹلی) وچ اُردو دے پروفیسر بن گئے کجھ چھریڈیو روم توں پروگرام وی پیش کر دے رہے۔

پاکستان پرتے تے ہفت روزہ ”لیل و نہار“ دے ایڈیٹر بن گئے تے اپنا اک رسالہ ”داستان گو“ وی جاری کیتا۔ بعد وچ عرصے تک مرکزی اُردو سائنس بورڈ دے ڈائریکٹر رہے۔ آپ نے ریڈیو تے ٹیلی ویژن لئی اُن گنت ڈرامے لکھے۔ لاہور ریڈیو توں آپ دا اک طویل تے دلچسپ پروگرام ”تلقین شاہ“ دے ناں نال چلدا رہیا۔ آپ دے پنجابی ڈرامیاں دا مجموعہ ”ٹاہلی تھلے“ چھپ چکیا اے۔ آپ دے ڈرامیاں وچ معاشرتی تے سماجی قدراں دی ترجمانی دے ناں نال، ہاسا، مزاح، مٹھیاں مٹھیاں ٹکوراں تے مت دیاں گلاں وی ہوندىاں نیں۔ زبان سادہ، عام فہم تے مَن وچ کھن والی زبان دی درتوں دے ناں نال پنڈ دے اُن پڑھ طبقے دی بولی نال ڈرامے وچ مزاح پیدا کر دے نیں ڈرامیاں دا دوجا مجموعہ ”اچھے بُرج لہور دے“ وی شائع ہو چکیا اے۔

ٹاہلی تھلے

کردار :-

گاگو: اک نوجوان - چوہدری: پنڈ (ٹاہلی والا) دانمبردار
پھتو: سادہ لوح جوان -

گاگو: زمین تے ٹاہلی والے تھڑے نال ٹیک لائی بیٹھا اے۔ اوہ سرچیک کے ٹاہلی ول
ویکھدا اے تے مُکرا وندا اے۔ دولو گاندا اے
دولو: جیہناں نوں دتا غُسل فرشتیاں پڑھ شرط ثوابی
سر دیندے رب دے واسطے خود تھیندے غازی
حوراں پایاں کپڑے پوشاک گلابی
اوہناں جا کے پائی بہشت وچ شہادت شادی
اوہ جا حضور رسول دے ہوئے معراجی
(دولو چپ ہو جاندا اے۔)

پھتو: واہ بی واہ۔ نہیں ریاں تیریاں۔ کدھرنیں تیریاں بکریاں؟
دولو: ایدھر کدھرے امی چر دیاں پھر دیاں نیں۔ پرہن ایہناں بکریاں وچ دل
نہیں لگدا میرا۔

گاگو: بلے بی جمنّاں تیرا امی اے۔
دولو: (گاؤندا اے) اوّل دلی تراہ کر اپنی یسائی
پھیر لئی چوہاناں انگ خوش کر لائی
پھیر لئی غوریاں کوئی مدت دسائی
پھیر لئی پٹھاناں گھر چوتھے آئی
پھیر لئی چغتیاں گھت مار کٹائی
ہن داری میری دیئے پھر مہنہ لکائی

(دو گوگیت گاؤندا، لاٹھی ٹیک دا اگانہ ودھر جاندا اے)

پھتو: بڑے حوصلے آلا بند اے۔ بے کہ نہیں گاگو؟

گاگو: اوئے ایس پنڈ وچ سارے ای حوصلے آئے بندے نیں۔

پھتو: آنے ویلے دی نماج تے کویلے دیاں ٹکراں۔

ہُن کوئی دیلا رہ گیا اے بے حوصلہ ہون دا۔

میں کیہا گاگو... تیری واج نوں کیہ ہو گیا اے یار؟

گاگو: کیوں؟

پھتو: اوئے ایہہ تاں سدھی جیہی ہو گئی اے۔ ساڈے ورگی، پہلاں جدوں توں

بولد اسی تے ایویں لگدا سی جو یں گھرے وچ مکھی مریجا صاحبیاں گاندی ہوئے۔

توں ہُن تاں ماشا اللہ۔ تیری واج واواہ ہو گئی اے، تے نالے لم لیٹ جیہا کیہ

ہو یا پیا ایں؟

گاگو: اینویں بس ٹاہلی دے پتراں تے پیار آندا سی پیا۔ ٹاہنیاں باہیاں ہلا ہلا کے

مینوں کول بہا لیا تے میں بہہ گیا۔ پھیر ویکھدا رہیا، ویکھدا رہیا تے ویکھدا ای رہیا۔

پھتو: لے سچ۔ میں تے بھل ای گیا سی۔ تیر لے تاں پتہ دے دتا اے چونکی وچ چوہری

نے، بتی تئاں دناں دا ساڈے پنڈ دا عملی گاگو پگ جتیاں تے کیب اے تے

کوئی اوہدی ہرج مرج دا بجے دار نہیں۔ تے توں ہُن کتھوں آ گیا ایں؟

گاگو: رکھروں وی نہیں بس ایتھے ای سی۔ شہر گیا سی تے شہروں ای باپس آ گیا

آں۔

پھتو: لے فیر ہُن جدوں چوہری نوں پتہ لگیا نا۔ بتی توں ٹاہلی تھلے بیٹھا ایں تے

اوس تیری واہ واہ کھنڈ پھنی لے۔

گاگو: پھیر کیہ ہو یا جو اوس کھنڈ ٹھپ چھڑی۔ اپنا چوہری جو ہو یا ساڈا وڈو ڈیرا۔

پر توں چوہری نوں کدھر بھالدا پھرتا ایں؟
 پھتو: میں؟ میں چوہری نوں بھالنا پھرنا آں؟ تینوں کس دیا اے؟ میرا کیہ کم
 چوہری نال؟

گاگو: کم ہووے یا نہ ہووے بھال دتے پھرتا ایں۔

پھتو: لے ہے پھیراؤ ہیو گل۔ اوئے تینوں کس دیا اے اینویں خواہ مخواہ۔
 گاگو: اوئے جھٹیا، چوہری نوں تے واجاں ماردا توں ایدھر آیا سی تے ہُن میتھوں
 ای کھپن ڈیہہ بیا ایں پئی مینوں کس دیا اے؟

پھتو: چوہری نوں؟ آہو اوے نوں تے میں بھدا پھرنا آں۔ چنگا بند ایں۔ میتھوں
 لکائی جاندا ایں سب کش، کدھر گیا اے؟

گاگو: (ہس کے) لے ہے مینوں کیہ پتہ اے کدھر گیا اے۔ اودھر ہووے گا، پیلیاں
 ول۔

پھتو: پیلیاں ول اودھا کیہ کم؟ اوہ تے پھرن گیا اے جسوساں نوں۔

گاگو: جسوساں نوں؟ کدھر نہیں جسوس؟

پھتو: لے اوہ کوئی مینوں حاجری دے کے جاندا ہے نیں جو میں تینوں دس دیاں بی
 کتھے نیں۔ جنگلاں پیلیاں وچ لکے پھر دے نیں۔

گاگو: تے توں نال نہیں گیا پاگلا؟

پھتو: میں! میں کویں جاندا چوہری نال؟ جیہڑا چھٹکا کم ہوندا اے اوہدے تے آپ رُ
 پیندا اے تے جیہڑا ماڑا مولی کم ہوندا اے اوہدے تے مینوں بہا جاندا اے۔

گاگو: اوئے توں کیہڑے کتیں لگیاں ایں؟ ایہدے توں ودھ کے ہووے کیہڑا کم سی بھلا۔

پھتو: مینوں دے گیا سی کتاہیں تے بسکٹاں دے ڈبے، بی ایہناں دیاں پوٹلیاں
 بنائی آ۔ آپاں لام تے بھیجیاں نیں اپنے بھرتواں نوں، جیہڑے اوئے

لڑے میں پتے۔

گاگو: اوے توں ایہنوں ماڑا کم سمجھا ایں جھلیا؛ اوہناں لئی تے جوگش دی ہوئے
جناں دی ہوئے تھوڑا اے۔ میرے ورگے مردود تے کسے جوگے نہیں، نہیں
تے میں دی دودھتہ و خائدا۔

پھتو: دودھتہ او تھے فرنٹ تے و خاویں۔ اپنا بھراکھشی محمد ساڈے سردی پگ تے
متھے دی کلگی۔ میں اوے دی چٹھی لے کے تے آیا سی چوہری نوں و خان۔
پر کوئی پتہ نہیں دس رہیا۔

گاگو: چٹھی؟ اوے چٹھی میرے بھراکھشی محمد دی چٹھی؟ اوے جالماں مینوں دی دس۔
کیہ لکھیا اے اوں نے؟
پھتو: چٹھی سننی اے کھشی محمد دی؟ کھڑو جا۔ ٹھہر جا۔ لے توں ایتھے بہہ جاؤنترے
تے۔

(گاگو چوہترے اُتے بہہ جانا اے)
پھتو: (کھیسہ پھول کے چٹھی کڈھدا اے) لے گوہ نال سنیں تے میرے دل دھیان
رکھیں۔

گاگو: توں چالوتے کریتھوں ہو رصیر نہیں ہوندا۔

پھتو: (چٹھی پڑھدا اے) جناب میرے بھائی صاحب فتح دین صاحب پھتو گجٹ
کو سلام علیکم ہو۔

گاگو: وعلیکم السلام۔

پھتو: اوے ایہہ تے مینوں سلام لکھیا اے، کلتے نوں۔ توں خواہ مخواہ جواب دینی جانا

ایں۔ تہاڈے لوکاں دے سلام تے پھیر آن گے اخیر وچ۔

گاگو: اوے وچوں روکیا نہ کر اوے پھتو۔

پھتو: پھیتی نال، جناب میرے بھائی صاحب فتح الدین پھتو گجٹ صاحب کو سلام علیکم
 ہو۔ بعد سلاما لیکم کے واضیا ہو کہ میں یہاں پر راضی خوشی ہوں اور آپ کی
 خیریت خداوند کریم سے نیک مطلوب چاہتا ہوں۔۔۔ پنڈ سے چل کر میں
 باپس اپنی یونٹ میں پہنچ گیا ہوں اور صاحب کو رپورٹ بول دی ہے۔ صاحب
 نے میرے کو دل سے لگا کر تھاپی دتی ہے اور ہماری یونٹ کو فرنٹ پر جانے
 کا آڈر بول دیا ہے۔ ہم تے آڈر سننے ہی یا علی یا علی کے نعرے مارے اور
 اک دو بجے کے گلوں میں پھولوں کے ہار پاتے۔ کل سویرے ہمارا (Move)
 ہے۔ سب کو درجہ بدرجہ سلام دینا۔ بے بے دی قبرتے جا کر پھل پانا اور میرا سلام
 بولنا۔ پنڈ میں کسی قسم کا فکر نہیں ہونا چاہیے۔ ہر آدمی کو اپنے کم پر لگے رہنا
 چاہیے جو جو آدمی جس جس کا رہ لگیا ہو یا ہے اوس میں بڑھ چڑھ کر کم کرنا فرنٹ
 پر لڑنے کے برابر ہے۔ میں انشا اللہ غازی بن کے تمنغے پا کے سب گرائیاں دے
 کول آواں گا۔

گاگو: انشا اللہ۔ انشا اللہ

پھتو: اگے لکھدا اے بتی اماں ریں باں کو کہہ کے میرے کو ٹھے کی چھتاں لبنا رکھنا اور
 نم کے بوٹے کو تن ڈنگ پانی دیتے رہنا۔ سب بھائیوں کو درجہ بدرجہ سلام اور
 سب کو بول دینا اپنے اپنے کام پر کھڑے ہو کر جہاد میں حصہ لین۔ ہر شخص
 کا کم ایمان داری اور نیکی کے ساتھ کریا ہو یا جنگ جتن میں ہماری بوہت
 مدت کرے گا۔ ماسی کو تھیں بندھیں سلام دے کر بولنا کھشی محمد آڈر پانے پر باپس
 آگیا ہے۔ سپاہی کو جب کاشن ملتا ہے تو وہ رہ نہیں سکدا۔

جونسا کالا جندرا میں تم کو دے آیا تھا وہ میرے کو ٹھے کو مار دینا۔ پُرانا جندرا لاہ
 کے بابے کھیرے کو دے دینا۔

سب کو درجہ بدرجہ سلام - بھائی دین محمد دینے اور گاگو کو سلام -

گاگو: وعلیکم السلام وعلیکم السلام

پھتو: چوہدری صاحب کو سلام تاتے کو بوہت بوہت سلام - پنڈ کے اک اک بندے
کو سلام - سب سے بولنا ہمارے ملک کے حق اندر دعا کریں -

تمہارا سگا بھائی
لانس نائیک خوشی محمد

گاگو: واہ بی واہ - دل خوش ہو گیا پھتو -

پھتو: میں کیا پھیریاراں دا خط یاراں دے تاں -

گاگو: من گئے آں بی تیری یاری نوں - جیوندے رہو تے مو جہاں مانو -

پھتو: لے پھیر ہن میں چلاں - - -

گاگو: میں کیا یار پھتو - اک گل تے دس -

پھتو: گل؟ فیرا کو ای کچھیں تے نا لے اک گل ہور اے بی -

گاگو: لے ہن توں آپے اسی چھٹ پیا ایں خواہ مخواہ

پھتو: اچھا دس فیر -

گاگو: گل ایہہ اے بی توں تاں ال دانناں کو کو نہیں جان داتے توں ایہہ چھٹی

کینویں پڑھی سی جاندا پیا -

پھتو: ایہہ چھٹی؟ ایہہ میرے یار کھنشی محمد دی اے تے آپے اسی بولدی جان دی اے

مُونہوں میں سنی سی منشی ہوراں کولوں ترن ڈاری - دس واری میں سوئے تے

بہہ کے پکائی - جتھوں بھلدا اسی ناں میں... جس جس حرف توں بھل جاندا

سی، اوہ میں پھیر جا کے کچھ لیندا سی منشی ہوراں کولوں، تے بس اینویں دیندے

دیندے یاد ہو گئی -

گاگو: نہیں ریاں تیریاں پھتو گجٹ، نہیں ریاں تیریاں۔

پھتو: اچھا عملیا۔ توں بیٹھ کے ارمان کر لیں چوہدری نوں دس آنواں بی ایہہ چٹھی آئی
اے۔ تے دھیان رکھیں۔ متے چوہدری دے اڑتے چڑھ جانویں۔

گاگو: نہیں نہیں کھیر سلا اے کش نہیں آہندا چوہدری۔ توں بے پھکرہ
پھتو: لے پھیر سلا مالیکم۔

گاگو: وعلیکم السلام۔ (پھتو چلا جاندا اے) (گاگو ایدھر اودھر دیکھدا اے)
پھتو: (واپس آکے) اوئے گاگو۔ گاگو۔ اک گل ہو رسی پار کچھن والی..... تے
اوہ گل کیہ سی بھلا؟

گاگو: لے مینوں کیہ پتہ اے؟

پھتو: اوہ گل ایہہ سی... آہو... بھلا کیہ سی؟ ہاں سچ گل ایہہ اے بی توں
اینے دن گیب کدھر رہیا اوئے؟
گاگو: تینوں دسیاتے سی۔

پھتو: دیاسی؟ کدوں بھلا؟... آہنے جیئے دیاسی نا؟ آہو دسیاتے
ہی پھیر، چنگا کوئی گل نہیں آپے یاد آ جاتے گا۔ اچھالے فیر رب رکھا۔
گاگو: رب رکھا۔

{ پھتو دے جان مگروں گاگو ایدھر اودھر دیکھ کے زمین اُتے لٹا پتہ جاندا اے
دُوروں کے دے گاؤں دی آواز آؤندی اے۔ گاگو آواز سُن دا اے تے مسکراؤندا اے }

(چوہدری ہتھ وچ بندوق پھڑکے آؤندا اے)

چوہدری: اوئے توں کدھروں آگیا ایں بدبختا؟

گاگو: (اٹھ کے) میں... چوہدری جی... میں؟

چوہدری: ہو ر میں تیرے کے اگلے پشلے نوں پُچھناں آں پیار۔ کدھر دفع ہو یا سی اوئے

توں؟

گاگو: میں جی ایدھرا می سی، جی بس۔

چوہدری: تینوں پتہ نہیں۔ اوتے بے شرما، ایس ویلے ملک تے کیسی بھیڑ بنی ہوئی
اے تے توں کے نوں دے پچھے بناں ای کھک گیا۔ اوتے تینوں شرم نہ آئی؟
تیرا دل نہ ڈولیا۔ پنڈ نوں چھڑ دیاں ہوئیاں؟

گاگو: میں تاں شہر گیا سی۔

چوہدری: کنے آکھیا سی تینوں شہر جان نوں، تے کیندھے کو لوں پچھ کے گیا سی توں،
اوتے شہر نوں؟ لوکیں تے اپنے اپنے پنڈ دیاں گٹھاں مجبوظ کر کے بیٹھن،
تے میرے پنڈ دے سُرے شہر رُ جان منڈوے دیکھن نوں۔

گاگو: میں منڈوہ دیکھن تے نہیں گیا سی جی۔

چوہدری: تے فیر کوئی ہو رشتہ پانی کرن گیا ہوتا ایں۔

پھتو: (چھیتی نال) چوہدری جی۔ چوہدری جی۔ میں تہانوں بھالدا آیا آں۔ جی کھوہ
تے نالے پلایاں وچ، بابے وریام دی ڈھیری تے۔ پر تہاڈی کوئی اُگ سگ
امی نہیں ملی۔ میں سی کاہلی وچ تے تہاڈا ملنا سی بوہت جبروری۔

چوہدری: کیوں کھیرتاں ہے؟

پھتو: کھیر چوہدری جی کھیراے.... نہیں جی سب اللہ دافضل اے۔ کھیر میراے
چارے پاسے تے نالے جی میں تہانوں بھالیا کھجوراں آلی وستی وے دی۔ ایہہ
میں بھل گیا سی۔ سناؤ تگرے جے؟

چوہدری: اوتے گل کہہ انے؟ بھالدا کیوں پھر داسی؟

پھتو: گل چوہدری جی.... گل تے کوئی کھاش نہیں بس تہاڈے نال کم سی اک

جبروری؟

چوہدری: اوئے دس تاں۔ کیہ کم سی جبروری؟

پھتو: (سرکھرک کے) اوہ میں لیانا آں جی پڑتال کر کے۔ پہلاں میں ٹراں گا گھروں تے
سدھا آؤں گا ٹاہلی تھلے۔ آؤندیاں ہوویاں مینوں یاد آئے گاتے اوس ویلے دی....

گاگو: اوہ چٹھی آئی اے نیک کھنشی محمد دی۔

پھتو: نیک کھنشی محمد دی چٹھی۔۔۔ تینوں کوں پتہ اے؟ آہو تینوں سب کس پتہ اے۔

چوہدری: اوئے کدوں آئی اوہدی چٹھی، میرے پتر دی؟

پھتو: سویرے دے گیا سی جی منشی سکول دا۔ تے میں چکی پھرنا نال نال۔ کھڑو جاؤ۔۔۔

کھڑو جاؤ۔ (کھیسہ پھر دلا اے۔) کھوہ تے میں دھویا سی ٹوٹہ تے چٹھی رکھی سی تے

کھڑو یا جے۔۔۔ کھڑو یا جے۔ میں ہننے لیانا بھجج کے۔

(چھیتی نال بھجج جاندا اے)

چوہدری: گل کرہی میرے نال۔

گاگو: حکم کرو جی۔ جو دی پچھو

(پھتو فیر آؤندا اے)

پھتو: چوہدری جی۔ چوہدری جی.... اوہ چٹھی سُن لو تو پہلاں میرے کولوں تے پھیر

تیں آپ حرف اٹھا لیا جے۔ میں چُک لیانا کھوہ توں۔

چوہدری: بس کراوئے پھتو بس کر۔ جا، تے پہلاں چٹھی چُک لیا۔ پھیر میرے نال گل کریں۔

پھتو: پہلاں تیں میرے کولوں سُن لو و جی تے پھیر آپ اٹھا لیا جے۔۔۔۔ جناب

میرے بھائی صاحب فتح الدین پھتو گجٹ صاحب کو سلام لیکم ہو۔۔۔۔ بعد

سلام لیکم کے واضیا ہو کہ میں یہاں پر راضی خوشی ہوں اور آپ کی خیریت خداوند

کریم سے نیک مطلوب چاہتا ہوں۔

چوہدری: اوئے پھتو۔۔۔۔ اوئے پھتو۔۔۔۔ رہن دے اوئے ایس ویلے۔ میں آپے

لے آواں گا کھوہ توں گل کر اوئے توں بھگوڑیا۔ توں کدھر لکھیا رہیاں؟

گاگو: دیاتے ہے چوہدری جی بتی میں

چوہدری: شہر گیا سی۔ اوئے کیوں گیا سی اوئے توں او تھے سانوں دتے پناں؟

گاگو: بس جی اینویں امی۔ . . .

چوہدری: پھر اوئے پھتو ایس بے شرم نوں تے لے چل پنڈوئے

پھتو: (اوہدی بانہہ پھر دا اے) چل بتی ہو جا سدھا۔

گاگو: چلو جی چلو۔

[پھتو اوہنوں ہوئے جیسے کچھدا اے تے اوہ اگانہہ نہیں ٹردا۔ چوہدری غصے
وچ اوہدی بانہہ پھر کے کچھدا اے تے اکھدا اے۔]

چوہدری: چل دا این کہ نہیں سدھا ہو کے۔

گاگو: (پیر محسوس کر کے ہائے کر دا اے) ہائے . . . ہائے۔ چلنا این جی چلنا این۔

میری بانہہ تے چھڈ دیو۔

چوہدری: کیہ ہو یا اے تیری باہی نوں وڈیا ناجکا؟

گاگو: کش نہیں جی۔

چوہدری: چل فیر سدھی طرحاں۔

[گاگو پیر پاروں دوہرا ہو جاندا اے تے زمین اُتے بہہ جاندا اے چوہدری
جھک کے اوہدی قمیض دا بازو چکدا اے۔]

چوہدری: وفا خاں اوئے، توں پھیم دی پوٹلی بدھی اے ایتھے؟ (قمیض دے بازو

تھلے پٹی بدھی ہوندی اے)

چوہدری: ایہہ کیہ اوئے؟

گاگو: میں شہر گیا سی چوہدری جی۔

چوہدری : میں پُچھنا آں ایہہ کیہ اے ؟

گاگو : میرے جیسے بھکھے تنگے اوترے نکھترے کول چوہدری جی اپنیاں پھو جہاں نوں
دین لئی کُش وی نہیں سی۔ سارے اپنے اپنے تھائیں کجھُنا کجھُ کر ی جانے
سن تے میں نہر کندھے اپنی تقدیر نوں رونا ساں۔ نہر دی کوٹھی تے جدوں ریڈے
نے ایہہ اکھیاں اپنی جواں لئی لہو دیو تے میریاں اکھاں اگے چانن آگیا۔ میں
اوتھوں امی پچھلے پیریں ٹپ پاتے شہر اپڑ گیا۔ ڈاکدار نے میرے نال بڑا دھرو
کیتا اے۔ اک بوتل رت لے کے مینوں اٹھاتا۔ میرے سر یوچ حالی ہوو دی
لہو اے۔ میں دوہاں دناں دا پنڈ والیاں توں مونہہ نکاتی پھرنا آں بی گیا وی تے
دے کے کیہ آیا۔ اکو بوتل

چوہدری : (دوہیں ہتھ پھیلا کے) ایدھر آ اوئے۔ ایدھر آ میرا پتر اگلام مُجھا۔ میری چھاتی نال
لگ جا اوئے۔ توں ایس پنڈ دا سُوریا پتر ایس ... (ہک نال لاکے) مینوں معاف
کر دے ... معاف کر دے پتر اوئے۔ ایس سارے امی بھلیکھے وچ ہے
— توں تے ایس پنڈ دا شیر پتر نکلیا۔

بشیر حسین ناظم

بشیر حسین ناظم گوجرانوالے دے محلے نختہ والا وِچ ۲۰ اکتوبر ۱۹۳۲ء نوں پیدا ہوئے آپ دے والد داناں میاں غلام حسین سی جیہڑے چوہان راجپوت سَن۔ ناظم ہو راولپنڈی تعلیم شرق پور وِچ حاصل کیتی، فیر ۱۹۵۳ء وِچ میٹرک دا امتحان پاس کر کے لاہور آ گئے تے کارپوریشن وِچ ملازمت اختیار کر لئی۔

مولانا محمد لطیف زار نوشاہی، مولانا بشیر احمد قریشی تے مولانا محمد الدین کلیم دی سنگت ناظم ہو راول نوں حاصل ہوئی تے اوہناں دی ہلاشیری نال آپ نے منشی فاضل، بی اے تے ایل ایل بی دے امتحان پاس کیتے۔ ۱۹۶۹ء وِچ ایم اے فارسی کیتا، تے ایم اے پنجابی ۱۹۷۲ء وِچ کیتا۔

آپ اُچ پدھر دے نعت خواں نیں۔ گلے وِچ حدوں ودھ سوزاے۔ علامہ اقبالؒ دا کلام دُب کے پڑھدے نیں۔ پنجابی تے اُردو وِچ شعر کہندے نیں۔ نثر لکھن وِچ کمال قدرت حاصل اے۔ آپ دیاں لکھتاں وِچوں ”اولیا تے ملتان“، ”حکایات گنج بخش“، ”ابدی آوازاں“ مشہور نیں۔ صوفیا کرام دے احوال تے آثار دا مطالعہ آپ دا محبوب مشغلہ اے تے اوہناں بارے لکھنا آپ دا خاص میدان اے۔ زبان آسان تے سادہ ورتدے نیں۔ جیہڑے پاروں مضمون دا اثر دوتا ہو جاندا اے۔ ”شاہ عبداللطیف بھٹائی“، اوہناں دے ایہیہ مضموناں وِچوں اک ونکی اے۔

شاہ عبداللطیف بھٹائی

تارھویں صدی عیسوی دے اخیر تے اٹھارھویں صدی عیسوی دے مڈھ وِچ

پنجاب دی دھرتی سیاسی طور تے بد امنی تے انتشار داشکار سی۔ لوک ذہنی سکون تے دلی اطمینان لہجہ دے سن اوس سے سید وارث شاہ تے سید گلھے شاہ ورگے وڈے شاعران نے لوکاں نوں آپوں وچ پیار محبت نال بھرا بھرا بن کے رہن دادرس دتا تے رب دی عبادت دل پریریا، تاں جے اوہناں نوں ذہنی سکون تے دلی اطمینان حاصل ہووے۔ اوسے دور وچ سندھ دی سرزمین اُتے اخلاق، بھائی چارے تے انسانیت دے احترام دادرس عام کرن دی ذمہ داری شاہ عبداللطیف بھٹائی انجام دے رہے سن۔ شاہ عبداللطیف بھٹائی نہ صرف سندھی زبان دے عظیم صوفی شاعر سن، سکوں اُچ پدھر دے مفکر وی سن۔

آپ ۱۶۹۰ء وچ مٹاری (متعلوی) دے نیڑے اک پنڈ ہالاسوہلی وچ پیدا ہوئے۔ آپ دے والد شاہ حبیب بڑے پرہیزگار تے درمند انسان سن۔ اوہ بلڑی دے متعلوی بیداں نال تعلق رکھدے سن تے سندھ دے مشہور شاعر تے صوفی سید عبدالکریم ہوراں دی اولاد وچوں سن۔

شاہ عبداللطیف بھٹائی نے ہڈھلی تعلیم تے تربیت اپنے والد کولوں حاصل کیتی۔ اوہناں دی محنت دا امی پھل سی پتی شاہ ہوراں دے من وچ رب دے عشق دا بوٹا بڑی چھیتی پنکریا تے ویکھدیاں امی ویکھدیاں اک سنگھنے رکھدار وپ دھار گیا۔

شاہ عبداللطیف بھٹائی نوں سفر دا بوہت شوق سی۔ آپ جوانی وچ اپنے گھروں نکلے تے سندھ دی اک ٹکرتوں لے کے دوجی ٹکریک سفر کر کے اک لمیرے عرصے مگروں اپنے پنڈ پر تے۔

کچھ لکھاریاں نے دس پائی اے پتی آپ سفر کر دے ہوئے کابل تے قندھار تیک وی گئے پر ادب دیاں تاریخاں وچ ایس گل دا کوئی پکا پٹا ثبوت نہیں ملدا۔ آپ نے وطن پرست کے ہالادے نیڑے کرار حالار دے ساحل دے اک ٹیلے اُتے

دستوں اختیار کر لئی۔

سندھی زبان وچ ٹیلے نوں بھٹ اکھدے نیں۔ آپ دی نسبت پاروں اوہ ٹیلا
بھٹ شاہ دے ناں نال مشہور ہو گیا۔ حالے آپ بھٹ شاہ دے تعمیری کماں توں ویہلے
نہیں ہوتے سن کہ آپ دے والد اللہ نوں پیارے ہو گئے۔

شاہ عبداللطیف بھٹائی نہ صرف باکمال شاعر تے مفکر سن، سگوں اُچے تے پُچھے
انسان دی سن۔ آپ دے کلام وچ تھیں تھیں انسانیت دی بھلائی، انسانیت دی
خدمت تے برتری دا احساس اُگھڑواں اے۔ آپ اکھدے سن پئی انسان شرف المخلوقات
اے۔ ایس پاروں اوس نوں دنیا دی چنگیائی لئی چنگے تے نیک عمل کرنے چاہیدے نیں۔
آپ قول دے سچے تے عمل دے پکے سن۔ آپ جو کچھ فرماؤندے سن اوہ دے
اُتے عمل دی کر دے سن تے لوکاں نوں وی قول تے عمل دی سچائی دا درس دیندے
سن ایس لئی آپ نوں حیاتی دامنسرومی آکھیا جاندا اے۔

آپ دے کلام وچ جیہڑے عارفانہ مضمون بیان ہوتے نیں، اوہناں وچ
ایناں کو اثر اے پئی دل دیاں دنگھائیاں وچ مہ جاندے نیں تے پڑھن والے دی حالت
بدل کے رکھ دیندے نیں تے اوہ آپ دے روحانی فیض دے دریا وچ گم ہو جاتدا اے۔
شاہ عبداللطیف بھٹائی سندھی زبان دے بوہت وڈے صوفی شاعر نیں۔ آپ
رب دے سچے عاشق سن۔ آپ دی ساری شاعری ربیے سچے عشق دے جذبے وچ
ڈبی ہوئی اے۔ آپ دا ہر شعر انسانی رُوح نوں بے چین کر کے اللہ تعالیٰ دی محبت ول
کے جاندا اے۔ آپ فرماؤندے نیں:

روزے تے نمازاں وی سوہنا کم اے۔

سچے رب دی عبادت اے۔

پر اوہدا لطف ای کجھ ہو ر اے۔

جدوں دل دی اکھ نال رب دا دیدار کیتا جاتا اے۔

آپ فرماؤندے نین پئی تخلیق توں پہلوں میں کھلیاں ہواواں تے خلاواں وچ ازلی
حُسن نوں اپنی پوری چمک دمک تے جو بن وچ دیکھیا سی ہُن اوہ جلوہ ہر ویلے میریاں اکھاں
سامنے موجود رہندا اے تے میں اوس جلوے دے لُطف وچ دُبّیا رہندا ہاں لُطف
تے سرشاری دی ایہہ کیفیت میتھوں شعر اکھواندی اے۔

آپ دا ارشاد اے پئی جس دل اندر لالچ، خود غرضی، دشمنی تے کہ ودھ ہوئے تے اوہ
دل بُت کدہ اے۔ ایہناں بُتاں نوں توڑ کے دل اندر رب دی محبت پیدا کرنی چاہیدی
اے۔ جیہدے وچوں اللہ اکبر دی آواز بلند ہوئے۔ کیوں جے رب دا ذکر دل نوں سکون تے
معرفت و رکی نعمت عطا کردا اے۔

حمد کہ اں میں رہی	جس دی اُچی شان
شکر کہ اں کنج اُس دا	اوہدے کئی احسان
ظاہر باطن اوسدا	بخشتے تُو دھ گیان
مُن دامن کا پھیر توں	ادہا رکھ دھیان
پیار کرے جو اوس نوں	پاوے اوہ عرفان
اوہدے درتے میں جھکاتا	ایہودین ایمان
ذکر لطیف خداوند والا	بخشتے امن امان

ایہہ گل چٹے دن وانگوں روشن اے پئی شاہ عبداللطیف بھٹائی ہوراں سندھی زبان
تے سندھی شاعری نوں جس ٹیسی اُتے اُڑا دتا اے اوہدی کدھرے مثال نہیں لبھدی۔
آپ نے شاعری دا فن کسے مُرشد یا اُستاد کوں نہیں سکھیا سی سگوں آپ نوں ایہہ خوبی اللہ تعالیٰ
و نوں عطا ہوئی سی۔ آپ جماند رُوشاعر سن۔ آپ عام گل کتھ کرے سن تے اوہ وی شعر واروپ
دھار لیندی سی۔ آپ نے اپنی شاعری بائے آپوں آکھیا اے: ”کو کو! میرے کلام نوں صرف

شعر نہ سمجھوتے تفریح و اسامان نہ جانو، سگوں ایہہ اوہ آیتاں میں جیہڑیاں انسان دے
دل نوں اصل سلی یعنی اللہ ول لے جان دیاں نیں۔“

شاہ عبداللطیف بھٹائی دا کلام اُچے درجے دا کلام اے۔ آپ دے کلام وچ مشرقی
شاعری دیاں سبھے خوبیاں، فصاحت، بلاغت، سلاست تے جدت مکمل درجے تک
موجود نیں۔ آپ دے شعراں وچ سادگی، روانی تے تشنگی کٹ کٹ کے بھری ہوئی اے۔
ایہو وجہ اے کہ ایہاں چر گزر جان دے باوجود آپ دی شاعری اج وی اوہی ای ہر من پیاری تے
من کچھویں اے جتی آپ دی حیاتی وچ سی۔

آپ دے کلام دی اک ہور وڈی خوبی موسیقیت اے۔ آپ موسیقی دے ماہر سن۔ آپ
نے موسیقی نال بھرے قافیے، گاؤندیاں ہوئیاں ردیفال تچونویں لفظ ورت کے کلام وچ موسیقی
پیدا کیتی اے۔ سندھ وچ کوئی میلا، کوئی عرس تے کوئی تقریب اجیہی نہیں ہوندی جیہدے
وچ شاہ صاحب دا کلام گایا نہیں جاںدا۔ کئی موسیقاراں نے آپ دا کلام گاکے موسیقی دی
دنیا وچ اُچا ناں پیدا کیتا اے۔

شاہ عبداللطیف بھٹائی دی شاعری دا مجموعہ ”شاہ جو رسالو“ دے ناں نال مشہور اے۔ ایہی ونڈ
اکٹی سئراں یا راگنیاں وچ کیتی گئی اے تے بوہتیاں سئراں دے ناں سندھ دی لوک موسیقی یاں
لوک داستان دے نانواں دی مناسبت نال رکھے گئے نیں جویں سوہنی مہنیوال، مول رانو،
سورٹھ، عمر ماروی تے لیلا جینیر وغیرہ۔

شاہ عبداللطیف بھٹائی ہوراں نہ صرف آپول شاعری راہیں لوکائی دی راہنمائی کیتی اے
سگوں اپنے کئی مریداں دی انج تربیت کیتی اے پی اوہ وی سندھی زبان دے مشہور شاعر بن گئے
اوہناں وچوں تمبر فقیر تے فقیر عنایت اللہ چوڈھو خاص طور تے ذکر دے قابل نیں۔ شاہ صاحب دا
وصال ۱۷۵۲ء وچ ہويا کلہوڑا خاندان دے حاکم غلام شاہ نے آپ دا شاندار مزار تعمیر کرایا۔ آپ دی
شاعری دا مجموعہ ”شاہ جو رسالو“ دے ناں نال آپ دی وفات توں کوئی اک سو چوداں ورے بعد ۱۸۶۶ء

وِچ چھاپے پڑھیا۔ آپ دے کلام دا ترجمہ دُنیا دیاں مختلف زباناں وِچ ہو چکا اے۔ آپ
 نے دُوبجے صوفی شاعراں دا نگر دُنیا دے فانی تے عارضی ہون دا کئی تھاواں تے ذکر فرمایا
 اے تے دسیا اے پئی انسان دی حیاتی وی بے ثبات اے تے صرف رب دی ذات
 ازلی تے ابدی اے ایس لئی آپ انسان نوں دُنیا دیاں رنگینیاں توں مُوٹھ موڑ کے موت
 توں بعد سدا دی حیاتی وِچ کامیابی حاصل کرن لئی آخرت دی فکر ول پیر دے نیں۔

سوں سوں کے تُوں رات لنگھائی اکھیں ابھے خُمار
 چلن لئی تیار ہو سبھاں چلن لئی تیار
 بادبان نوں کھول کے بیٹھے دیکھتے سب یار
 دُونگھی نین پکا لے سبھ نوں جانا ایں اُس پار
 ٹٹنی کشتی وِچ دریا دے مولا لائے پار

منشیاد

آپ دا اصل ناں محمد منشاے، پر علم تے ادب دی دنیا وچ منشیادے ناں نال شہرت حاصل کیتی۔ منشیاد ہوریں ۵ ستمبر ۱۹۳۷ء نوں ضلع شیخوپورہ وچ حکیم نذیر احمد ہراں دے گھر پیدا ہوئے۔ بی۔ اے تک تعلیم شیخوپورہ وچ حاصل کیتی۔ ۱۹۶۷ء وچ ایم۔ اے اُردو تے ۱۹۷۳ء وچ ایم۔ اے پنجابی دا امتحان پنجاب یونیورسٹی توں پاس کیتا۔ روزگار دی تلاش اوہناں نوں پاکستان دے صدر مقام اسلام آباد لے گئی تے اوہ دالہ حکومت دے ترقیاتی ادارے اسلام آباد (سی۔ ڈی۔ اے) وچ ملازم ہو گئے تے آج وی اوتھے ای افسرِ اعلیٰ شکایات دے عہدے اُتے فائز نیں۔ جُہن تیکر اوہناں دے اُردو افسانیاں دے جیڑے مجموعے سامنے آئے نیں اوہناں وچ ”بندھن میں جگنو“، ”ماس اور مٹی“، ”خلا اندر خلا“ تے ”وقت سمندر وخت آدمی“ شامل نیں۔

پنجابی وچ اوہناں دیاں کہانیاں دا اک مجموعہ ”وگدا پانی“ اے۔ ایس توں اڈ پنجابی دا ماہنامہ ”لہراں“ دا منشیاد نمبر شائع ہو کے عامان تے خاصاں کولوں پسندیدگی دی سند حاصل کر چکیا اے منشیاد نے پنجابی کہانی وچ نویاں رویاں تے رُجھاناں نوں متعارف کرایا اوہ جدید پنجابی کہانی دے میدان وچ اک معتبر ناں دی حیثیت نال علامتی کہانی دے علمبردار نیں اوہناں دے موضوع ساڈی دیہاتی رتھل دے بڑے میڑے تے انسانی حیاتی دے مسئلیاں نال تعلق رکھدے نیں۔ فنی حوالے نال اوہ اک پختہ کہانی کار نیں تے کہانی دے فنی تقاضیاں نوں پوری طرحانہ جھاندے نیں اوہناں دا افسانہ ”کھوپڑیاں تے آہنے“ ماہنامہ ”لہراں“ دے منشیاد نمبر وچوں لیا گیا اے ایہدے وچ پلاٹ، موضوع، زبان تے بیان، منظر نگاری تے اخلاقی قدراں سبھے کجھ موجودے۔ ایس لئی ایہہ افسانہ منشیاد دے فنِ افسانہ نگاری دی سوہنی دنگی اے۔

کھوپڑیاں تے آہنے

پکی سٹرک توں دلیر پور اٹھ میل سی، دلیر پور جان لئی اک سویارہویں میل تپھر کول ٹانگیاں دا
اڈاسی، جیہڑا صرف ناں دا ای اڈاسی۔ اکاڈ کاٹانگہ دلیر پور جان لئی اتھوں لبھ جاندا سی، ہور
اڈے والی گل اوہدے وچ کوئی نہیں سی۔ اُنج شاموں پہلاں ایتھے کجھ بساں تے لیہن چڑھن
والیاں دی وجہ توں رونق ہو جاندا سی، پر شام دا ہنیر اکھنڈ دیاں ای ایہہ اڈا چار پھیرے دی
اجاڑ دا اک حصہ بن جاندا سی۔

اوہنوں ایہہ وی دسیا گیا سی پی اوہ شام توں پہلاں پہلاں ایتھے اُپر جائے، نہیں تے
دلیر پور دا کوئی بندہ جیہڑا اوہنوں لین آیا ہووے گا شاموں کچھ اوہدی اڈیک دچ بیٹھا نہیں ہووے گا۔
اوہنے شاموں پہلاں پہلاں اپرن دی کوشش تے کیتی پر بس خراب ہو جان دی وجہ توں
چنگی بھلی کوئل ہو گئی تے اوہو گل ہوئی جیہڑا ڈر سی۔ جدوں اوہ دلیر پور جاوَن والی کچی سٹرک دے
کنڈھے اُجاڑا ڈے تے اُتریا، شام دا ہنیر اگوٹھا ہو چکیا سی تے او تھے بندہ نہ بندے دی
ذات سی۔ اوہنے ایدھر اودھر دھیان ماریا تے ہر پاسے ہنیرا تے چُپ داراں سی۔ اوہ بڑا پریشان
ہویا۔ ہنیرے وچ لگیا ہویا تے گھٹے نال بھریا ہویا اٹھ میل دا پنڈھ ہُن اوہنوں پیدل کرنا پینا سی۔
خورے دلیر پور دے نمبر وار نوں اوہا خط نہیں سی ملیا یاں خورے اوہ لوکیں آئے ہون تے
اڈیک کے پرت گئے ہون۔

پیدل چلن تے سامان چکن دی اوہنوں پرواہ نہیں سی، جے راہ وچ لٹیاں جان دا
ڈر نہ ہوندا۔ اوہنوں دسیا گیا سی پی ایس علاقے وچ چوریاں تے ڈاکے عام سن تے راہیاں
پاندھیاں نوں لٹ لینا نت روز دی گل سی۔ راہیاں بساں تے سواریاں لے لٹیاں جان دیاں
خبراں اوہ اخبار وچ وی پڑھدا رہندا سی تے اوہدی سمجھ وچ کجھ نہیں سی آرہیا پی اوہ کبہ
کرے۔ اوہنے اٹھی کیس سٹرک دے اک پاسے رکھ دتا تے میل بُرجی نال ڈھولا کے ٹرانس سٹروں

خبرائے نمن لگ پیا۔ خبرائے سندیاں سندیاں اوہنوں شہردیاں بتیاں، جگمگ جگمگ کر دے
 بازار تے گاؤندیاں، گنگناؤندیاں تے وسدیاں گلیاں یاد آئیاں۔ اپنا گھریا دیا۔ گھرے کوئیں یاد آئے
 ابے ہوئیں شام دی نماز پڑھ کے آگئے ہون گے۔ نومی اوہناں واسطے روٹی لیا رہی ہوئے گی۔
 حمید سکول داکم کر رہیا ہوئے گا۔ فیر اوہنوں اوہ یاد آگئی۔ آکھن لگی: ”میں تے تیرے نال نال آں۔“
 اوہنے آکھیا: ”جا پرت جا۔ میرا پینڈا کھوٹا نہ کر۔ تینوں نہیں پتہ، میں اندروں ابے کچا پلا
 آں۔ مینوں ابے ہو راگ دی لوڑاے تے توں کیوں آگئی ایں۔ پرت کیوں نہیں جاندی؟“
 فیر اوہنوں ہوٹل تے بیٹھے پاریلی یاد آئے۔

مجلس لگی ہوئے گی، ہوٹل دی میز تے مُکے مار مار کے اوہ مزدوراں، کساناں تے محنت کشاں
 دے مسئلیاں تے گرم گرم بحث کر رہے ہون گے کبیر پتہ اوہنوں وی یاد کر دے ہون۔ شہر دی
 آرام والی زندگی چھڈ کے اوہنے پنڈاں دے لوکاں دی خدمت دے کم دا جیہڑا عملی طور تے قدم
 چکھیا اے، کنڈ پچھے اوہدی تعریف کر دے ہون گے۔ اوہناں دا خیال آؤندیاں ای اوہ خوشی
 تے وڈیائی دے جذبے نال ہن پیا۔ فیر اوہنے سڑک دے کنڈھے دے رُکھاں اُستے لکدے
 ہوئے آہلنے دیکھے تے اوہنوں انج لگا جویں ایہہ چڑیاں دے آہلنے نہیں بندیاں دیاں
 وڈیاں وڈیاں کھوڑیاں لک رہیاں نیں۔ اوہنے اپنی کھوڑی نوں ٹوہ کے دیکھیا۔ اوہ اوہدے نال
 ای سی۔ وڈیائی دے احساس نال اوہدی دھون اُچی ہو گئی تے فیر اک سو یا رہویں میل دی بُرجی دے
 آلے دوالے کھلایا ہویا ہنیرا دیکھ کے آپوں آپ نیویں ہو گئی۔

پنجویں یاں چھیویں رات داچن پھکا پھکا ہاسا ہس رہیا سی۔ سڑک دے کنڈھیاں تے کابلی
 ککر، ٹاہلیاں تے آہلیاں والے رکھ سہے کھلوتے سن ڈوڈو آں، بینڈیاں تے ترڈیاں دیاں رلیاں
 ملیاں آوازاں چپ دے سنگھ وچ پھس گئیاں سن۔ خولے کوئی بس آجائے تے دلیر پور جان دا
 کوئی ساتھ لہجہ جائے۔ سدھردا کوٹھینا چمک رہیا سی۔ سڑک اُجاڑ رات توں ڈور دی ماری دھرتی
 دے سینے نال چڑی ہوئی سی۔ تے اکاؤ کا بساں تے ٹرک گواچی ہوئی سڑک دا کھڑا کڈھ دے پھر دے سن۔

کے ٹرک بیاں بس دیاں تیاں دا چانن آتش بازی دے چانن وانگوں آکے ٹر جاندا تے میل پھرے
اک سو یاراں دے تنے ہندے میل پھرتوں دکھ ہو کے سڑک دے کنڈھے تے کھلو جاندا تے
ویکھدیاں ای ویکھدیاں ترن نقاب پوش ڈاکو بن جاندا، جیہڑے کسے بس نوں لٹن لئی ہتھیار بندھ
کے کھلوتے ہوں۔ اک واری اوہا جی کیتا پئی اوہ کسے وی پاسیوں آون تے کسے وی پاسے جاون
والی بسیاں ٹرک وچ سوار ہو جائے تے سڑک دے نیڑے کسے وتی یاں پنڈ وچ رات گزار
کے اگلے دن دلیر پور چلا جائے۔ پر ایہ خیال آندیاں ای ہوٹل دی میز تے بیٹھ مکے مار مار کے
بچھاں کر دے ہوئے اوہ سائے تاوڑیاں لا کے بن لگ پئے اوہناں اوہنوں سمجھایا سی پئی
چاننیاں سڑکاں چھڈ کے ہنیریاں گھٹے بھریاں راہواں تے ٹرنا بڑی اوکھی گل لے اوہناں نے
ہور وی کئی طرحاں دے اندیشیاں دا اظہار کیتا سی۔ پر اوہ گل تے اڑیا رہیا۔ اوہ بناوٹی، مشینی تے جھوٹی
زندگی دی جھولی وچوں بکل کے کھیتاں تے پیلیاں وچ سچی تے اصلی زندگی دا مونہہ دیکھنا چاہندا سی
تے اپنی ایس سدھرنوں پورا کرن لئی وڈی توں وڈی قربانی دے سکدا سی۔ اوہ پنڈاں دی دستوں ،
رہت بہت تے ثقافت نوں نیڑیوں دیکھنا، علم دے چانن تے دکھ سکھ دی اکوجھی ونڈ کرنا چاہندا
سی۔ ایسے لئی اوہنوں بالغاں دی تعلیم دے سلسلے وچ دلیر پور جان دا موقع ہتھ آیا تے اوہنے اوہناں
دی مخالفت دی پر واہ کیتیاں بغیر باں کر دتی۔ اوہ تے ایناں خوش سی پئی اوہا جی کر داسی کہ سائے شہر
دا چانن لے کے اڈ کے پنڈ پہنچ جائے۔ اوہ پنڈاں بالے بڑیاں امیدیاں تے سدھراں رکھدا سی تے
کہانیاں، فلماں، روایتاں تے لوک تماشیاں دا جالا بٹھا کے مینڈو ریتل دی سچی تے پاک صاف تصویر
اپنیاں اکھاں نال دیکھنا چاہندا سی۔ اوہ نہیں چاہندا سی شہر دے آرام آسائش دا کوئی خیال اوہا
راہ ڈکے یاں کسے طحال دا خوف یاں دوسرے ادبے دل یاں دماغ وچ سمائے۔ پر خوف کپڑیاں
اُتے جمی ہوئی دھوڑ نہیں ہوندا کہ اوہنوں جھاڑ دتا جائے۔ خوف دا جالا ہتھ نہیں آوندا پئی اوہنوں
دلہیٹ کے اک پاسے سٹ دتا جائے۔ خوف تے ڈر بندے دے اندر اگ والے تے فیر نیلی
دھار طحال پوے جُستے نوں جکڑ لیندا لے۔

اک سویار ہوئیں میل دی بُرجی کول کھلوتیاں او بنے اپنے جُٹے دے چار چھیرے کھلری
 ہوئی نیلی دھار نوں اپنے ارادے دی داتری نال ترنڈیا تے اُچھی کیس چُک کے دلیر پور جان والی
 کچی سڑک تے چل پیا۔

سڑک دے دوہاں پاسے اُچے اُچے شاں شاں کر دے رُکھ، بندیاں دیاں کھوڑیاں ہار
 کنبدے ہوئے آہنے تے شوکدیاں جھاڑیاں سن۔ مُنجیاں دیاں پانی بھریاں پِلیاں سن ہوا وچ
 گھٹے تے منجی دی خوشبو تے پِلیاں وچ پانی دی ہواڑ رل ہوئی سی۔ کدی کدی ہنیرے وچ ڈُبے
 ہوئے پنڈاں توں کتیاں دے لڑن، مجھاں دے ڈکران تے کھوتیاں دے منکن دیاں آوازاں سُنیادیاں
 سن۔ اوہ راہ دے گھٹے اُتے اپنے پیراں دے ٹھپے لاند اہویا اگا نہہ دودھ رہیا سی۔ خوف دے
 بھوتنے اوہدے پیراں تھلے آکے مدھولے جارہے سن۔ ہنیرے نال جان بچپان ہو جان پاروں
 اوہدے دیکھن دا بت مُطہرا ہو گیا سی۔ جے ایس ویلے اپن چیت اوہنوں شہر دیاں جگمگ
 کر دیاں ڈھیر ساریاں تیاں دے سامنے یا کے کھلار دتا جاندا تے چانن نال شیت اوہریاں
 اکھاں پاٹ جاندیاں۔ اوہنوں جگنو تاریاں وانگ تے تائے ہتھ وچ پھڑپھڑیاں ہویاں مثالال
 ہار معلوم ہوندے۔

اچان چُک اوہ ٹٹھمب گیا۔ خوف دی اک لہر آئی تے اوہا جُٹہ بھیسوں گئی۔ اوہنے دیکھیا
 پی کالاسیاہ اک سپت جھلی کھلار کے گنڈل ماری بیٹھاسی۔ اُنج تے اوہنے کئی واری سپ دیکھے
 یاں محسوس کیتے سن۔ سپاہیاں، مداریاں تے آستیناں دے سپ۔ کئی واری اوہنوں ایہہ وی
 جاپیاسی پئی سدا توں کوئی نہ کوئی نکاموٹا سپ ہر ویلے اوہدے آلے دوالے پھردار ہیا سی تے
 کدی کدی اوہنوں اُنج وی جاپیاسی پئی اوہنے ہمیشہ توں اک دو مونہی سپنی دیاں دودیں دھوناں
 دوہاں ہتھاں وچ پئیاں ہویاں نیں۔ پر ایہہ سالے کھوڑیاں وچوں نکلے ہوئے سپ
 تے سپنیاں سن۔ آبلنیاں دی جوہ داسچی مچی دا کوڑیاں والا سپ دیکھ کے اوہدے نوں کنڈے
 کھلو گئے۔ اوہ دل ڈاڈھا کر کے اگا نہہ لنگھ گیا۔ پر خوف اوہدے پچھے پچھے کالاسیاہ ناگ بن کے

ٹُردا آیا۔ اوہنے مڑ کے تکیا تے اوہرے پچھے ہنیرے تے گھٹے توں اڈ کجھ نہیں سی فیر وی اوہنوں انج جا پد اسی پی کوئی کوئی گولی شے ہُنے ہُنے اوہریاں ٹنگاں نوں چمڑ جائے گی۔ ایس خوف دے عذاب توں بچن لئی اوہنے پرت کے اُچی ساری آکھیا۔

”میں تیرے کولوں نہیں ڈردا“

اوہدی آواز دے نال ای اوہرے ذہن وچ کُنڈل مار کے بیٹھا ہویا خوف کنج لاہ کے ہنیرے دی کھڈ وچ لک گیا تے اے اوہ خوشی، خوف تے جت دے جذبیاں دامڑھکاوی نہیں سی پونجھ سکیا کہ اوہ اکھرا نپدا، گھٹا اڈاؤندا تے نسا اک گھوڑا اوہرے کول آگیا۔ گھوڑ سوار نے اُچی ساری کھڑی آواز نال پھپھیا۔

”کیہڑا ایس؟“

”میں دلیر پور جانا ایس۔ شہروں آیا ہاں۔“

”تیرے کول کیہ کجھ اے؟“

خوف دیاں کئی سجریاں لہراں آئیاں تے کسی تر کھ تیر فجے تے اوہا جُتہ و نہ گئے۔ اوہنے دیکھیا سوار دا ادھا چہرہ منڈا سے وچ لکھیا ہویا سی تے اوہرے ہتھ وچ بندوق سی۔ اوہنے بولن دی گوشش کیتی پر آواز اوہرے سنگھ وچ پھس گئی۔ اوہنے چھیتی نال گھڑی لاہی تے بوجھے وچوں نوٹ کڈھ کے آکھیا۔

”میرے کول ایہو کجھ اے یاں فیر ایہہ ٹرانسٹر اے“

”ایچی کیس وچ کیہ اے؟“

”کپڑے تے کتاباں“ اوہنے موئی ہوئی آواز وچ جواب دتا۔

”کیہرے دل جانا ایس؟“

”اصل وچ میں تعلیم بالغاں دے سلسلے وچ“

”ہچھا ہچھا..... میں سمجھ گیا ہاں۔“ نقاب پوش نے آکھیا تے فیر گھوڑے توں اتر

کے اوہرے ول ودھیا۔ بندوق دی نالی اوہرے ول سِدھی سی۔ خوف نال اوہریاں لتاں
 کنبن لگ پیاں۔ نقاب پوش نے آگے ودھ کے اٹھی کیس پھڑلیا تے آکھن لگا :
 ”تیں سوار ہو جاؤ۔ تیں تے ساڈے مانی باپ او۔“

ارشدمیر

ارشدمیر ۶ جون ۱۹۳۲ء نوں لاہور وچ پیدا ہوئے۔ آپ دے والد میر عطا محمد ٹھیکیداری کر دے سن۔ ارشدمیر نے لاہور وچ تعلیم حاصل کیتی۔

۱۹۵۶ء وچ ایل ایل بی دا امتحان پاس کیتا۔ غیر گورنوالہ وچ وکالت شروع کر دتی۔ وکالت دے نال نال تصنیف تے تالیف دا شغل وی جاری رکھیا۔ آپ نے اردو تے پنجابی وچ مزاحیہ نظماں تے سنجیدہ نثر وی لکھی اے۔ خاص طور تے آپ دے انشائیے تے سفر نامے بوہت مقبول ہوئے۔ پنجابی وچ آپ دے انشائیاں دی کتاب ”چو بھڑاں“ بوہت مشہور ہوئی۔ آپ دے کجھ سفر نامے مختلف رسالیاں وچ وی چھاپے چڑھن۔ آپ دا اسلوب نوں کلا تے شگفتہ اے۔ اپنے آل دولے اُتے ڈونگھی نظر رکھ دے نیں۔ تحریر وچ اکھان، محاورے تے روزمرہ خوب ورتدے نیں۔ گل گل وچوں مزاح پیدا کر لیندے نیں تے ہر بندے نوں ہساؤن دافن جان دے نیں۔ آپ نے ۱۹۹۲ء نوں گوجرانوالہ وچ وفات پائی۔ لندن دے ٹیوب ٹیشن آپ دا دلچسپ سفر نامہ اے، جیہڑا رسالہ ”پنجابی ادب“ وچ چھپ چکا اے۔

لندن دے ٹیوب ٹیشن

لندن دی انڈر گراؤنڈ ریل نوں عام لوک ”ٹیوب“ اکھدے نیں۔ ٹیوب نوں اساں ڈٹھا تے بھانویں پچھلے ورھے ای اے پر اسیں ایہدے جاتو ڈھیر پُانے ساں۔ دوجی وڈی جنگ چھڑن توں کجھ چر پہلوں میرا اک بھنیواں ولایت پڑھن لئی گیا۔ جدوں جنگ دی نہری جھل پئی تے فیر ساڈے سارے انگاں ساکاں دی خانیوں گئی۔ اوہدوں حالی رت

نے چٹیاں نہیں سی پھڑی تے خون دیاں رشتیاں اُتے جان وارن توں وی دریغ نہیں سی کیتا جاندا۔ ایس لئی میرے بھئیویں بارے ہر کوئی پریشان سی۔ اوس زمانے وچ ٹیلی فون، راٹی کیناں دے وی گھر میں نہیں ہوندا سی۔ ایس لئی وگا تگ تے دبا سٹ خطاں تے تاراں دی لام ڈوری ضرور لائی گئی، جیہدے جواب وچ اک مڑیا تڑیا پوسٹ کارڈ رُلدا کھلدا آیا تے فیر جیناں دے ساہ وچ ساہ آیا۔ میرے بھئیویں عامر نے لکھیا سی۔

”بھرن فل تیاریاں وچ نیں۔ جدوں وی لندن اُتے بمباں دامینہ دسایا جاندا اے۔ اوس سہے انج لگدا اے جوویں جہازاں نے بوڑھ وانگر گوڑھی چھاں کر دتی اے۔ پر حالی تیکر بھرن پورا ٹل لا کے وی انگریزاں دا کچھ وگاڑ نہیں سکیا۔ کیوں جے لندن دے وٹنیک خطرے دا گھگھو و جیدیاں ساراں یڑے یڑے دے ٹیوب ٹیشناں تے جا پُجے نیں۔ ایہناں ٹیشناں اُتے ہر شے مل جاندی اے تے بھانویں کوئی کتاں چر ٹکنا چاہے، محمدی بستر وچا کے تھلا مار کے ٹک وی سکدا اے تے جدوں خطرہ ٹل جاند اے فیر ایہناں گھر نیاں وچوں پال راہیں بڑے ڈسپلن نال نکل کے اپنے کماں کا جاں وچ رُجھ جاندے نیں۔

اوس ویلے تے خیر ایہہ گل سمجھ نہ آئی پر جدوں دوجی وڈی جنگ دارو لا گولا مکتا تے اوہوں ایہہ وی پڑھن سُنن وچ آیا کہ انگریزاں دے جنگ جتن وچ لندن دے ٹیوب ٹیشناں دا وی چنگا بھلا ہتھ اے۔

ایہہ تے ایویں وچکار اکھوتر گل آ گئی اے، کہن دا مطلب ایہہ سی پتی جڈں پچھلے ورھے رب نے لندن جان دا سر بندھ بنایا تے ٹیوب ٹیشن دیکھن دی سدھڑیوں سریوں مَن وچ جاگ پئی۔ میرا جی ہر ویلے ٹیوب دیکھن تے اوہدے راہیں سیر پاٹے لئی اڈدار ہندا سی، ایس لئی جڈوں میں پہلی داری ٹیوب دیکھی تے حیران

رہ گیا۔ واقعی اک نواں عجوبہ سی۔ میرے بھٹیویں عامر نے آکھیا: "مائے ہوہیں
تے لسدن دی انڈر گراؤنڈ ٹیوب دیکھ کے ای بونٹل گئے نیں۔ جے کر فرانس
دی ربرٹ دے پھیتے والی تے امریکہ دی نویں ڈھنگ دی ٹیوب دیکھ لین
تے قیر خورے منجی بستر ای او تھے ڈاہ بہن گے۔"

جدوں مینوں ایس گل دا پتہ لگا، میں عامر نوں گوڈے مڈھ بہا کے دیا کہ جدوں میں
ہنگا جیہا ہوندا ساں تیرے داد کے پنڈ وڈا لے سندھواں توں اک منڈا جہانا گھر دے کم کاج
لتی منگوا یا سی۔ جیہڑا روز دیہاڑے ساڈے گھروں گڈی دیکھن لئی گمٹھ کر جانداسی۔
اک دن میں اوہرا پچھا کیتا۔ اوہ ریل دی پٹری نوں پڑ پڑو کیجدا جابارہ یا سی۔ قیر جدوں
گڈی آئی تے اوہ دیاں واچھاں وچوں ڈلھ ڈلھ ہاں پایا وگداسی۔ گڈی لنگھ گئی تے اوہنوں
خرچن لئی جیہڑا پیسہ ملیا ہو یا سی اوہنے اوہ لہن توں چکیا۔ اوہ چنگا بھلا بھلا پیا بن گیا ہو یا سی۔
اوس پیسے تے جارج ششم دی تصویر ہون دی سی۔ میں جہانے دی تلاشی لئی تے اوہدے
بوجھے وچ ایہو جیہے کئی ٹھپے سن، جیہڑے اوہ مینوں بڑے مان نال دکھارہ یا سی۔
میں گھر آ کے دسیا تے اوس غریب نوں چنگی بھلی پھینٹی لگی۔

پر ارج میں جدوں کہے ٹیوب ٹیشن تے آؤناتے جاناں ہاں، میراجی کر دا اے
جہانا میرے کول ہووے تے میں اوہنوں شلنگ دے کے اوہدے ٹھپے ہوا کے
اوہدے بوجھے وچ پاندا جاں تے اوہدے سلمنے ایس جرم دا اقرار کراں جے واقعی
لنگھ دی گڈی نوں پہلی واری دیکھ کے میرے جذبے وی کچھ اوہدے نال رلدے رلدے
نیں۔ تے پتر چتھوں تیک تہاڑیاں کاراں دا تعلق اے اوہ تے ساڈے کول وی ہر ویلے
ہتھ ٹھوکے لئی ہے ای نیں۔ پاکستان وچ کاراں دی کوئی تھوڑ نہیہیں۔

ہر مالدار سامی، فراڈیا، بلیکیا، سمگلر، ایتھوں تیک کہ کسے ملے تو تازہ تازہ مویا ہووے
یا انعامی بانڈ منکل آوے، اوہ سب توں پہلاں پرانے رسیاں وانگہ ہاتھی دی تھاں

بُو ہے اگے کارامی لیا کے کھلاروا اے۔ پاکستان بنن مگروں جتناں مال اساں کارامی
خرید اُتے بکریاں کیتا اے، جے کر کے ڈھنگ دے کم اُتے خرچ کر دے تے ہُن
سانوں ستے خیراں سن۔

پراسیں ایہہ کار دے حوالے نال کیہہ بیکار دیاں گلاں چھوہ بیٹھے آں۔ گل کتھ
تے ٹیوب رانی دی ہو رہی سی، جیہنوں اپنے اڈے یعنی ٹیوب ٹیشن تے چل دیاں دیکھ
کے انگریزاں دی مہا استادی تے پیر کار گیری اُتے دلوں وجہوں ایمان لیا ونا پیہہ جاندا اے
کیوں جے گڈیاں تے ساڈیاں ریل کاراں نال امی رل دیاں ملدیاں نیں۔ ایویں دو ترے ڈے
ودھیک لادیندے نیں یا فیر ایہناں بھاگاں والیاں دے بُو ہے آٹومیٹک نیں، جیہہ ہڑے
سواریاں لاہ کے اپنے آپ بند ہو جان دے نیں تے ہر ٹیشن تے کسے نوں کھچل دتیاں بغیر
خود بخود کھل کے اندر لیاں سواریاں توں بنے ٹور کے باہر دیاں نوں ”جی آیاں نوں“ کہندے
نیں۔ ایہناں ٹیوباں داسارا سسٹم کمپیوٹرائزڈ اے۔ پر مجال اے کدی بھید و آں وانگر
آمنے سامنے مگر لگی ہووے۔ البتہ کدی کدھار سنگل دا بھلیکھا کھا جان دجیوں پھیلی ٹیوب اگلی
جاندی ہوتی ٹیوب نال کھیہ جاندی اے۔ پر انی غلطی نوں دی اگلے نہیں بخندے تے اخباراں
توں لے کے ٹی وی تیک کا کورولا پیہہ جاندا اے۔

ایہہ ٹیوباں بڑی شان نال بجلی راہیں چل دیاں جاندیاں نیں پر اصلی تے وچلی مان یوگ
گل ایہہ نہیں، اوہ تے ایہہ وے کہ ایہناں نوں بھمیری وانگوں چلایا جاندا اے۔ اسیں ایتھے کے
سرکس یا نمائش وچ کسے جوان نوں موٹر سائیکل موت دے کھوہ وچ چلاؤندیاں دیکھ لیتے
تے عیش عیش کراٹھن آں۔ ایہہ منظر دیکھ کے بالال دے تے لوں کتڑے کھلو جاندے نیں
پر دھن ایہناں ولانتی صاحبان دا جگر اے، جیہناں کئی کئی موت دے کھوہاں جتنی ڈنکھیاں
وچ چلے کہ ایہہ ٹیوباں ٹھہریاں نیں۔ مثال دے طور تے پکا ڈلی ڈائیشن کوئی ساڈے
کو چار سو فٹ ہیٹھاں تیکر پٹیا گیا ہو یا اے۔ فیر کجھ تھاواں توں دیریاں تے سیمز توں وی تھیلوں

ٹیوب نوں لے جا کے اپنی پیرکاریگری دے جھنڈے گڈ دتے ہوئے نیں۔ ایہوای نہیں
 سگوں ٹیوب ٹیشن تے دُولی آؤن جان داے مسافراں لسی بجلی نال چلن دا بیاں لوہے دیاں
 پوہڑیاں (ایکسلریٹر) پتیاں چکر کڈھ دیاں دسدیاں نیں۔ لفٹاں وی بندے تے سامان
 ڈھون واکم کر دیاں نیں۔ ایس توں اڈ عام پوہڑیاں یاں لم سلے راہ (Sub Way)
 مسافراں نوں بنے داراہ دکھاؤندے نیں۔ کمال ایہہ دے پتی تہانوں ہر تھاں ٹھنڈی تے
 نروٹی ہوا دے بٹھے نال نال ٹر دے پھر دے، آؤندے جان دے ون سوتیاں لپٹاں
 تے طحاں طحاں دیاں خوشبوآں دا لورا ای نہیں آؤندا سگوں کئی واری کوئی زنانی اپن
 چیمٹ ٹکرا کے سوری (Sorry) وی آکھ جاندی اے۔ فیر کئی تھانواں تے ہوا دایتاں کو
 زور تے ٹھککا ہوندا اے کہ وال بھانویں کیہڑے لوشن یا کریم نال تھاں سر ٹکائے پھبائے
 ہون۔ ایویں کھلے پکھ جاندے نیں۔ حیرانگی دی گل ایہہ دے پتی ایہناں ٹیشن تے
 پورا عملہ اپنیاں پھرتیاں دکھاؤندا جا پدا اے۔ تئیں ٹکٹ لے وی لوؤ، بھل بھلیکھے
 چیکنگ نہ وی کرن، اگے ٹکٹ بیر تہانوں ڈکا پالین گے۔ ٹکٹ او تھے لگی مشین وچ
 پاؤتے فیر ٹافٹ جان داراہ کھول دین گے۔ ٹکٹ وصولن والے وی بڑے کانے نیں
 چو کھے افریقی نیں۔ ٹانویاں ٹانویاں زنانیاں وی نظریں پنے جاندیاں نیں۔ ٹکٹاں دی اگراہی
 کتاں خاص خیال رکھیا جاند اے ایہدا تھوڑا بہت تے پتہ ہے ای سی، پر صحیح چانن اوس
 دیہاڑے ہویا جدوں گرین وڈیشن تے اگ لگ گئی۔ دیکھدے ای دیکھدے چنگی بھلی
 بھسٹوری پنے گئی۔ لوک وکاتک بھجن لگ پتے تاں جے چھیتی توں چھیتی پلاننگھاں پٹ کے بنے
 نکلن، پر او تھے ٹکٹ کلکٹراں تے انپکٹراں اپنی آئی تے آکے ٹکٹاں دی چچھ کچھ شروع
 کر دتی جیہدے پاروں بڑا احتجاج ہویا۔ حکومت سیانی اے، اوہنے نال ای ہتھیار
 سٹ دتے۔ کدھرے گل دا گلاہن ای نہ بن جائے۔

اگلیاں ریکھ لا کے ٹیوب ٹیشن بنائے ہوئے نیں۔ فیر ایہناں دے پلیٹ فارم

دی دُونہ توں لے کے باراں تیک ہین۔ ونگی لئی لیور پول ٹیشن جیہڑا لندن وِچ اے، اوہدے درجن کو پلٹ فارم نہیں۔ ایہہ اوہ پاسا اے جیہڑی دوجی لام وِچ بڑی تباہی تے بربادی ہوتی سی۔ حالی تیکروی ایٹھے کئی عمارتاں سڑیاں بلیاں تے ٹٹیاں بھجیاں مکھالی دیندیاں ہن۔

ایہناں پلیٹ فارماں تے گڈیاں دے کراس دی عام ہوندے نیں۔ فیر منٹاں سیکنٹاں وِچ کنیاں ای گڈیاں آوندیاں جانڈیاں نیں، پر مجال اے کہ ہرے تہا توں گندگی تاں دی کوئی شے دکھالی دے جاوے۔ ایس لئی کہ ہر شے کھاپی کے ڈبے وِچوں بے وگاہ نہیں مارے، سگوں بڑے حساب کتاب نال ردی دی ٹوکری (Dust Bin) وِچ سٹن دا آہر کر دے نیں۔ تھان تھان بالاں لئی کنفی کشنری مشیناں فٹ نیں، جیہناں وِچ بال کچھ پینیاں پاکے اپنی پسندیاں چیزاں کڈھ کے کھان ول جُٹ پیندے نیں۔ اک ہور گل گوہ گوچری جاپی سی بال ایسے کوٹریڈ نیں کہ ساڈیاں کا کے کاکیاں وانگر ایویں ای روندے، اڑی کر دے یا بھنڈی نہیں پاؤندے، سگوں ہمدے کھید دے تے گھدے ای رہندے نیں۔

پلیٹ فارماں اُتے ون سونیاں کمپنیاں دے اشتہار وی کندھاں اُتے لکھتاں راہیں یا سائن بورڈاں تے بڑے پھباویں سٹائل وِچ نظریں پیندے نیں۔ ونگی لئی اک سیر سپاٹے کران والی کمپنی دا اشتہار سی۔ ایتوار (چھٹی والا دیہاڑا) نوں گھر بیٹھے رہنا گناہ بربرے۔ ایس لئی بنے نکل کے خدا دیاں قدرتیاں دا تماشا دیکھو۔

اشتہاراں دا پراگا گڈی دے اندروی مُفتو مُفتی بل جاندا اے۔ اوٹھے لوکاں دی دا ساڈے والا حال تھوڑا اے۔ اوہ گھڑی پل دی ضائع نہیں کر دے سگوں ایہناں اشتہاراں نوں بڑی پنہ لاکے پڑھدے نیں یا فیر گڈی دے رُوٹ نوں جیہڑا ہر ڈبے وِچ بڑے پُچھے تے سوہنے انداز وِچ نقشہ بنا کے ظاہر کیتا گیا ہوندا اے، بڑے گوہ نال پڑھدے نیں۔

اک ہو رنویکلی گل اسے پی ہر رُوٹ تے کئی کئی قسماں دیاں ٹیوباں چل دیاں نیں۔
ایہناں دی شناخت ڈبیاں دے رنگاں تے لیکھاں توں آسانی نال ہو جاندی اے۔
ایہہ گنتی وچ حسابی فارمولے مطابق اک اک تے دو یا راں نیں بلکہ سچی مچی دیاں یا راں
نیں۔ جیہناں دیاں بٹیاں بہا راں نیں۔ ایہناں لائیناں وچوں پکا ڈلی لائن نیلے رنگ،
سنٹرل لائن لال رنگ، سرکلر لائن پیلا، ڈسٹرکٹ لائن سبز، وکٹوریہ فیروز دی رنگ دی
اے۔ ایہہ ٹیوباں تیزوی چل دیاں نیں پر دھوڑاں نہیں پٹ دیاں۔ دھوڑ، دھوڑاں تے
چکڑ دا دور دور تیکر ناں نشاں وی نہیں ملدا۔ پکا ڈلی میل دیاں گڈیاں انسی کلومیٹر تے
ڈسٹرکٹ وانگر دیاں گڈیاں دی کوئی اٹے سٹے چالیکہ کلومیٹر فی گھنٹہ رفتار ہوندی اے۔
رفتار دی گل تے خیر کوئی اچرج نہیں، اصل مسئلہ تے اوس بھارو دالے جیہڑا پہلی وار
ایہدے ہونے لیندا تے بھڑکتے تھلے ایسی ڈونگھائی وچ ٹیوب نوں چل دیاں ویکھ کے
بوتل جاندا اے۔ پڑھیا لکھیا بندہ تے ڈبے وچ اُلیکے ہوئے نقشے یاں ٹیوب بارے
چھاپے چڑھے کتابکے راہیں تھوہ ٹکانے تے اپڑ جاندا اے، پر چٹے آن پڑھ وی
دو تہہ چوتہہ پھیریاں نال ای چنگے پھلے کانٹے ہو جاندے نیں۔ ایہناں ٹیوباں وچ ہر
کوئی حال مست دکھائی دیندا اے حد ایہہ وے پی اخبار یاں کتاب دی اپنی خرید کے پڑھن گے
مجال اے ساڈے وانگر کوئی کسے دوجے دا اخبار یا مانگوں کتاب پڑھے۔ ذرا خبر پڑھن
والیاں دا ذوق وی دکھرا دکھرا ہوندا اے تے تیس ایویں اکو نظر نال اسی جان لیندے
او کہ بندہ حکومتی پارٹی دا حمایتی اے یاں مخالف دھڑے نال تعلق رکھدا اے۔
انگریزاں نوں ہساؤنا تے خیر بڑا دکھاتے کو لڑا کم اے۔ اوہ تے اک دوجے نال کوئی
گل وی نہیں کر دے۔ (خورے نکلے ہون دیاں ایہناں دے تند دے اسی نہیں کٹواتے
جانداں) یا کچھ پڑھدے ہون گے یاں فیر چپ چاپ بیٹھے رہن گے۔ ایہناں ٹیوباں
وچ کوئی فرنٹ سیٹ نہیں ہوندی تے نہ اسی سامان رکھن لئی کوئی بندوبست کیتا گیا ہوندا

اے ٹکٹاں دی دی درجہ بندی نہیں کیتی گئی۔ اکے ٹل دے ای ٹکٹ ملدے نیں۔ سوکے
دس وجے توں شام دے چار وجے تیکر یاں چھٹی والے دیہاڑے ٹکٹاں وچ چنگی بھلی چھوٹ
دتی جاندی اے۔ ریڑن تے سیزنل ٹکٹاں دا وی رواج اے۔

بڈھے ٹھیرے تے معذوراں نوں "بارو" ولوں بساں تے ٹیوباں دے مفت ٹکٹ
بنواکے دتے جاندے نیں۔ ایہہ "بارو" ساڈی میونسپل کمیٹی ورگا ادارہ اے۔ معذوراں،
بیماراں تے وڈیری عمر دے بندیاں لئی خاص سیٹاں ہرڈے وچ ہونداں نیں تے جے
کوئی زناانی یا مار کو سواری آجاتے تے فٹاٹ اوستوں سیٹ دے دتی جاندی اے۔

ٹیوب عام طور تے خراب نہیں ہوندی تے جے ایہو جیہا گٹر چل جاتے تے
منٹاں سیکٹاں وچ دوجی ٹیوب آکے او سے ٹکٹ تے سواریاں چک لیندی اے۔ اک
داری اک ٹیوب ٹیشن تے ساڈی گڈی کھلو گئی۔ اسان سمجھیا پئی بھانویں گڈراں دا جتے ویلا
آگیا اے، بھانویں ایہے ای کھلوتیاں ساری دیہاڑی گل ہو جاتے۔ حالی ایہناں دلیلاں
وچ ای سال جے دوجی ٹیوب دے آؤن دا اعلان ہو گیا تے اسیں کجھ چرگروں اپنی منزل
تے جا پڑے۔

لندن دے ٹیوب ٹیشن دا مڈھ آج توں چوراسی ورھے پہلوں بجھاسی۔ ادہ
ملکہ وکٹوریہ دا دور سی۔ اوس سمسے ٹیوب دے تیراں ٹیشن سن، جیہڑے ہن ودھدے ودھدے
دو سو پچھتر ہو گئے نیں۔ کجھ چر پہلاں ہتھرو ہوائی آڈے دا ٹیشن وی بن گیا اے۔ جیہدے نال
دو بجے ملکاں دے مسافراں نوں وی فائدہ ہو گیا اے۔

ٹیوب دا کرایہ، برٹش ریل، بساں تے ٹیکسیاں نالوں ڈھیر گھٹ اے پر فیروی ساڈ
جیہے مسافراں دے طور بھوان لئی بوہت اے۔ تیں جے دو چار ٹیشناں نوں ہتھ لا
آوتے تنناں چو نہہ پونڈاں دا کنگھا ہو جاند اے۔ کہندے نیں شروع شروع وچ ہزار
دو پنی دا ٹکٹ رکھیا گیا سی۔ جیہدے نال بھانویں اک تے بھانویں سارے ٹیشناں دا

پھیرا ٹورالا آؤ پرہن گھرنوں سیانیاں ہو کے کلومیٹراں دے حساب نال اُگرا ہی کر دے
 نیں۔ ایہناں ٹیوب ٹیشٹاں پاروں دیکھیا جائے تے سارا لندن ای رب توکل کھلوتا
 ہو یا اے، کیوں جے تھیلیوں پورا لندن ایہدے کنٹرول تے قبضے وچ اے۔ اتلا
 حصہ تے ایویں مدہانی دا چھڑا ہی رہ گیا اے پر اُنج ایہہ انڈر گراؤنڈ ٹیوب تعمیری سوڈے
 وی وںجارن اے، نہیں تے انڈر گراؤنڈ سرگرمیاں ساری دنیا وچ جیہڑے چن چاڑھ
 رہیاں نیں اوہ کسے کولوں لگی چھپی گل تھوڑی اے۔

پروفیسر محمد اسلم

جنم ۲۸ نومبر ۱۹۳۲ء نون پھلور ضلع جالندھر بھارت وچ ہويا ایم۔ اے (تاریخ) تک تعلیم لاہور وچ حاصل کیتی۔ ڈھم یونیورسٹی انگلینڈ توں علوم اسلامیہ تے عربی وچ بی۔ اے آنرز کیتا۔ مانچسٹر یونیورسٹی توں ایم۔ اے فارسی کیتا۔ کیمرج یونیورسٹی توں مشرقی علوم وچ ایم لٹ دی ڈگری لئی۔ ۱۹۶۷ء وچ پنجاب یونیورسٹی دے شعبہ تاریخ نال منسلک ہوتے۔ برصغیر ہند و پاکستان دی تاریخ بارے کئی کتاباں تے تحقیقی مقالے لکھ چکے نیں۔ پرائی تحریاں توں تاریخی کھوج لان دے ماہر نیں۔ پنجابی وچ بوہت گھٹ لکھیا اے، پر جو لکھیا اے معیاری لکھیا اے۔ زبان وچ روانی تے رس اے تھوڑے لفظاں وچ وڈی گل بڑے مؤثر طریقے نال کرن دا گرو جان دے نیں۔

رائے احمد خاں کھل شہید

انگریزاں نے ۱۸۴۹ء وچ پنجاب اُتے قبضہ کیتا۔ پنجاب اُتے انگریزاں دا قبضہ ہونداں امی مسلماناں اُتے ظلم دے پہاڑ ٹٹن لگ پئے۔ بے گناہ لوکاں نوں ذرا ذرا جتنی گل پاروں قید تے پھانسی ورگیاں سزاواں ملن لگ پئیاں موقع توں فائدہ اٹھا کے انگریز پادری لوکاں نوں زبردستی عیسائی بنان لگ پئے۔ انگریزاں مقامی صنعتاں نوں تباہ کر کے سارا خام مال انگلستان دے کارخانیاں وچ گھلنا شروع کر دتا۔ ایہدے نتیجے وچ ایتھوں دے لوک معاشی بد حالی دا شکار ہو کے رہ گئے۔ اوہر میرٹھ چھاؤنی وچ مقامی سپاہیاں نوں گاں تے سوردی چربی والے کارتوس چلان توں انکاری ہون پاروں قید کر دتا گیا۔ ایہہ قیدی سپاہی انگریز دی نابری کردیاں ہوتیاں

جیل دیاں دیوراں توڑ کے دلی جا پڑے تے بہادر شاہ ظفرنوں اپنا بادشاہ بنا کے جنگ آزادی دا اعلان کر دتا۔ میرٹھ چھاؤنی دے حالات دیکھ کے انگریز حکومت نے پنجاب وچ انبالہ، فیروز پور، لدھیانہ، سیالکوٹ، لاہور، ملتان تے گوگیرہ دیاں چھاؤنیاں وچ مقامی سپاہیاں کولوں وی ہتھیار رکھوالے تے کئی بے گناہ سادھونتاں نوں شک پاروں پھلے لادتا گیا۔

اوس سسے ہندوستان دا دارالحکومت کلکتہ سی، جدوں کہ دلی، اگرہ تے اوڈھ آزادی دی جنگ لڑن والیاں دے وڈے مرکز سن۔ ایس لئی کلکتہ دا پورے ملک نال رابطہ ٹُٹ گیا۔ پنجاب تے صوبہ سرحد وچ دس والے انگریزاں دا کلکتہ تے لندن نال رابطہ صرف کراچی دے ذریعے رہ گیا۔ انگریزاں دی کوشش سی کہ پنجاب تے سندھ وچ امن رہوے تاں جے جرنیلی ٹرک رسد تے فوجاں دے آن جان لئی کھلی رہوے۔ ایہہ خدمت پٹیالہ، نابھہ، فرید کوٹ تے کپور تھلہ دے سکھ راجیاں نے اپنے ذمے لے لئی۔

ایہناں دناں وچ ساہی وال دی بجائے گوگیرہ ضلعے دا صدر مقام سی۔ ایس علاقے دے لوک انگریز دیاں پالیاں نال پہلے ای نفرت کر دے سن۔ جدوں انگریز حکومت نے گوگیرہ چھاؤنی دے مقامی سپاہیاں کولوں ہتھیار واپس لئے تے ایہدے نال اوہناں دے دلاں وچ وی انگریز دے خلاف نفرت پیدا ہو گئی۔ ایہہ گرمیاں داموسم سی۔ کراچی توں جہاز فوج تے اسلحہ وغیرہ لے کے دریاواں راہیں پنجاب دے وڈے وڈے شہراں تک جاندے سن۔ اوس ولے کچھ جہاز ملتان دے لاگے موجود سن تے کچھ راوی دریا دے ذریعے چیمپو وٹنی ول وی گھلے گئے۔ ایہناں ای دناں وچ علاقہ گوگیرہ وچ رائے احمد خاں کھل دی جی داری دے جھنڈے لہاندے سن۔ اوہ ضلع گوگیرہ دے اک پنڈ جھامرہ دے وٹنیک سن۔ اوہناں نکی عمر وچ ای تلوار تے نیزہ چلانا سکھ لیا سی۔ ودھیانل دے گھوڑے پالنا اوہناں دا شغل سی۔ اوہناں دی

اک کھوڑی داناں "مورنی" سی؛ جیہڑی اپنی دکھ، ڈیل ڈول تے پھرتی پاروں مشہور
سی۔ جدوں رائے احمد خاں کھل اوہنوں نساندے تے وڈے توں وڈا کھوڑا سوار
اوہدا مفتابلہ نہیں سی کر سکدا۔ رائے احمد خاں اک بہادر محب وطن انسان سن۔
اوہناں دا دل دیس تے دیس واسیاں دی محبت نال دھڑکدا سی۔ اوہ انگریز نوں
غاصب تے ظالم سمجھدے سن۔ ایس لئی مڈھ توں ای اوہناں دے دل وچ انگریزاں
دے خلاف نفرت سی۔ انگریزاں کئی وار اپنے کارندیاں دے ذریعے اوہناں نوں
اپنے نال بلان دی کوشش کیتی پر اوہ اپنے ضمیر دا سودا کرن تے راضی نہ ہوتے۔
۱۸۵۷ء وچ انگریزاں دے خلاف جنگ دا تقارہ وجیاں ای احمد خاں کھل
دے دل وچ انگریز دے خلاف ٹکیاں چنگاریاں لاٹاں بن گئیاں۔ ایس عرصے وچ
انگریزاں نے بغیر کسے وجہ دے جوئیہ قبیلے دے بوہت سارے لوکاں نوں گوگیرہ
جیل وچ ڈک دتا۔ زانیاں تے باللاں اُتے ظلم کیتا۔ رائے احمد خاں کھل نوں
خبر ملی تے اوہ ڈپٹی کمشنر کول گئے تے قیدیاں دی رہائی دا مطالبہ کیتا۔ اوس آکھیا
پتی اوہناں مالیہ ادا نہیں کیتا ایس لئی اوہناں نوں پھڑیا گیا اے۔ رائے احمد خاں
کھل ہوراں دو ٹوک لفظاں وچ آکھیا پتی اوہناں دے دے کوئی مالیہ نہیں تے
نہ امی ہو کوئی سرکاری رقم اے۔ اوہناں نوں چھڈ دیو نہیں تے حالات ہو ر خراب ہو
جان گے۔ ڈپٹی کمشنر نے حالات دا اندازہ لا کے کجھ قیدیاں نوں چھڈ دتا۔ اجے وی
کجھ قیدی جیل وچ سن۔ رائے احمد خاں کھل جان تلی اُتے دھر کے جیل دے اندر
گئے۔ قیدیاں نوں کھان پین دا سامان دتا تے نالے اوہناں نوں مشورہ دتا پتی اوہ
موقع بلدیاں ای جیل توں باہر آؤن دی کوشش کرن۔ ۲۶ جولائی ۱۸۵۷ء نوں
قیدیاں نے جیل دی کندھ توڑ کے باہر نکلن دی کوشش کیتی تے جیل دے محافظاں نے اوہناں
اُتے گولی چلا دتی۔ قیدی پہلوں ای اچھی صورت حال دا مقابلہ کرن لئی تیار سن۔

ایس لئی اوہ دی محافظاں اُتے ٹٹ پئے۔ ایس موقعے تے ۱۵ بندے مرے یاں زخمی ہوئے۔ انگریزاں ایس واقعے دا ذمہ دار احمد خاں کھرل نوں قرار دتاتے اوہناں نوں گرفتار کرن دے بہانے لوکاں اُتے ظلم توڑنے شروع کردتے۔ راتے احمد خاں کولوں لوکاں دی ایہہ حالت نہ دیکھی گئی۔ اوہ آپ امی ڈپٹی کمشنر دے سامنے پیش ہو گئے تے ایس طرح اوہناں نوں جیل کھل دتا گیا۔ لوکی اپنے محبوب لیڈرنوں چھڈان لئی کفن سرتے بنھ کے سڑکاں اُتے آ گئے۔ لوکاں اجوش دیکھ کے ڈپٹی کمشنر نے راتے ہوراں نوں رہا کر دتا۔

۱۶ ستمبر ۱۸۵۷ء نوں راتے احمد خاں ہوراں گوگیرہ تے جھنگ دے ضلعیاں وچ آباد کھرل، موٹو، کاٹھیتے، ترہانے، ہرل، بگھیلے، فقیانے، جنجوعے، نول، لک تے جوئے قبیلیاں دے سرداراں نوں کمالیہ وچ اکٹھا کیتا تے انگریزاں دی غلامی توں آزاد ہون لئی بل جل کے کوشش کرن دا مسجھادتا۔ سارے سرداراں راتے احمد خاں نوں اپنا سردار من کے انگریزاں دے خلاف جہاد دا اعلان کر دتا۔ انگریزاں دا اک مخبر سرفراز خاں کھرل راتو رات گوگیرہ اپڑیا تے اوس نے سارا بھیت انگریز کپتان الفنسٹن نوں جادو سیانجیجہ ایہہ ہویا پئی اک انگریز افسر برکھے، احمد خاں ہوراں نوں گرفتار کرن لئی جھامرے اپڑیا۔ پر اوہ راویوں پار لنگھ گئے۔ برکھے نے جھامرے دے کئی بندے قید کر لئے۔ پنڈنوں اک لودتی۔ ایہہ دے جواب وچ آزادی دے مجاہداں نے راتے احمد خاں دی قیادت وچ موضع اکبر اُتے قبضہ کر کے گوگیرہ اُتے حملہ کرن دا منصوبہ بنایا۔ پر مخبری ہون پاروں ایہہ منصوبہ توڑتہ چڑھ سکیا۔ مجاہداں فتح پور جا مورچے لائے تے ۲۰ ستمبر ۱۸۵۷ء نوں او تھے انگریزاں دے چھکے چھڑا دتے۔ اگلے دن ۲۱ ستمبر نوں پنڈ کشکوری دے لاگے سرتوڑ مقابلہ ہویا۔ احمد خاں کھرل سرتے کفن بنھ کے میدان وچ آئے۔ مجاہداں

کول تلواراں، برچھیاں، توڑے دار بند و قاتل تے لاٹھیاں سن۔ پر انگریزاں کول نویں
توں نواں اسلحہ سی ایس دے باوجود اوہ گبھرائے ہوئے سن۔ جنگ جاری سی کہ عصر
دی نماز دا ویلا ہو گیا۔ رائے احمد خاں نماز پڑھن لگے تے انگریزاں اوہناں اتے گولیاں
دامینہ برساتا۔ اک گولی سدھی سینے وچ لگی تے اوہ شہید ہو گئے۔

انگریزاں اوہناں داسرکٹ کے گوگیرہ جیل دی کندھ اتے لٹکا دتا۔ دھڑ اوہناں دے
ساتھی جھامرے لے گئے راتو رات اوہناں دا اک وفادار ساتھی اپنی جان تلی تے رکھ کے
جیل دی کندھ تے چڑھیا تے اوہناں داسر لاه کے جھامرے لے گیا جتھے اوہنوں دھڑ
دے نال جوڑ کے بڑے احترام نال دفن کیتا گیا۔

رائے احمد خاں دی شہادت دے بعد میر بہاول قتیانہ نے قیادت سنبھالی۔ اوہناں
برکلے تے اوہ دے کئی ساتھی قتل کر کے اپنے بہادر سردار دی تحریک نوں اگے ودھایا۔
”پنجاب غدر رپورٹ“ وچ انگریزاں نے ایس گل دا اعتراف کیتا اے پتی بے احمد خاں
کھل کامیاب ہو جان دے تے گوگیرہ توں مکتان توڑی پورا علاقہ انگریزاں دے ہتھوں نکل
جاندا تے کراچی نال اوہناں دا رابطہ ختم ہو جانا سی، تے جے انج ہو جاندا تے فیر اوہ پورے
پنجاب وچوں نکل جان دے۔

برکلے دی موت تے احمد خاں کھل دی بہادری دے ڈھولے اچ وی گوگیرہ دے
علاقے وچ گائے جان دے نیں۔ رائے احمد خاں آپ تے شہید ہو گئے پر اپنے پچھے آون والیاں
نسلاں لئی بہادری تے دیس پیار دی روشن مثال چھڈ گئے۔ سچی گل تے ایہہ دے کہ آج
اسیں ایہو جیسے محب وطن بہادراں دیاں قربانیاں دے صدقے آزادی دی زندگی گزار
رہے آں۔

عبدالمجید سالک

جنم ۱۳ دسمبر ۱۸۹۴ء بٹالہ ضلع گورداسپور (بھارت) والد دانال غلام قادر سی۔
 مڈھلی تعلیم بٹالہ تے پٹھانکوٹ وچ حاصل کیتی۔ ۱۹۱۱ء وچ پٹھانکوٹ توں رسالہ
 ”فانوس خیال“ جاری کیتا۔ لاہور وں بکمن ولے رسالہ ”پھلوڑی“ تے ”تہذیب نسواں“
 دے ایڈیٹر تے سب ایڈیٹر رہے۔ ۱۹۲۷ء وچ زمیندار اخبار چھڈ کے مولانا غلام رسول مہر
 نال رل کے اخبار ”انقلاب“ کڈھیا۔ ۱۹۵۱ء وچ ڈاکٹر فقیر محمد فقیر نال رل کے رسالہ ”پنجابی“
 شروع کیتا۔ غزلاں، نظماں تے مضمون لکھے، جیہڑے ”پنجابی ادب تے سالک“ دے ناں
 نال کتابی صورت وچ چھپ چکے نیں۔ ”کیاہ وچ“ انشائیہ وی ایسے کتاب وچوں لیا گیا اے
 سالک صاحب دی وفات ۱۹۵۹ء وچ ہوئی۔ سالک صاحب دا شمار اوہناں لکھاریاں
 وچ ہوندا اے جیہناں دیاں کوششاں نال پنجابی اج اُچے درجے تے اپڑ گئی اے
 آپ دی تحریر وچ شگفتگی تے روانی اے۔ آپ سادہ تے دلچسپ پنجابی زبان لکھدے سن۔

کیاہ وچ

بیماری دا کوئی آنت نہیں۔ رنگ رنگ دیاں بیماریاں بندے نال لگیاں ہوتیاں
 نیں۔ اک بڑی عجیب بیماری اے پتی آدمی رات ویلے ستا ہو یا اُٹھ کے چلن پھرن لگدا
 اے۔ ڈاکٹر حکیم سارے ایس گل نوں من دے نیں پتی اوہ سچی مچی ستا ہو یا ہوندا اے۔
 اونوں ہوش کوئی نہیں ہوندی۔ پراسیہہ بڑی اچنبہ دی گل اے پتی اوہ آدمی نہ رکتے ڈگدا ڈھیندا
 اے، نہ کے شے نال ٹھوکر کھاندا اے۔ کئی واری لوکاں نے دیکھیا پتی ایس مرض دا
 بیمار کوٹھے دے بنیرے اُتے سدھا لگا جاندا اے۔ مجال اے اوہ اقدم وی آہرا باہرا

پتے تے اوہ کوٹھے دے اُتے یاں اوس تھاں توں ہیٹھاں ڈھیبہ پتے جے اوہ جاگدا
ہونداتے کدی اوس بنیرے اُتے ایس طرحاں بے دھڑک نہ ٹرسکدا۔

ولایت وچ ایس مرض دے بیمار بوہت ہیکے نیں۔ رسالیاں، اخباراں وچ اوہناں
دے قصے چھپ دے رہندے نیں اک آدمی نے دسیا پتی کجھ دن میرے کوٹ
دی حبیب دچوں روپے بربہ چوری ہوندے رہے۔ رات نوں میں کوٹ کلی نال ٹنگ
کے سوں جاندا ساں۔ سویلے اٹھ کے ویکھ داتے روپے کوئی نہیں سن ہوندے۔ میں
بڑا حیران ساں پتی ایہہ گل کیہ اے؟ میں فلیٹ وچ اک اکلا رہندا ساں، نہ بیوی نہ بچہ
نہ نوکر نہ چاکر، فیر رات نوں کیہڑا چور پنیدا اے جیہڑا روز مینوں ٹٹ کے لے جاندا اے؟
میں اک دو گوانڈھیاں نال گل کیتی۔ اوہ وی بڑے حیران ہوتے۔ اخیر اک رات کیہ ہويا،
فلیٹ دے پچھلے پاسے اک نکلی جیہی بغیچی سی۔ اوہدے وچ مینوں اک آدمی نے جگایا
تے میں دیکھیا پتی اک چھری میرے ہتھ وچ اے تے میں بغیچی دی اک ٹکڑ وچ ٹویا پیا
کدھناں جس آدمی نے مینوں جگایا، اوہ میرا گوانڈھی تے دوست سی۔ اوس نوں ویکھ
کے تے اپنے آپ نوں بغیچی وچ پا کے میری سمجھ وچ کجھ نہ آیا پتی ایہہ گل کیہ بٹی میں
بغیچی وچ کس طرحاں آگیا تے چھری نال ٹویا ٹپن دا کیہ مطلب؟

گوانڈھی نے میرے سامنے ٹوتے نوں چنگی طرحاں پٹیا۔ تے اوہدے دچوں اوہ
سارے روپے مل گئے جیہڑے کئی دن توڑی چوری ہوندے رہے سن۔ دوست
نے اوہ سارے روپے میری جھولی وچ پاتے تے مینوں نال لے کے فلیٹ وچ
آیا۔ اوس نے مینوں دسیا بٹی میں ڈاکٹری وچ پڑھناں واں۔ جس ویلے تئیں مینوں
ایس عجیب چوری دا حال دسیا تے مینوں شک پنہ گیا پتی تہاں نوں نیندر وچ پھرن دی
بیماری اے تے تئیں اپنے چور آپ او۔ میں صرف علم حاصل کرن دی خاطر تہاڈی
دیکھ بھال شروع کر دتی۔ اج میں اپنے کمرے وچ جا رہیا سی۔ تہاڈے فلیٹ دچوں

مینوں کھڑا کھیا آیا۔ میں جھٹ اٹھیا تے تہاڑے بوہے اگے جا کھلوتا۔ میں دیکھیا پتی
تسیں اک ہتھ وچ چھری تے دو بے ہتھ وچ روپے لے کے باہر نکلے۔ میں سامنے
کھلوتا ہو یا سی پر تسیں مینوں دیکھیا ای نہیں۔ میں تہاڑے پچھے پچھے لگا گیا تسیں بھچی
دی اک ٹکر وچ اڑے تے آرام نال بیٹھ کے چھری نال اک ٹو یا ٹیٹیا۔ روپے ابے ٹوے
وچ نہیں سن رکھے۔ میں تہانوں ہونیا تے تہاڑا ناں لے کے بلایا۔ تسیں اکھیاں کھول
دیاں تے مینوں کہن لگے۔ "ہیں، میں کتھے ساں، میں بھچی وچ کیکر آیا۔ تسیں اتھے کیہ
کر دے او؟"

دو بے دن اوہ دوست مینوں اپنے کالج دے وڈے ڈاکٹر کول لے گیا تے اوہنوں
سارا قصہ سنایا۔ ڈاکٹر نے دیا پتی ایس بیماری نوں ڈاکٹری وچ (Somnambulism)
کہندے نیں، جیہدا مطلب اے نیند وچ پھرنا۔ فیر ڈاکٹر نے نسخہ لکھیا۔ میں کوئی چھ
ست ہفتے توڑی دو اپنڈارہیا۔ اخیر مینوں آرام آ گیا فیر ساری عمر مینوں ایہو جیہی
شکایت نہیں ہوئی۔

اخباراں وچ ایہہ قصہ پڑھ کے مینوں اپنے بچپن دی اک گل یاد آ گئی۔ میں کوئی
چھ ورھیاں دا ہواں گا۔ اک دن شام نوں بے بے جی (والدہ) نے گجر پلا پکایا میں بڑی
ضد کیتی پتی میں ہننے گجر پلا کھاواں گا۔ بے بے جی کہن لگے:
"اچھا کے تھان دیا۔ گجر پلا ٹھنڈا کر کے کھاتی دا اے۔ تتا گجر پلا کون کھاندا ہوندا
اے؟" میں ضد کر دانتے روند کر لانداسوں گیا۔

ادھی رات ویلے میری اکھ کھلتی۔ مینوں کجھ چھیا۔ ہتھ مار کے دیکھیا تے میں کپاہ
دے اک ٹوکرے وچ بیٹھا ہو یا سی۔ میں گھاہر کے بے بے جی نوں آواز ماری
"بے بے جی! بے جی! اوہناں میری منجی تے ہتھ ماریا تے منجی دیہلی پتی سی۔ اوہناں
پچھیا۔" وے مجید! توں کتھوں پایا یوں ایں؟" میں کیہا: "ایہہ گل تے میں تہانوں پچھناں

چاہناں پئی میں کتھوں پیا بولناں؟ بے بے جی ہس پتے تے آکھن لگے: ”آخر توں بولد اکھوں
ایں؟“ میں آکھیا: بے بے جی! کیاہ وچوں۔ ”فیر بے بے جی نے آکے ٹوکرے وچوں مینوں
چکھیا تے منجی تے تھا پڑ کے سوال دتا۔

سویلے جدوں سارا ٹیر جا گیا تے بے بے جی نے اباجی نوں ایہہ قصہ سنایا۔ اوہ
ہس ہس کے دوہرے ہو گئے۔ کہن لگے ”چور نہ ہووے تے۔ رات نوں گجریلا منگدا
سی نا۔ ایہنے سوچیا ہووے گا، رات دیلا اے۔ سارے تے ہوتے نیں۔ ایس
ویلے گجریلے تے شخون مارنا چاہی دا اے۔ ہنیرے وچ اٹھ کے جانا سی باورچی خانے تے رُ
گیا کیاہ دے ٹوکرے وچ۔ پر اخیر پھڑیا گیا نا؟“

میں شرم نال روں ہا کا ہو گیا سی۔ اپنے وچ باباجی (دادا) نماز پڑھ کے میتوں واپس
آگئے۔ اوہناں وی ایہہ ساری گل سنی۔ اوہ ہتے تے نہیں، کجھ مسکرا کے آکھیا: ”ایہہ ہاے
دی گل نہیں۔ جے مجید رات نوں نیند وچ اٹھ کے چل دا پھر دا اے تے ایس دا اعلان
کر دانا چاہی دا اے“۔ اوس دن مینوں اباجی ڈاکٹر عبدالرحمان کول لے گئے۔ میں ٹھیک
تے ہو گیا۔ پر گھر وچ ایس محول نے کئی ورہیاں تک میرا چچا نہ چھڑایا ”مجید کتھے؟۔
کیاہ وچ“، سچی مچی، ایہہ میری چھیڑا ہی بن گئی سی۔

ڈاکٹر سید اختر جعفری

ڈاکٹر سید اختر جعفری ہوراں دا اصل ناں سید اختر امان اے۔ ۲۰ دسمبر ۱۹۳۴ء نوں کپور تھلہ (بھارت) وچ پیدا ہوئے۔ والد داناں سید غلام قادر سی۔ آپ نے مڈھلی تعلیم اسلامیہ مڈل سکول کپور تھلہ وچ حاصل کیتی۔ پاکستان دے قیام مگروں لاہور آگئے تے پنجاب یونیورسٹی توں میٹرک دا امتحان اول درجے وچ پاس کیتا۔ فیر انٹر میڈیٹ تے بی اے تیک تعلیم دیال سنگھ کالج لاہور توں حاصل کیتی تے سید عابد علی عابدی شخصیت تے علمیت توں فیض حاصل کیتا۔

۱۹۵۸ء وچ یونیورسٹی اورینٹل کالج لاہور توں ایم اے (اردو) اول درجے وچ پاس کر کے گورنمنٹ کالج ڈیرہ غازی خاں وچ لیکچرار ہو گئے۔ ملازمت دے دوران بی ایڈ۔ ایم اے (فارسی) ایم اے (پنجابی گولڈ میڈلسٹ) تے پی ایچ ڈی پنجابی دیاں ڈگریاں حاصل کیتیاں۔ تقریباً بیس ورھے پنجاب یونیورسٹی دے شعبہ پنجابی وچ وی پڑھاندے رہے۔

فیصل آباد وچ کچھ عرصہ پرنسپل دے عہدے اُتے فائز رہے۔ اوس توں بعد گورنمنٹ کالج باغبان پورہ دے پرنسپل رہے۔

آپ نے اردو وچ تہہ، فارسی وچ دو تے پنجابی وچ دینہہ کتاباں لکھیاں نیں۔ اک عربی تے چار انگریزی کتاباں دے اردو وچ ترجمے وی کیتے نیں۔

آپ دیاں کتاباں ”حضور پرنور صلی اللہ علیہ وسلم“، ”نویں زاویے“، ”چار ایجا دال“ تے ”بابائے پنجابی“ اُتے حکومت پنجاب تے ادبی اداریاں وٹوں ایوارڈ مل چکے نیں۔ آپ دی تحریر سادہ، دلچسپ تے آسان ہوندی اے۔ تحقیق تے تنقید آپ دا خاص

میدان اے۔ ڈونگھی کھوج تے پڑتاں توں بناں کوئی گل نہیں لکھدے۔ ”مضمون لوک گیت“ آپ دی کتاب ”نویں زاویے“ وچوں چون اے....

لوک گیت

لوک گیت یعنی لوکاں دے گیت : اوہناں وں سوتے پھلاں وانگوں ہوند
نیں جیہڑے مٹی دی زرخیزی پاروں دھرتی وچوں آپ مہارے پنگر پندے نیں۔ فطرت
دی گودی وچ پل کے جوان ہوندے نیں۔ فیر اپنے وں سوتے رنگاں، دل تے دماغ
وچ لہ جان والی واشاناں دھرتی نوں سہپن بختدے نیں۔

ایہہ لوک گیت کسے قوم دا ایہہ انملا خزانہ ہوندے نیں جیہڑے وچ نہ صرف
اوس قوم دی رہتل بہتل تے دیسے دیاں من موہنیاں تصویراں ہوندیاں نیں، سگوں
ایہناں وچ اوس قوم دے وڈکیاں دے صدیاں دے تجربے، مشاہدے، ہمت
دیاں گلاں، قوم دا بھہا، اوہدیاں ریتاں تے رسماں، اوہدے ماضی دے جھلکارے،
دھرتی دارنگ، فصللاں، ٹھاٹھاں مار دے دریا تے گیت گاؤندیاں ندیاں دا بیان ہوندا
اے۔ ایسے پاروں سمندراں تے دریاواں دے کنڈے وں والیاں قوماں دے لوک
گیتاں وچ دریا دیاں کانگیاں، طوفاناں، بیڑیاں تے جھکھڑاں دا ذکر بلداے تے
ریتلے علاقیاں دے لوک گیتاں وچ صحراواں، جھکھڑاں، ریت بریتے ٹیلیاں تے نخلتاں
دا ذکر موجود اے۔ ہرے بھرے میداناں دے لوک گیت اوہتوں دی دھرتی، فصللاں
لوکاں دے بھہا، آل دواے دیاں شیناں تے پھلاں تے پھلاں دیاں خوشبوآں
نال مہکدے نیں۔

ایہہ لوک گیت کسے اک شاعر دی تخلیق نہیں ہوندے تے نہ امی کسے دی شعوری

کوشش دایتجہ ہوندے نیں۔ سگوں ایہہ اوہ جذبے یاں خیال ہوندے نیں جیہڑے زنانیاں تے
گبھرواں دے موبہوں آپ مہارے نکل کے موزوں نغظاں داروپ دھار لیندے
نیں۔ ایس لئی ایہتاں وچ خیال تے زبان دی سادگی ہندی اے۔ ایہہ لوک گیت
دلاں دیاں ڈونگھائیاں وچوں اٹھدے نیں تے دلاں دیاں ڈونگھائیاں تیک تر کر دے نیں۔
پنجاب دے مشہور لوک گیتاں وچوں ڈھولا، ماہیا، تھال، لوری، ٹپہ، بولیاں، چھلہ،
جگنی، گدا، سہمی، جھمر، ککلی تے گھوڑیاں بوہت مقبول نیں۔ پرایتھے صرف ڈھولا، ماہیا،
لوری، تھال تے بولیاں دا ذکر کیتا جاندا اے۔

ڈھولا

ڈھولا بوہت پُرانا لوک گیت اے۔ جیہڑا صدیاں دے پیٹ دے طے کر دا اک پڑھی
توں دوجی پڑھی تائیں سینہ بہ سینہ لگا آؤندا اے۔ ڈھولے وچ خاص سوز تے گھلاوٹ
ہندی اے، جیہڑی سنن والیاں دے جذبیاں نوں مُبندی اے تے دلاں وچ جھڑناٹ
چھڑ دیندی اے۔ کجھ لوکاں نے ڈھولے دا تعلق سہمی (شمس رانی) تے ڈھول بادشاہ نال
جوڑیا اے۔ کجھ لوکاں دا خیال اے پئی ڈھول پنجاب دا پُرانا ساز اے۔ پنجاب دے
وسنیک خوشی دا اظہار ڈھول و جا کے کر دے نیں۔ ڈھول دی آواز دلاں نوں اپنے ول
کھچ دی اے تے پیراں نوں بھنگڑا پاؤن تے مجبور کر دیندی اے۔ ایس ڈھول توں
امی ڈھولا، ڈھول جانی، ڈھولن، ڈھول پاہی، ڈھولویار تے ڈھولی یار دے لفظ بنے نیں
ڈھولے دے کجھ بول رائج نیں۔

- | | | |
|--------------------------------|--|-----------------------------|
| (۱) میں ایتھے ماہی میرا سوہدرے | | میں ایتھے تے ڈھول قصورے (۲) |
| میرا پل دل پیا اورے | | دل ڈاڈھا ہو یا مجبورے |
| دھن میرا جگرا۔ جیوے ڈھولا | | مرکے آونا۔ جیوے ڈھولا |

ڈھول ماہنوا - ڈھول چن وے
 روندی مینوں چھڈ کے رکھے کیئوں ہانیا || لکھاں اساں منیاں توں اک من وے

ماہیا

پنجابی زبان دی شاعری وچ ماہی لفظ عا ورتیا جاندا اے۔ جیہڑا ماہ یعنی چن توں نکلیا اے۔ ایس لئی ماہی دا مطلب اے چن ورگا۔ ماہی لفظ اگے جدوں الف لا دتا جاندا اے تے اوہ ماہیا بن جاندا اے تے ماہیا اوہ لوک گیت اے، جیہدے وچ اک جذبہ، اک خیال یاں اک مضمون ڈیڑھ مصرعے وچ بیان کیتا جاندا اے۔ پہلے ادھے مصرعے وچ ساڈی وسوں دے جھلکارے ہوندے نیں نالے ایہہ قافیہ دی حاصل گونج پیدا کر دے۔ پھیرا یہو گونج جدوں دو بے مصرعے دے مکن اُتے سنائی دیندی اے تے موسیقی پیدا کر دی اے۔ ماہیئے دا دو بجا مصرع پورا تے مکمل ہوندا اے جیہدے وچ مفہوم دی تکمیل دے نال نال جذبیاں دا ہڑھ وی موجود ہوندا اے۔ ماہیا صرف زنانیاں دا اگیت نہیں، سگوں گھرو وی ایہہ گیت گاؤندے نیں۔ ماہیے دا خاص موضوع ہجرتے وچھوڑا اے۔ ایس لئی ایہدے وچ حدوں ودھ درد بھریا ہوندا اے۔ ماہیئے دے بولال وچ نصیحتاں تے مت دیاں گلاں وی ہونیاں نیں۔ جویں:

دو پتراناں دے۔

ساڈا دکھ سُن سُن کے، روندے پتھر پہاڑاں دے۔

آری تے آری اے۔

اک دم یوسف دا سارا مصر پاری اے۔

کوٹھے تے کاں بولے۔

چٹھی آئی ماہیے دی وچ میسرا وی ناں بولے۔

کوئی بنگلہ نی گول ہو سی
 اللہ دیاں اللہ جانے کیہڑے رنگ و بچ ڈھول ہو سی۔
 سونے وار کل ماہیا
 لوکل دیاں رون اکھیاں ساڈا روند اے دل ماہیا۔
 مینہ وس گیا باراں تے
 اللہ سائیں فضل کرے پر دیسی یاراں تے۔

لوری

سب توں پرانا لوک گیت لوری اے۔ ایہہ گیت اڑی پئے بال نوں چُپ کپاؤن
 تے سوان واسطے گایا جاندا اے۔ سب توں پہلاں بال دے کناں وچ لوری دے
 بول امی پندے نیں۔ اوہ بول تے نہیں سمجھ دا۔ صرف ماں دی مٹھڑی آواز سُن کے
 چُپ ہو جاندا اے ایس لئی لوری اوس لوک گیت نوں اکھیا جاندا اے جیہدے وچ
 ماں دی تمنا، اولاد نال محبت، پاکیزہ سدھراں، امنگال، مستقبل دے سُفنے، خوشیاں تے
 دکھاں دا بیان، دُعاواں تے نگھے جذبیاں دے اظہار ہوندے نیں۔ ایس پاروں لوری بے
 ساد مرادے لفظاں اوہلے سدھراں تے جذبیاں دا ہڑھ موجود ہوندا اے، جیہدیاں لہراں
 داشورماں دی آواز دے لہا چڑھا توں ظاہر ہوندا اے۔

پنجاب دیاں لوریاں وچ دیس پنجاب دی پوری دستوں تے معاشرہ ہسدا
 وسدا دکھالی دیندا اے۔ پنجاب دی بوہتی آبادی پنڈاں دی و سنیک اے ایس لئی
 ساڈیاں لوریاں وچ واہی بیجی فصلاں، پشواں، مال ڈنگراں تے انگاں ساکاں دا
 ذکر لہجدا اے۔ جوہیں:
 الہڑ بلہڑ باوے دا

بادا کنک لیاوے گا
 باوی بہہ کے چھٹے گی
 ماں پونیاں وٹے گی

باوی من پکاوے گی
 بادا بیٹھا کھاوے گا
کا کا کھڑ کھڑ ہتے گا

سونے دا پنگھوڑا تے
 سونے دی کٹوری

تینوں بھین دیوے لوری
تینوں ماں دیوے لوری

اللہ توں، والی توں
 دتا اسی تے پالیں توں

تھال

تھال، کڑیاں دی کھیڈ لے۔ ایہہ کھیڈ گیند نال کھیڈی جاندی اے تے
 نال نال گیت گایا جاند اے۔ ایس گیت وچ عام طور تے انگاں ساکاں تے آل دوائے
 دے حالات دا ذکر کیا جاند اے۔ نالے کڑیاں دے اوہناں جذبیال، سدھراں
 تے خیالاں دی ترجمانی ہوندی اے جدوں اوہ دھیاں، بھیناں تے ناناں ہونڈیاں
 نیں۔ ایس گیت دے ہر بند دا آخری بول ایہہ ہوندا اے۔

آل مال، پورا ہو یا تھال۔

اک مشہور تھال اے

کھوہ وچ پانی
 ماں میری رانی
 پیٹو میرا راجہ
 ہیٹھ گھوڑا تازہ
 چاندی دیاں پوڑھیاں
 سونے دادروازہ
 آل مال، پورا ہو یا تھال
 دیر آیا نہا کے
 روٹی دتی پاکے
 کھانی اے تے کھا
 نہیں تے نوکری نوں جا
 آل مال، پورا ہو یا تھال

بولیاں

پنجاب دی سرزمین اک سدا سہاگن دھرتی اے تے لوک گیت ایس سہاگن دیاں
 اوہ رنگ رنگیاں تے ون سونیاں ٹومباں نیں، جیہناں دی چمک دمک تے لشکارے
 صدیاں بیتن مگروں اج وی ہالیاں دے ہل ڈک لیندے نیں۔ ایہناں لوک گیتاں
 اوہلے لگے ہوئے بگھے جذبیاں دا مٹھا مٹھا سیک آج وی پنجاب دے گبھرو آں دے
 دلاں نوں گرما دیندا اے۔

بولیاں ایہناں لوک گیتاں وچوں اک ایہہ لوک گیت اے جیہڑا صدیاں توں
 پنجابیاں دے دلاں دیاں دھڑکنناں وچ گونجدا لگا آ رہیا اے۔ ایہہ بولیاں اوہناں

دے ہو وچ پچیاں چیاں ہو یاں نہیں تے اوہناں دے انگ انگ وچ بولیاں دا
 سرور جھومر پاؤندا تے چھلکاں ماردا اے۔ قواعد دے اختیار مال بولیاں جمع داصیغہ
 اے تے ایہدا واحد بولی اے، جس دے معنے بول، قول، زبان، آکھی ہونی گل، طعنہ
 یاں مہنادے نیں پر شاعری وچ بولی اوس اک مصرعے نوں آکھدے نیں جیہدے وچ
 کوئی خیال، کوئی مضمون، کوئی دانش یاں تجربے یاں مشاہدے دی گل یاں کسے جذبے
 ڈھکواں اظہار ہوندا اے۔ حیویں:

- ۱۔ کتے ٹکریں تے حال سُناواں، دُکھاں وچ جند رُل گئی۔
 - ۲۔ تیری ہاڑی نوں وکیلاں کھادا، ساؤنی تیری شاہاں لُٹ لئی
 - ۳۔ اوہ میرا دیہ کُٹ پیئے، کنتیں نتیاں، سندوری سر صافا۔
 - ۴۔ کُتے ویر نوں مندانہ بولیں بھاویں میری چند کٹھولے
 - ۵۔ تن رنگ نہیں بھلدے، حُسن، جوانی، ماپے
 - ۶۔ وچ سُکھاں دے یار بھیرے، دُکھاں وچ کون دردی
 - ۷۔ جٹ پکیاں دے بنے بنے گاؤے۔
- بلے بلے او داناں دے ڈھیر لگ گئے

ناصر بلوچ

اصل ناں ناصر عباس بلوچ اے، پرا دہلی دُنیا بلوچ ناصر بلوچ دے ناں ناں مشہور
 نیں۔ غلام عابد خاں دے گھر یکم فروری ۱۹۵۲ء نوں موضع تیتری تحصیل نور پور ضلع خوشاب
 وچ پیدا ہوئے۔ پنجاب یونیورسٹی توں ایم۔ اے اُردو تے ایم اے پنجابی کر کے درس تدریس
 داپیشہ اپنایا۔ انج کل گورنمنٹ ایف سی کالج وچ اردو پڑھا رہے نیں۔
 پنجابی اُردو دے مشہور کہانی کار، شاعر تے ڈرامہ نگار نیں۔ پنجابی شاعری دا مجموعہ
 ”پتیاں دے سد“ ۱۹۷۷ء وچ تے پنجابی کہانیاں دا مجموعہ ”پتیاں اکھاں والے“
 ۱۹۸۶ء وچ چھاپے چڑھیا۔ اُردو شاعری دا مجموعہ ”دشتِ رایگاں“ دے سہرنا نویں
 ہیٹھ ۱۹۹۱ء وچ چھپ چکا اے۔

کہانی وچ ساڈے ویسے دے مکلیاں، معاشرتی تے ثقافتی موضوعاں پارے
 بوہت سونے لکھدے نیں۔ ٹیلی ویژن دے مشہور ڈرامہ نگار وی نیں۔ ایہہ ناں دا افسانہ
 ”اُن دُٹھے روگ“ ماحول دی آلودگی نال پیدا ہون والیاں بیماریاں دی نشاندہی کردا
 اے۔

اُن دُٹھے روگ

سیال دی دُپے، گلی وچ الانی منجی اُتے پیار جھاتا پ ناں کنسی جاندا سی۔ گھر وچ
 صرف دو لیفت تے دو تلبائیاں سن، جیہڑیاں پچھلی رات دے مینہ وچ، جھمب مین
 نال بھج گتیاں سن، جیہناں نوں رحمے دی گھر والی بختاں نے کچی کندھ اُتے ٹکسنے پایا
 ہویا سی۔ اک پاٹی پُرانی لوئی رحمے اُتے لٹی ہوئی سی۔ گلی دے وچکاروں لنگھدی

نالی وچوں بُودے ہلتے پتے اٹھدے سن۔ ترکھاناں دامنڈا دادو مجھ داسنگل پھڑی گلی وچوں
لنگھیا۔ منجی دے کولوں لنگھیاں مجھ داکلا کھرنالی دے وچ پیا۔ گنیاں چھٹاں اڈکے رجمے
دی لونی اُتے وُگیاں تے چارچو فیرے بدبو کھلر گئی۔

فیرنختاں نے سوچیا۔ ایہہ شہر اے، کسوال نہیں۔ پنڈ وچ بھٹاں دے دُکھ سکھ
سانجھے ہوندے سن۔ شہر وچ کسے نوں کسے دا دید لحاظ نہیں۔ رجمے نوں منجی تے پیاں راج
باتیویں دیہاڑسی۔ دستی والیاں وچوں کسے آکے نہیں سی کچھیاں رجمیا جیوند ایں یا گزر گیا ایں۔
بختاں رجمے نوں نیڑے تیڑے دے سارے ڈاکٹراں نوں دکھا بیٹھی سی۔ رجمادناں وچ ای
ہڈیاں دی مٹھین کے رہ گیا سی۔

بیٹھیاں بیٹھیاں بختاں نوں اپنا پنڈ والا کچا کوٹھاتے کھلا دیہڑہ چیتے آیا۔ پنڈ دی کھلی ہوا
تے روشنی دا خیال آگیا۔ تازیباں تے صاف ستھریاں سبزیاں دی واشتا اوہدی روح تیکر اتر
گئی تے دُکھ سکھ وندن والے عزیز رشتے دار تے گوانڈھی یاد آگئے۔ تے رجمے دے یاریلی خوشیاں
سردار محمد تے علیا وی جیہڑے نماشاں تیکر بیٹھے اک دوجے نال دُکھ سکھ پھولے رہندے سن۔
رجمے دیاں دودھیاں تے دوپتر سن وڈی دھی ویاہی ہوئی سی۔ باقی دے ایلے وی ہُن
واہ واہ سیانے ہو گئے سن۔ رجمے نے کچھ بھونیس ٹھیکے اُتے لئی ہوئی سی۔ دونوں پتر رجمے نال
واہی بیچی داکم کر دے سن۔ اک مجھ دی کلتے اُتے بجھی ہوئی سی۔ لستی تے گھیٹ دی تھوڑی
نہیں سی۔ رجماتے بختاں اُس گلی سنی تے وی رب دالکھ شکر کر دے سن۔

پر خوشیاں تے سردار محمد رجمے نوں ہر ویلے پیروں کڈھی رکھدے۔ جدوں رجمے کول
بہندے، اکو گل کر دے رجمیا اولاد آؤن والا ویلا دیکھ۔ مَرکے روٹی ٹکڑ پورا ہوندا اے۔ کل
کلاں نوں اولاد ویاسنی اے۔ ہُسنے توں کجھ ہتھ پلہ مار، پنڈ وچ کیہ پیا اے۔ شہر جا
کے مقدر ازماء۔

ایہو جیہیاں گلاں سُن کے پہلاں پہلاں تے رجمہ ہس پیندا۔ فیر ہولی ہولی

ایہو گلاں اوہدے مَن نوں چنگیاں لگن لگ پٹیاں۔ اک دن اوہنے فصل چُک کے زمیندار دالیکھا پورا کیتا تے بال بچے لے کے سوال توں لہور آگیا۔ ایتھے کچی دستی وِچ خوشی دے اک جالوں ہنداسی۔ پنجاہ روپے مہینے تے رچے نوں اک نہیر کوٹھڑی چھپر کر لے تے لبھ گیا۔ اوہدے پتر بالا تے شاہو مال دے محلے لو ماں تے نوکر ہو گئے تے رجمارنگ روغن بنان والی اک ورکشاپ وِچ کم تے لگ گیا۔ بنجماں تے اوہدی دھی پینونلے پراندے بنا کے منیاری دی دکان تے وِچ آندیاں۔ سارے جی اپنے اپنے کم دھندے توں خوش سن۔ ورھے مگروں اوہناں پنیو داویاہ وی کرتا۔ پرفیسر پتہ نہیں اوہناں نوں کیہ ہویا ہولی ہولی جوں اوہناں دے اندر وِچ اُلی جیہی لگن لگ پئی۔

بنجماں نوں وہماں تے دیلاں نے گھیر لیا۔ پنڈ وِچ بالے تے شاہو دے چہریاں اُتے کتنی رونق سی۔ شہر آکے دو درہیاں مگروں ای اوہ پیلے ہلدی کیوں ہو گئے نیں۔ ایہہ گل بنجماں دی سمجھ توں باہر سی۔ دُوبے پاسے اوہ رچے نوں ویکھ ویکھ کے گڑھدی۔ رجمابے پنجاہ ورہیاں دا ہوے گا۔ پنڈ وِچ سی تے جوان پتراں توں ودھ کے کم کر داسی۔ پر شہر آکے اوہ دو ورہیاں وِچ اُدھا وی نہیں سی رہ گیا۔

رچے دا تاپ نہ لتھاتے بالاتے شاہو، پیونوں وڈے ہسپتال لے گئے۔ رچے نوں مریضیاں دی قطار وِچ بٹھا کے اوہ اپنے کم تے ٹر گئے۔ ڈاکٹر نے رچے دی حالت ویکھ کے اوہنوں دُوبے ڈاکٹر ول کھل دتا۔ ایہہ ہسپتال دا وڈا ڈاکٹر سی۔ اوہنے رچے دے سارے ٹیسٹ کرائے، تے پنجویں دیہاڑے آؤن دا آکھیا۔ پنجویں دن بالاتے شاہو رچے دے نال ہسپتال گئے۔ ڈاکٹر نے رچے دیاں رپورٹاں ویکھ کے اوہنوں وارڈ وِچ داخل کر لیا۔ بالا کہن لگا۔ ڈاکٹر صاحب فیکٹری دا کیہڑا مزدور ہے جیہوں کھنگ بنجار نہیں ہوندا تیس ہرکے نوں ہسپتال تے داخل نہیں کر دے۔ ڈاکٹر نے بالے تے شاہو دے پیلے چہریاں ول غور نال ویکھیا، ذیر کُچھیا، اوہ کونئیں بکتھوں آئے نیں، بکتھے بکتھے کم کر دے نیں، ہاں سارے حالات کھول کے فٹے۔ ڈاکٹر سُن کے

پوچھیں پتہ کیا۔ فیروبیہا "خمارنگ روغن والی جس درکشاپ وچ کم کردائے، اوتھوں داماحول بندے دھتی
 لئی بڑا ای خطرناک اے۔ ہر قسم دے رنگ روغن وچ کچھ ایہو جیہیاں دھاتاں ورتیاں
 جانیاں نیں جیہہڑیاں ہولی ہولی بندے دے بچتے وچ داخل ہو کے ہڈیاں دے گوڑے
 وچ بہہ جانیاں نیں۔ ایہدے نال جوڑاں دا درو گردیاں دی خرابی، ہڈیاں دے کینسر دا
 خطرہ ہوندا اے۔" شاہو کہن لگا "ڈاکٹر صاحب جوڑاں دا درد میرے اباے نوں شہر آکے ہو یا
 اے۔ پنڈ وچ تے ابا ڈھانی من دی بوری ہس کے کنڈا اتے سٹ لیندا اسی۔" بابے گھبرا کے
 پچھیا۔ "ڈاکٹر جی ساڈا ابا بچتے جاتے گا؟" آہو، بس دُعا کرو۔

"ڈاکٹر جی پر دیس وچ رتبے تہاڈے توں دکھاڈی بانہہ پھڑن والا کوئی نہیں ہے۔ ساڈے
 اباے دا دھیان رکھنا۔" ایہہ آکھ کے بابے نے شاہو دی بانہہ پھڑی تے کم تے ٹر گیا۔
 کول میٹھے ڈاکٹر دے اسسٹنٹ بشیر نے رجمے دی رپورٹ پڑھی تے کیا۔ "ڈاکٹر صاحب
 تمہیں اوہناں نوں دیا کیوں نہیں ہے رجمہ کینسر دی انیرلی منزل اتے دے؟" ڈاکٹر بڑی
 حسرت نال کہن لگا۔ "بشیر! دس دا فائدہ ہے۔" ڈاکٹر نوں کچھ چر لیتی چپ لگ گئی۔ فیروبیہا۔
 "بشیر! مینوں ڈاڈھی چنگی طرحاں پتہ اے۔ پنڈاں وچوں وگ تک لوکیں وڈے شہراں وال آئی
 کیوں جانے نیں۔ میں آپ اک چھوٹے جیسے پنڈ وچوں شہر آیا ساں۔ مینوں ایہہ وی پتہ
 اے ایتھے آکے لوکاں نوں کیہڑے کیہڑے اُن ڈٹھے روگ لگ جانے نیں۔ پنڈاں وچ
 خوراک بے شک بوتی چنگی نہ بھے، پانی روشنی ہواتے خالص بھ جانے نیں۔ ہُن وڈے
 شہراں وچ تازہ ہواتے صاف ماحول دا ملنا بڑا ای دکھا ہو گیا اے۔" بشیر نے پریشان ہو
 کے پچھیا۔ "ڈاکٹر صاحب ایہہ کیہ کہہ رہے او؟ اسیں تازہ ہوا وچ ساہ نہیں لیندے؟" ڈاکٹر
 کہن لگا۔ "شہراں دی آبادی وچ نکلے وڈے اینہو جیسے سینکڑے کارخانے لگے ہوئے
 نیں جیہناں وچوں زہریاں گسیاں تے دھواں نکل کے ہوا وچ رلدا رہندا اے۔ رنگ
 روغن دے کارخانیاں وچ کم کرن والے نہیں جانے جے اوہ ہر سہ نال سیسے، کرومیم

تے کیڈ میم چہیاں زہریلیاں دھاتاں دے نلکے نلکے کئے ہزار دُڑے اپنے جتنے وچ جذب
کردے رہندے نیں۔“

بشیر کہن لگا: ”ماحول دی آلودگی دامنہ تے یورپ دامنہ اے، ساڈے کول تے
اے کارخانے ای بوہت گھٹ نیں۔“ ڈاکٹر نے جواب دتا: ”ماحولیاتی آلودگی صرف کارخانیاں
سببوں ای نہیں ہوندی۔ ایہہ ہور وی بوہت ساریاں چیزاں پارول ہوندی اے۔ شہراں
دیاں گنگنیاں آبادیاں، صفائی تے سیوریج دا ٹھیک بندوبست نہ ہونا، فیر شہراں
دی اٹھے واہ ٹریفک توں پیدا ہون والا پیڑول تے ڈیزل دا دھواں تے شور۔ ایہہ
نال دی بوہت ساریاں بیماریاں لگ سکدیاں نیں۔ فضا دی آلودگی تے شور تے شہراں
وچ عام بندیاں دیاں سحتاں نوں اندروں اندر گھسن لا چھڑیا اے۔“

رات نوں ڈاکٹر وارڈ وچ راؤنڈ تے آیا۔ اک مریض نوں چیک کر دیاں اوہدی نظر
دُور وارڈ دے پوے کول پئی۔ اک بڑھی جیہی زانی جاتے نماز اُتے بیٹھیاں دُعالی ہتھ چکے ہوئے
سن۔ اوہیاں اکھاں وچ اتھرتے چہرے اُتے توری۔ ڈاکٹر نے اوہنوں غور نال تکیا تے اوہنوں
لگا جویں اوہدی موتی ماں فیر توں زندہ ہو گئی اے۔ نال دے بستر تے رحما لمبا پیاسی ڈاکٹر
گوڑ لایا، ایہہ ضرور رحمے دے گھر والی ہوئے گی۔ اوہ سسے ڈاکٹر دیاں نظراں اگے ہالے
تے شاہو دیاں نموجھان شکلاں پھرن لگ پئیاں۔ ہالے دی واج اوہدے کتیں پئی۔ ”ڈاکٹر جی
پر دیس وچ رب تے تہاڈے توں دکھ ساڈی بانہہ پھرن والا کوئی نہیں جے، ساڈے
آپے دادھیان رکھنا۔“

کم چھڑ سنے کلم کلا ڈاکٹر وارڈ دی باری کول آن کھلتا۔ اوہیاں اکھاں باہر لگیاں پئیاں
سن۔ اوہنوں رنج لگا جویں وارڈ دے باہر کھلے گھپ ہیرا بولی ہوئی سارے شہر نوں اپنے
کلاوے وچ کئی جا رہیا اے۔





میاں محمد بخشؒ

پنجابی دے عظیم صوفی شاعر میاں محمد بخشؒ ۱۸۳۰ء نوں علاقہ کھڑی دے اک پنڈ چک
ٹھاکرہ وچ میاں شمس الدین دے گھر پیدا ہوئے۔ میاں شمس الدین حضرت پیر شاہ غازی قلند
دے گدی نشین سن۔

میاں محمد بخشؒ نے مڈھلی تعلیم اپنے والد کو لوں حاصل کیتی۔ غیر سموال شریف دے
مکتب وچ حافظ محمد علی تے حافظ ناصر دے شاگرد ہو گئے۔ اوہناں کو لوں فارسی، عربی
دے ادب دے نال نال تفسیر، فقہ، حدیث دی تعلیم حاصل کیتی۔ میاں شمس الدین دی وفات
مگروں اوہناں دے وڈے پتر میاں بہاول بخش گدی نشین ہوئے تے حضرت میاں محمد بخشؒ
کشمیر دی سیر نوں نکل گئے۔ ایس سفر دوران آپ نے بزرگاں دے مزاراں اُتے حاضری
دتی تے کئی عالماں کو لوں فیض حاصل کیتا۔ جدوں میاں بہاول بخش دا انتقال ہویا تے آپ سجادہ
نشین ہوئے۔ آپ نے ساری حیاتی ویاہ نہیں کیتا۔ آپ ہر ویلے رب دی یاد وچ ڈبے
رہندے سن۔ آپ نے جنوری ۱۸۹۷ء نوں کھڑی شریف وچ وفات پائی۔ آپ نے کل
ستاراں کتاباں لکھیاں جیہناں وچوں سیف الملوک۔ قصہ سخی خواص خاں۔ قصہ منصور
شیریں فرہاد۔ مرزا صاحبان تے سوہنی مہینوال مشہور نیں۔ پر آپ دے قصہ سیف الملوک
نوں شہرت عام تے بقائے دوام حاصل ہوئی۔ آپ نے ایس قصہ وچ تصوف دے
مضامین بیان کیتے نیں، ناے اخلاقی درس دتا اے۔ آپ نے ایس مثنوی وچ عشق داسفرتال
بنا کے پیش کیتا اے ناے زمانے دے دکھ درد اپنے ذاتی دکھ درد بنا کے بیان کیتے نیں۔
ایس توں اڈا ایہہ کوشش تے عمل دی اچھی تے سچی مثال اے۔ ایہہ حمد اوہناں دی کتاب
تحفہ رسولیہ وچوں لئی گئی اے۔



اَوّل حمد خداوند تائیں جو خلقت داسائیں
نا بُودوں جس بُود بنایا ہر اک صورت تائیں

صنعت اُسدی تھیں سبھ ہو یا کیا کیڑے کیا ہاتھی
آپو آپ کرے کم سارے کوئی ہتھیار نہ ساتھی

دو حرفاں تھیں پیدا کیتے لوح قلم جگ سارے
کُن فیکون محمد بخشا واہ قدرت دے کارے

آپ کر گئے خواہش کر کے اربع عنصروں کوئی !
ترے قسماں پیدائش اوس تھیں رنگ رنگی ہوئی

ہک جماد ہوئے اوس وچوں نہ اوہ ہلدے جھلکے
ہو ر نبات حیات نہ مرنے پھلے پھلے جھلکے

حیوانات کیتے پھر ترپے صاحب جسمماں جاناں
قسم ہزار اٹھاراں کیتی دُنیا تے حیواناں

صورت جد اجد ہر اک دی علم اوئے درج آئی
رنگارنگ بنائے کھانے دیندا ہر ہر جانی

اے کریمائے رحیمائے ستار غفارا
میں بُرے دا بھلیاں پچھے ہر جا کر چھکارا



حفیظ تائب

پروفیسر حفیظ تائب ضلع گوجرانوالہ دے اک پنڈ احمد نگر وچ ۱۴ فروری ۱۹۳۱ء نوں پیدا ہوئے۔ آپ دے والد حاجی چراغ دین مدرس سن۔ بال پن دے عبد الحفیظ نے وڈھلی تعلیم اپنے والد دے مدرسے وچوں حاصل کیتی۔ میٹرک دا امتحان احمد نگر دے ہائی سکول وچوں پاس کیتا۔ فیر زمیندار کا لچ گجرات توں ایف ایس سی پاس کر کے واپڈا وچ ملازم ہو گئے۔ ملازمت دے دوران آپ نے تعلیم دا سلسلہ وی جاری رکھیا۔ پنجابی فاضل توں بعد بی اے تے ایم اے پنجابی دے امتحانات پاس کیتے۔ واپڈا توں ریٹائرمنٹ لے کے پنجاب یونیورسٹی دے شعبہ پنجابی وچ استاد مقرر ہو گئے، ۱۹۷۷ء وچ حج کیتا تے روضہ رسول اُتے حاضری دتی۔ پنجاب یونیورسٹی توں ۱۹۹۱ء وچ ریٹائر ہوئے پر ایس شعبے نال حالے وی سمبندھ قائم اے۔

حفیظ تائب اردو تے پنجابی دے عظیم نعت گوئیں۔ ادھناں دیاں پنجابی نعتاں دا اک مجموعہ ”بک متراں دی“ دے عنوان نال ۱۹۷۸ء وچ شائع ہویا۔ اردو نعتاں دے دو مجموعے ”صلو علیہ وآلہ“ تے ”سلمو اسیلما“ دے ناناں نال چھپ چکے نیں۔ رسول مقبول صلی اللہ علیہ وسلم دی نعت گوئی حفیظ تائب دی کچھان اے۔ آپ نے اپنے ذاتی دکھ درد تے سماجی کرب نوں رسول کریم صلی اللہ علیہ وسلم دی ذات مبارک دے ویلے نال پیش کر کے پنجابی نعت وچ اک دکھڑے تے نوکیلے روپ نوں نمایاں کیتا۔ پہلی واری پنجابی نعت وچ گھر وکے تے سماجی مٹلے نبی پاک دے واسطے نال حل کرن دے جتن کیتے نیں آپ پنجابی دے مشہور نقاد وی نیں۔ آپ دے تنقیدی مضموناں دا مجموعہ ”پن چھان“ ۱۹۷۸ء وچ چھاپے چڑھیا۔ ایس توں اڈ آپ نے پیر فضل گجراتی دیاں نعتاں دا مجموعہ ”قطبی تارا“ مرتب کر کے شائع کیتا۔

نعت

سوہنہ سائیں سوہنہ ہادیؑ جتناں انساناں دا ہادیؑ
 نورِ لیادن والا مُرسلؑ رحمت و نڈن والا ہادیؑ
 اوہدیاں خبراں دیندا آیا آیا جیہڑا جیہڑا ہادیؑ
 نواں نظام انساناں نوں دے کے عالم نواں دکھایا ہادیؑ
 بخش گیا منشورِ اسانوں حج دا خطبہ دیندا ہادیؑ
 رب نے نعمت پوری کیتی قدراں نوں چمکایا ہادیؑ
 اوہے ہتھ ویلے دیاں اگاں فاصلیاں دالڑا ہادیؑ
 حشر دے روز شفاعت کسی سچے رب دا سچا ہادیؑ
 تائب مگدی گل مُکائیے
 کوئی نہہیں اوہدے ورگاہادیؑ



بابا فرید گنج شکر

بابا فرید الدین مسعود گنج شکر ملتان دے موضع کوٹھیوال وچ جمال الدین سلیمان دے گھر ۸۸۶ء نوں پیدا ہوئے۔ آپ دے دادا قاضی شعیب بومہت وڈے عالم سن تے آپ دی والدہ قمر سم بی بی نیک تے پرہیزگار خاتون سی۔ بابا جی نے مڈھلی تعلیم اپنی والدہ کو لوں حاصل کیتی تے بچپن وچ ای زاہد تے عابد مشہور ہو گئے۔

آپ نے مولانا منہاج الدین ترمذی کو لوں قرآن، تفسیر، فقہ، حدیث تے منطق دی تعلیم پائی۔ اک دیہاڑے تفسیر نافع پڑھ رہے سن پئی حضرت بختیار کاکی جنال ملاقات ہو گئی۔ آپ نے اوہناں دے ہتھ اُتے بیعت کر لئی تے اوہناں توں روحانی فیض حاصل کیا۔ بابا جی نے بغداد، بخارا، ریستان، خراسان، قندھار تے غزنی دا سفر اختیار کیا۔ بعد وچ دلی چلے گئے تے اپنے مرشد دی خدمت وچ رُجھ گئے۔ فیر مرشد دے حکم نال ہانسی جا کے دین اسلام دی تبلیغ کر دے رہے۔ مرشد دے وصال مگروں دلی آئے تے کچھ چیرا تھے قیام کرن دے بعد اجودھن (موجودہ پاکستان) آ گئے تے ایتھے بومہت سارے لوکاں نوں مسلمان کیا۔ بابا جی نے پاکستان وچ ای ۱۲۸۰ء نوں انتقال فرمایا۔ آپ دے مزار اُتے ہر سال ۵ محرم نوں عرس ہوندا اے تے میلہ لگدا اے۔

بابا جی پنجابی زبان دے موڈھی شاعر نیں۔ آپ اُچ پدھر دے عالم عظیم صوفی تے مبلغ سن۔ آپ نے نیکے بول لکھے، جیہناں نوں شلوک وی آکھیا جاندا اے۔ ایہناں دے کچھ بول قرآن پاک دیاں آیتاں دیاں عملی تفسیراں تے حدیثاں دے ترجمے نیں۔ آپ دی شاعری وچ دنیا دی بے ثباتی، ہجرتے فراق دی کیفیت، قرآن دی سچی تعلیم

تے اخلاقی قدراں دی پہچان دے اُچے نمونے موجود نیں۔ سوز، گداز تے سادگی آپ
دی شاعری دیاں خوبیاں نیں۔

شلوک

اُٹھ فریدا وضو ساجِ صبح نماز گزار
جو سر سائیں نہ نہیں سو سر کپ اتار

فریدا کالے مینڈے کپڑے، کالا مینڈاویں
گناہیں بھریا میں پھراں لوک کہیں درویش

رُکھی ٹکلی کھاء کے ٹھنڈا پانی پی
فریدا ویکھ پرائی چوہ پٹری نہ تر سائیں جی

فریدا خاک نہ نندیے، خاکو جیڈ نہ کوئے
جیوندیاں پیراں تلے، مویاں اُپر ہوئے

فریدا بے توں عقل لطیف، کالے لکھ نہ لیکھ
اپنے گریوان میں، سر نہواں کر ویکھ

فریدا کوٹھے منڈپ ماڑیاں ایت نہ لایے چت
مٹی پئی اتو لوں کوئی نہ ہو سی، مست



شاہ حسینؒ

شاہ حسینؒ ۱۵۳۹ء نوں ٹکسالی دروازہ لاہور وچ شیخ عثمان دے گھر پیدا ہوئے۔ آپ دے دادا کلجس رائے ہندوؤں مسلمان ہوئے سن۔ آپکے والد شیخ عثمان کھڈی داکم کر دے سن۔

شاہ حسینؒ نے مڈھلی تعلیم گھر وچ ای حاصل کیتی۔ فیر مولوی ابوبکر دے مکتب وچ داخل ہو کے بارہاں ورھیاں دی عمر وچ قرآن پاک حفظ کیتا۔ دنیاوی علوم حاصل کرن مگروں حضرت بہلول دریائی گوہر روہانی فیض حاصل کیتا۔ آپ ساری رات راوی کنڈھے کلام پاک دی تلاوت کر دے، سویرے داتا صاحب دے مزار تے حاضری دیندے تے زہد تے عبادت وچ مصروف رہندے۔

اک دیہاڑے تفسیر مدارک پڑھیاں ہوئیاں آپ اُتے سرستی تے بے خودی طاری ہو گئی۔ سرستی دا ایہہ عرصہ پنچھی ۲۵ ورھے رہیا۔ ایس دوران آپ دی ملاقات مادھولال نال ہوئی۔ جیہڑا آپ دیاں کرامتاں ویکھ کے مرید ہو گیا تے اسلام قبول کر لیا۔ شاہ حسینؒ نے ۱۵۹۹ء نوں انتقال فرمایا تے اوہناں مگروں مادھولال گدی نشین ہويا۔

شاہ حسینؒ نے پنجابی وچ صرف کافیاں لکھیاں۔

آپ دیاں کافیاں وچ تصوف دے بوہت سارے مستیاں دا ذکر اے۔ آپ موسیقی دے ماہر سن، ایس پاروں آپ دیاں کافیاں وچ موسیقی کٹ کٹ کے بھری ہوئی اے آپ نے چرخے نوں علامت بنا کے چرخے دے سارے انگاں دے حوالے نال بندے نوں نیک عملاں دی تلقین کیتی اے۔ آپ دیاں کافیاں وچ علامتاں دا خوبصورت استعمال اے ایس توں اڈسورتے گداز، ہجرتے فراق تے مت دیاں کلاں آپ

کافیاں

①

ربا میرے حال دا محرم تُوں
اندر تُوں پئے باہر تُوں پئے، روم روم وچ تُوں
تُوں پئے تانا، تُوں پئے باتا، سبھ کجھ میسر تُوں
کہے حُیْن فقیرِ ناناں، میں ناہیں سبھ تُوں

②

تی تینوں رب نہ بھلے، دُعا فقیراں دی ایہا
رب نہ بھلی ہو سبھ کجھ بھلی رب نہ بھلن جیہا
سونارو پیا، سبھ چھل ویسی عشق نہ لگدا لیہا
ہورتاں نال ہیندی کھڈیندی، شوہ نال گھونگھٹ کیہا
چارے نین گڈا وڈ ہوتے، وچ وچولا کیہا
عشق چو بارے پاتو جھاتی ہن تینوں عنم کیہا
آیے دی سونہہ بابل دی سونہہ گل چنگیر ڈی ایہا
جس جو بن دا تُوں مان کریندی سوجل بل تھیں کیہا
کہے حُیْن فقیرِ سائیں دا، مرناں تاں مانا کیہا

حضرت سلطان باہو

سلطان العارفین حضرت سلطان باہو ۱۶۳۱ء نوں شور کوٹ دے نیڑے اک پنڈ
 قہرگاں وچ اک درویش بازید محمد دے گھر پیدا ہوئے۔ سلطان باہو دی
 والدہ داناں بی بی راستی سی، جس نے سلطان باہو دی تعلیم تے توجہ دینے دھنگ
 نال ایس طرحاں کیتی پئی اوہناں نوں تعلیم حاصل کرن لئی کسے مکتب وچ داخل ہون دی
 لوڑ نہ رہی۔ صرف روحانی فیض حاصل کرن واسطے پہلے حبیب اللہ قادری دے مرید
 ہوئے، فیر دلی جا کے پیر عبدالرحمن دہلوی دی صحبت وچ رہ کے روحانی منزلوں طے
 کیتیاں۔

اوہناں نے واہی بھیجی داپیشہ اپنایا۔ آپ فارسی تے عربی دے وی اُچے
 عالم سن پنجابی وچ آپ دے صرف ایات بلندے نیں جیہڑے سی حرفی دی ہیئت
 وچ لکھے گئے نیں۔ ایہو ایات آپ دی شہرت تے مقبولیت داسبب نیں۔
 آپ نے دین اسلام دی تبلیغ نوں حیاتی دامن بنایا تے ہزاراں غیر مسلمان
 نوں مسلمان کیتا۔ آپ نے ۱۶۹۷ء نوں وفات پاتی تحصیل شہر کوٹ دتھ آپ دا مزار روحانیت
 دامرکز اے۔

”ایات سلطان باہو“ پہلی واری ۱۸۹۱ء وچ شائع ہوتے۔ ایہدے وچ ہر
 بند دے چار چار مصرعے نیں۔ ہر بند حرف ابجد دے تریہہ حرفاں وچوں کسے نہ کسے حرف
 نال شروع ہوندا اے، ایس لئی ایہناں نوں سی حرفی اکھیا جاند اے۔ آپ دے کلام وچ
 سوز، سرمستی، معرفت تے موسیقی موجود اے۔ آپ نے پنجابی شاعری وچ مُرشد دے تصور نوں
 سوہنے انداز وچ پیش کیتا۔ انسان نال محبت تے خدا نال عشق آپ دے کلام دا امتیازی

نشان لے۔ ایس توں اڈ آپ دا کلام بلند مہمتی، دنیا توں نفرت تے صوفیانہ مسائل نال
بھریا ہو یا لے۔ آپ دیاں فارسی کتاباں دی تعداد ۴۰۰ دے لگ بھگ دستی جاندی لے۔

ابیتا

الف :- اللہ چنبے دی بُوٹی میرے من وچ مُرشد لائی ہو

نفی اثبات دا پانی ملیس ہر رگے ہر حباتی ہو

اندر بُوٹی مُشک مچایا حباں پھٹن پر آئی ہو

چیوے مُرشد کامل باہو جیس ایہہ بُوٹی لائی ہو

جودم غافل سودم کافر سانوں مُرشد ایہہ پڑھایا ہو ج :-

سُنیا سخن کتیاں کھل اکھیں، اسان چت مولاول لایا ہو

یکتی جان حوالے رب دے، اسان ایسا عشق کمایا ہو

مرن تھیں اگے مر گئے باہوتاں مطلب توں پایا ہو

دل دریا سمندروں ڈونگھے کون دلاں دیاں جانے ہو د :-

وِپے بیڑے وِپے جھیرے وِپے وِپے نہ جانے ہو

چوداں طبق دے دے اندر تنبو وانگوں تانے ہو

جودل دا محرم ہووے باہو سوتی رب پہچانے ہو

نال کنگی سنگ نہ کریئے، گل نوں لاج نہ لایئے ہو ن :-

تُمے تر بوز مول نہ ہوندے، توڑے توڑ کتے لے جایئے ہو

کاٹواں دے نیچے ہنس نہ تھیندے توڑے موتی چوگ چکایئے ہو

کوڑے کھوہ نہ مٹھے ہوندے باہو، توڑے سے مناں کٹ پایئے ہو



شاہ مراد

شاہ مراد دی حیاتی دے حالات تے واقعات اُتے ویلے دی کھڑی ہوئی اے۔
 مولابخش گشتہ ہوراں تے اپنے ”پنجابی شاعراں دا تذکرہ“ وچ ایہناں نوں بارھویں
 صدی ہجری دا اک صوفی طبع بزرگ آکھیا اے۔ آپ خانپور تحصیل و ضلع چکوال وچ
 پیدا ہوئے، آپ دے والد کرم علی شاہ صدیقی خاندان نال تعلق رکھدے سن۔
 حضرت میاں محمد بخش دے بقول مولوی محی الدین محدث ساکن گڑھ اتم سنگھ (جہلم)
 آپ دی اولاد وچوں سن۔

آپ دا کلام پہلی واری ۱۹۰۸ء وچ شائع ہويا۔ آپ فارسی، اردو تے
 پنجابی دے شاعر سن۔
 آپ دا کلام بزم ثقافت چکوال نے ”گلزار شاہ مراد“ دے ناں نال شائع کیتا اے،
 جیہدے وچ اٹھ غزلاں تے اک مثنوی شامل اے۔ آپ دے کلام دارنگ ڈھنگ
 پنجابی دی شعری روایت یعنی صوفیانہ سوچ نال بھریا ہويا اے، جس وچ سوز تے مستی،
 جوش تے ولولہ موجود اے۔ ایس توں وکھا بیات شاہ مراد، چرخہ تے نور نامہ وی آپ دے
 کلام دے مجموعے نیں، جیہناں وچ تصوف تے معرفت دے مضمون بیان ہوئے
 نیں۔

ابیات / دوہڑے

کدیں نہ کیتو عاقل بندے دل اپنے نوں سائیں ول
 بے خبرا تینوں خبر نہ کافی آج کل پرسوں ویسیں چل
 عمریتا سہ دُنیا پانی گھڑی وچ ویندی ساری گل
 پل پل دے وچ جپ صاحب نوں کیا کر سیں نہیں آں خون اہل



آرام دتوئی احمد پل پل بل بل تھسیواں	الف
حیات کیتوئی دل نوں آب حیا نی پیواں!	ح
مہار تساڈے ہتھ وچ پچھے لائے تریواں!	م
دیدار دکھائے پیارے تاں شاہ مراد میدواں	د



بالن میتوں برہوں کیتا تے دلبر خبر نہ کافی	ب
جل بل ہوئی ساہو ڈھیری تے واؤ سبھ اڈائی	
من انگار چہرا غ جیوں روشن دیکھے سبھ لو کافی	
شاہ مراد جل دیوا ہوویں تاں دیوے یار دکھائی	



علی حیدر ملتانی

علی حیدر ملتانی تارہویں تے اٹھارہویں صدی عیسوی دے اُچے تے سچے صوفی شاعر
 نیں۔ آپ پہلی شعبان ۱۲۹۰ھ دے مطابق ۱۶۹۰ء نوں موضع چونتہ ضلع ٹوبہ ٹیک
 سنگھ وچ پیدا ہوئے۔ آپ دے والداناں شیخ محمد امین سی۔ آپ نے مڈھلی تعلیم اپنے
 والد کولوں حاصل کیتی تے بعد وچ اپنے عہد دے مروجہ علوم اُتے عبور حاصل کیتا۔
 آپ دے مُرشداناں خواجہ فخر الدین دہلوی سی۔ آپ اک عرصے تیکر ملتان شہر وچ رہندے
 رہے۔ آئے دولے دے علاقے وچ آپ دے علم، فضل، زہد و عبادت تے ولایت
 دیاں دُھماں پئے گئیاں سُن تے بوہت سارے لوک آپ کولوں ظاہری تے باطنی فیض
 حاصل کرن آؤندے سن۔ آپ ۱۱۹۶ھ دے مطابق ۱۷۷۷ء نوں فوت ہوئے تے چونتہ
 وچ آپ دامنزار بنایا گیا۔

آپ مُغلاں دے اخیرے دور دے شاعر نیں۔ وارث شاہ تے بُلھے شاہ ایس حوالے
 نال آپ دے ہم عصر بن دے نیں۔ پنجاب وچ ایہہ عہد ظلم و تشدد سیاسی بے چینی، سماجی
 اُکھڑ پکھڑ، معاشی بد حالی تے قتل و غارت دادوری۔ ایس عہد دے دُکھ درد نوں آپ
 نے محسوس کیتا تے لوکاں اندر اپنی شاعری راہیں امن، بھائی چارے، پیار محبت تے انسان
 دوستی دے چراغ روشن کیتے۔ آپ دی شاعری دسویں صدی اے کہ علی حیدر اک درویش صفت
 تے ربی معرفت وچ ڈُبے ہوئے اُچے انسان تے سچے صوفی شاعر سن۔ آپ دا کلام پہلی
 واری ۱۸۸۹ء وچ شائع ہو یا جس وچ سی حرفیاں تے قصہ ہیر شامل اے۔ علی حیدر نے
 مجاز تے حقیقت نوں اک سانجھ وچ پرو دتا اے۔

ابیتا (سی حرفی)

الف :- ایتھے اوتھے آساں آس تینڈی اتے آس تینڈے زوردا ای
 مہیں بھجھو اڑے تینڈے نیں آساں خوف نہ کھنڈے چوردا ای
 توں ای جان سوال جواب بھوسا نوں ہول نہ اکھڑی گوردا ای
 علی حیدر نوں رک تینڈی لے تینڈے باجھہ سائل ہوردا ای



ض :- ضرورت آسانوں کیہی سکھاں بین الاون نوں
 مسطر لگی دل وچ میسنوں پریم دی حرف لکھاون نوں
 رگ رگ تار طنبورے والی ناخن نال و جاون نوں
 راگ دی مالا گل وچ حیدر روپ بجن دا کاون نوں



ش :- شوق جنھاں تن یاردا ای سوئی جان دے راہ حبیب کنوں
 جنھاں وچ تاں درد نہ اک رتی کیہ جانن قدر طیب کنوں
 جنھاں عشق دی لذت نہ چکھی سوئی روندے وقت نصیب کنوں
 اوتھے میں چہیاں کئی لکھ دے حیدر، کون چچھدا نام غریب کنوں



بُلّھے شاہ

بابا بُلّھے شاہ دا اصل ناں سید عید اللہ شاہ سی، پر لوکاں وچ بُلّھے شاہ دے ناں نال مشہور ہوئے۔ آپ پنڈ اُچ گیلانیاں وچ ۱۶۸۰ء نوں سخی شاہ محمدریش دے گھر پیدا ہوئے، جیہڑے امام مسجد سن۔ اوہ روزگار دے سلسلے وچ ملک وال آئے تے فیر پنڈ پانڈو کے بھٹیاں وچ آباد ہو گئے۔

بُلّھے شاہ نے قرآن پاک اپنے والد کو لوں پڑھیا۔ فیر قصور دے عالم مولوی غلام مرتضیٰ دے مدرسے وچ داخل ہو گئے۔ اوہناں کو لوں تفسیر، حدیث، فقہ، منطق تے فلسفہ پڑھیا۔ روحانی تربیت واسطے اوہناں نے لاہور آ کے شاہ عنایت قادری دے ہتھ اُتے بیعت کر لئی۔ بُلّھے شاہ نوں اپنے مرشد نال اُنساں دی محبت تے عقیدت سی جس دا اظہار بُلّھے شاہ دے کلام وچ مل دا اے۔

بُلّھے شاہ نے حیاتی داک وڈا حصہ قصور وچ لنگھایا تے کچھ عرصہ لاہور دی رہے۔ بابا بُلّھے شاہ ہر ویلے رتی یاد وچ دُبے رہندے سن۔ آپ ۱۷۵۷ء وچ اپنے خالق حقیقی نال جا ملے تے قصور وچ ای دفن ہوئے۔

سید بُلّھے شاہ عظیم آفاقی صوفی شاعر نیں۔ اوہناں نے اپنے چاراں دا اظہار کافی وچ کیتا تے کافی دی صنف نوں ٹیسی اُتے اُپر اوتا۔ کافی توں وکھادہناں نے بارہاں ماہ، اٹھواریں، ستواڑے، سی حرفی تے دوہڑے وی تخلیق کیتے نیں پر اوہناں دیاں کافیاں نوں عالمگیر شہرت حاصل ہوئی۔ جیہناں وچ وحدت الوجود دا نظریہ بیان کیتا گیا اے۔ اوہناں کوں جذبے دی شدت بڑی ترکھی تے لہجے دی ندھڑکی اے۔ ایہدے نال نال اک فطری جوش تے جذبہ وی نظر آؤندا اے۔ اوہ ظاہر داری تے منافقت توں سخت نفرت کردے پیر اللہ تے اوہدے

آخری رسواں حال مبارک دے سن۔

اوہناں دی ربان رنھی برس بھری تے موسیقی وچ ڈبی ہوئی اے۔

کافی

اُٹھ جاگ گھراڑے مار نہیں
ایہہ سون تیرے درکار نہیں
کتنے ہے سلطان سکندر
موت نہ چھڈ دی پیر پیغمبر
سبھے چھڈ چھڈ گئے اڈمیر
کوئی ایتھے پائیدار نہیں
جو کجھ کر سیں سو کجھ پائیں
نہیں تے اوڑک پچھتوں تائیں
سخی کونج ونگوں کرو لائیں
کھنباں باجھ اڈار نہیں
بلکھا! شوہ بن کوئی ناہیں
ایتھے او تھے دوئیں سرائیں
سنبھل سنبھل قدم ٹکائیں
پھیر آون دوجی وار نہیں

○
اُٹھ جاگ گھراڑے مار نہیں
ایہہ سون تیرے درکار نہیں

سید وارث شاہ

دیس پنجاب دا ایہہ عظیم شاعر ضلع شیخوپورہ دے اک پنڈ جنڈیالہ شیرخان وچ ۱۷۲۲ء دے قریب پیدا ہویا۔ آپ دے والد داناں سید گل شیر شاہ سی۔ وارث شاہ نے پہلاں اپنے پنڈ دی میت دے امام کو لوں تعلیم حاصل کیتی فیہ قصور جا کے اوس ویلے دے عالم مخدوم حافظ غلام مرتضیٰ قصوری کو لوں درس نظامی دی تعلیم حاصل کیتی ایس دوران آپ نے قرآن، حدیث، تفسیر، فقہ، طب، نجوم تے ہور مذہبی علوم حاصل کیتے۔

روحانی تربیت واسطے سید وارث شاہ پاکستن چلے گئے تے بابا فرید گنج شکر ہوراں دی درگاہ دے سجادہ نشین دے مرید ہو گئے۔ فیہ مرشد دی اجازت نال ملکہ مانس پنڈ وچ چلے گئے تے میت دے امام بن گئے۔ امامت دے نال نال شعر آکھن دا شغل وی جاری رکھیا تے "ہیر رانجھا"، درگاہ شاہکار تخلیق کیتا۔

جدوں ایہہ علاقہ سکھاں دے حملیاں پاروں بد امنی دا شکار ہو گیا تے آپ اپنے آبائی پنڈ جنڈیالہ شیرخان پت آئے تے ایتھے ۱۷۹۸ء وچ وفات پائی۔ آپ دا مزار جنڈیالہ شیرخان وچ اسے جتھے ہر سال ساؤن دے مہینے عرس منایا جاتا اے۔ سید وارث شاہ نے اپنے لافانی شاہکار قصہ ہیر رانجھا توں اڈ معراج نامہ، اُشتر نامہ، چوڑھٹی نامہ، دوہڑے، باراں ماہ لکھے تے قصیدہ بُردہ شریف دا ترجمہ کیتا۔

وارث شاہ نے قصہ ہیر رانجھا ۱۱۸۰ھ مطابق ۱۷۶۶ء وچ تخلیق کیتا۔ ایس زمانے فتنے وچ اوہناں جیوندے جاگدے ہندے دسدے، دکھاں درداں وچ ڈبے ہوتے پنجاب دی سیاسی، سماجی، معاشی، مذہبی تے تعلیمی صورت حال دے پورے نقش اگھاڑے نیں۔ شاعری دے اعتبار نال قصہ ہیر رانجھا سب توں اچا تے سچا اے۔ وارث شاہ

دے علم تے فضل دے چراغ ہیر دے ورقے ورقے اُتے روشن نیں تے ایہدا شمار دُنیا
دے بہترین ادب وِچ ہوندا اے ۔

منتِ وزاری کردن برادران

اگھرا نجیبا بھاریہ نی تیرے، دیس اپنا چھڈ سدھارناہیں
ویرا امبری جایا جاناہیں، سانوں نال فراق دے مارناہیں

ایہہ بانڈیاں تے اسیں ویر تیرے کوئی ہور وچارو چارناہیں
بخش ایہہ گناہ توں بھایاں نوں کون جمیا جو گناہ گارناہیں

بھائیاں باہجھ نہ مجلساں سوہندیاں فی، اتے بھائیاں باہجھ بہارناہیں
بھائی مرن تے پوندیاں بھج بائہاں پناں بھائیاں پرھے پروارناہیں

لکھ اوٹ ہے کول وسندیاں دی بھائیاں گیتاں جیڈی کوئی ہارناہیں
بھائی دھاؤندے بھائی اُسار دے نیں بھائیاں باہجھ بائہاں ملی یارناہیں



ہاشم شاہ

ہاشم شاہ ۱۱۶۶ھ مطابق ۱۷۵۲ء نوں تحصیل اجنالہ ضلع امرتسر دے اک پنڈ جگدیو کلاں وچ حاجی محمد شریف دے گھر پیدا ہوئے۔ روایت اے پئی آپ دے والد نے کئی حج کیتے سن۔ ہاشم شاہ ٹڈھلی تعلیم اپنے والد کو لوں حاصل کیتی۔ پنڈراں ورہیاں دی عمر وچ یتیم ہو گئے۔ اوس ویلے تیکراوہ کئی زباناں تے علوم سکھ چکے سن۔ آپ نے طب تے علم نجوم وچ وی مہارت حاصل کیتی۔ رمل تے نجوم امرالہ بٹالوی کو لوں سکھیا تے طب دی تعلیم اپنے والد تے چاچے کو لوں حاصل کیتی۔

روحانی تعلیم واسطے آپ نے پیر نجات جمال نوں مرشد بنایا۔ آپ معرفت دے اپنے درجے اُتے فائز سن۔ درویشی تے فقیری بھاوچ کٹ کٹ کے بھری ہوئی سی۔

آپ دی شہرت مہاراجہ رنجیت سنگھ دے دربار تک اپڑی۔ اوس نے آپ دی بڑی آدر بھاء کیتی تے سیالکوٹ دے علاقے تھرپال وچ اک جاگیر دتی۔ ہاشم شاہ ہوریں جگدیو توں ہجرت کر کے تھرپال آگئے تے ایتھے ای ۱۸۲۱ء نوں انتقال فرمایا۔ ہاشم شاہ نے اک بھرویں علمی، ادبی، عملی تے صوفیانہ حیاتی گزاری اے۔ آپ نے پنجابی، فارسی، عربی تے ہندی وچ شاندار تخلیقی ورثہ چھڈیا اے۔ پنجابی زبان وچ سستی پنوں، ہیر رانجھا، سوہنی مہینوال، شیریں فریاد، قصہ محمود شاہ غزنوی، دوہڑے، ڈیوڑھے، لیلیٰ مجنوں تے سی حرفی لکھی اے۔

آپ نوں شہرت قصہ سستی پنوں پاروں حاصل ہوئی۔ ایس قصے وچ فطری سوز درد تے پیڑ دا بھرواں بیان اے۔ ایس توں اڈ مرقع نگاری، منظر نگاری، کردار نگاری تے جذبات نگاری دے اعلیٰ نمونے موجود نیں۔ ایس قصے وچ زبان تے بیان ہنسکری

بصیرت تے فتنی عظمت موجود اے، نالے پنجاب واسیاں دے دلاں دیاں دھڑکنیں
نیں۔

دوہڑے

کٹھے شاہ سکندر دارا اتے جام گیا کت جم دا
تھڑکن دیو جیہناں دی تیغوں اتے دھول پیانیت کم دا
ڈھونڈیاں خاک تنہاں نہیں لجدی ایہ جگت بُرا گھر غم دا
ہاشم جان غنیمت دم نوں بھلا کیہ بھروا سودم دا
اکے تھاؤں نہ وگدیاں ندیاں نہیں اکے طور لوکا تئی!
اے دل پکڑ دلیری دل دی کر سوچ وچ پار نہ کافی
رل مل بہن ہمیش نہ رہندا اتے کیوں نت رہگ جدائی
ہاشم فتح آسان تنہاں نوں جیہناں ہمت یار بنھائی
اک بہہ کول خوشامد کر دے پر غرضی ہون کیمنے!
اک بے پرواہ نہ پاس کھڑوون پر ہون یار نگینے
کونجاں وانگ ہزار کوہاں تے ادھناں شوق وکھو وکھو سینے
ہاشم ساجن کول ہمیشہ بھانویں وچھڑے ہون مہینے
بے بنیاد کریں بنیاداں توں کھول عفتل دی طاق
جس دن خرچ لہیں گا سارے ایہ خرچ رہگ نہ باقی
سو سیمان کریں کھڑو جاں اتے ذرا نہ رہیں عاقی
ہاشم سمجھ بہو د پیارے توں خاکی پس بن حساکی

خواجہ غلام فرید

خواجہ غلام فرید فاروقی خانوادے نال تعلق رکھدے سن آپ دے وڈو ویسے حجاز مقدس توں ہجرت کر کے پہلاں سندھ تے فیر ملتان وچ آباد ہوئے۔ بعد وچ ڈیرہ غازی نخل دے اک پنڈ مٹھن کوٹ وچ آن وے۔ کجھ چڑیاہہ خاندان بہاولپور دے اک پنڈ چاچڑاں وچ وی رہیا۔

خواجہ غلام فرید ۱۸۴۵ء نوں خواجہ خدابخش دے گھر پیدا ہوئے۔ آپ داتا گنجی ناں خورشید عالم سی۔ آپ نے اٹھاراں ورہیاں دی عمر وچ قرآن پاک حفظ کیتا۔ فیر بہاولپور دے نواب صادق محمد دی درخواست اُتے آپ احمد پور شرقیہ دے محل وچ چلے گئے تے او تھے مولانا قائم الدین تے ملک غلام محمد کو لوں دینی تے دنیاوی علوم حاصل کیتے۔ آپ تاسیخ جغرافیہ، تقویم، طب تے فلسفہ دے وی ماہر سن تے کئی زبانیں اُتے عبور رکھدے سن۔ آپ نے اپنے وڈے بھرا خواجہ فخر الدین فخر جہاں کو لوں روحانی تعلیم تے تربیت پائی تے وڈے بھرا دی وفات مگروں گدی نشین ہوئے۔ آپ عبادت گزار، خلوت پسند تے قدرتی نظائیاں دے ولادہ سن آپ نے ۱۲۷۵ھ نوں حج دی سعادت حاصل کیتی اخیر ۲۴ جولائی ۱۹۰۱ء نوں ایس فانی دنیا توں کوچ کر گئے۔ آپ دامرا مٹھن کوٹ وچ اے، جتھے ہر سال عرس ہوتا اے۔

خواجہ صاحب اُچ پدھر دے صوفی شاعر سن۔ آپ نے اپنے خیالات، سدھراں تے جذبیایں دا اظہار کافی دی صنف وچ کیتا اے۔ آپ نے کافی نوں ٹیسی اُتے اپڑ دتا اے۔ آپ دیاں کافیاں وچ مسئلہ وحدت الوجود، روہی دے منظر، حیاتی دافلسفہ، مُرشد و التصوّ، فطرت پسندی، عبادت تے ریاضت تے ربوبیت دے سوہنے مضمون موجود نیں۔ آپ

نہ صورت تے مٹھڑی زبان ورتی اے جیہدے وچ موسیقی دا عنصر اگھڑاں اے۔

کافی

ہر صورت عین عیان آیا	بن دلبر شکل جہان آیا !
کتھے نوح کتھاں طوفان آیا	کتھے آدم تے کتھے ثیت نبی
کتھے یوسف وچ کنعان آیا	کتھے ابراہیم خلیل نبی
کتھے موسیٰ بن عمران آیا	کتھے زکریا کتھے یحییٰ اے
کتھے اسد اللہ ذیشان آیا	بویکرہ عرش عثمان کتھاں
کتھے مرشد فخر جہان آیا	کتھے حسن حسین شہید بنے
محبوب بچے مقبولان دا	کتھے احمد شاہ رسولان دا
سلطانان سر سلطان آیا	استاد نفوس عقولان دا

خاموش سرید اسرار کنوں
چپ بے ہودہ گفتار کنوں
پر غافل نہ تھی یار کنوں
ایہو لاریبی فرمان آیا



مولوی غلام رسول عالمپوری

مولوی غلام رسول ۱۸۴۹ء وچ پنڈ عالم پور تحصیل دسوہہ ضلع ہوشیار پور وچ پیدا ہوئے۔ آپ دے والداناں میاں مراد بخش سی، جیہڑے قوم دے گجر سن۔ مولوی غلام رسول نے مڈھلی تعلیم مولوی حامد کولوں حاصل کیتی۔ فیر پنڈ غازیاباں دے مولوی محمد عثمان کولوں اردو، فارسی تے عربی پڑھی۔

جدوں سلوک دیاں منزللاں طے کرن دا خیال آیا تے درگاہ حضرت نظام الدین اولیاء دلی دے سجادہ نشین دے مرید ہو گئے تے اوہناں کولوں روحانی فیض حاصل کیتا۔ کجھ عرصہ پنڈ میر پور وچ مدرس وی رہے۔ فیر ملازمت چھڈ کے مسیت دی امت تے حکمت اختیار کر لئی ۱۸۷۳ء وچ احسن نقص و رگشاہکار تخلیق کیتا۔ ایس توں اڈ داستان امیر حمزہ، سستی پنوں تے درد بھریاں چٹھیاں لکھیاں۔ آپ دے کلام وچ ہجرتے فراق دے بھانجھڑ مچدے نیں، درداں تے پیڑاں دے لبو نکلدے نیں، ہاواں تے کراہاں دے دھوئیں دھندے نیں۔ آپ نوں عربی تے فارسی زبانناں اُتے عبور حاصل سی۔ ایس لئی آپ پنجابی قصیاں وچ چتھے موزوں سمجھدے کن عربی تے فارسی دے لفظ استعمال کر دے سن۔ ایہ وجہ اے پئی آپ دے کلام وچ عربی تے فارسی لفظاں دی ورتوں بوہت زیادہ اے۔

آپ دے کلام وچ فصاحت، بلاغت، اُچ خیالی تے روانی سبھے کجھ موجود اے۔ اپنے ۱۸۹۲ء وچ وفات پائی تے اپنے پنڈ عالمپور وچ ای دفن ہوئے۔ آپ دے کلام وچ منظر نگاری، جذبات نگاری تے کردار نگاری توں اڈ جزئیات نگاری دے سچے نمونے ملدے نیں۔ آپ قادر الکلام شاعر سن۔ زبان تے بیان اُتے عبور رکھدے سن۔

حضرت یوسف علیہ السلام اپنی ماں دی قبر تے

قبر یوسف دی مادر سندی راہ وچ ظاہر ہوئی

اچھلیا دل رویا یوسف دا ویکھ میرا دکھ مائی

دیکھدیوں جے درد میرے نوں جھل نہ سکدی غم نوں

دل تھھر پھٹ پڑے ہوئے میرے دیکھ الم نوں

دکھ میرے دے لے پیٹ دے دُور دُڑاڈیاں واناں

دل پُرم غم تن دکھیں بھریا جگر بلیں نیاں لاٹاں

اے مادر فرزند تیرا میں جو نازاں وچ پلایا

پر دیساں دے پندھ دُور اٹے ظلموں بدھا چلیا

میں وچ گود تیری سکھ پاتے دکھ پئے اج بھلے

دید پر تھیں طالع ٹٹے وچھڑ گئے پیارے

پر دیساں وچ بنھ لے چلے مینوں لوک پرانے

ہو پر دیسی میں تڑ چلیا درد جب گرنوں کھانے

اے مادر میں تیریا جاندا میریاں تہند مہاراں

ناقمہ دھرے قدم دل دکھیں بھری غماں دیاں بھاراں

دیکھ میرا دکھ چھیکڑ واری میں مُڑ ملنا ناہیں

خاک و قدم تھیں گئی نصیبوں زار رویاں آہیں

انہاں مکانات تے مُڑ میری پھیر نہ ہونی پھیری

نہیں نہیں مُڑ دسنے میرے خاک و قدم تیری

ثرُبتِ پاک تیری دی دیدن میتھیں پتی پریرے
کیہ جاناں میں ہوسن میرے کس دھرتی وِچ ڈیسے

واہ دردا میں چھوڑ سدھاناں توڑ اجزا صبر دے

ایہہ گل بول شتر تھیں جھڑیا قدماں وِچ قبر دے

دیکھ مانی میں سنگل گل وِچ ہتھ پیاں ہتھ کڑیاں

بنھ شایا پکڑ شتر تے گھت پیراں وِچ ہڑیاں

نال فریب پدر تھیں مینوں جنگل ویر لیا تے

ویر کما تے دکھ پچائے قہر غضب سر چائے

ماریا مینوں ویریاں وانگوں تے دتیاں لڈائیاں

کھج جنگل وِچ کنڈیاں اندر پکڑ چمپیراں لائیاں

کر ننگا وِچ کھوہے سٹیا اتوں سنگ چلا تے

کرواناں پر دیسیاں تائیں ہوندے مل سدھائے

دیکھ مصیبت جو میں گزری میں چلیا کنعانوں

اج وداع ہن خبر نہ آگے کیمہ سروپے جہانوں



اُستاد عشق لہر

اُستاد عشق لہر داناں پنجابی شاعراں دی اوں معتبر تے مان جوگ پیڑھی دے شاعراں وچ سرکڑھواں ناں اے، جیہناں عظیم اسلامی مملکت پاکستان حاصل کرن دی جدوجہد دے دوران اپنیاں ساریاں تخلیقی قوتاں ایس اُچے مقصد واسطے وقف کر چھڑیاں سن۔ آپ لاہور وچ میاں خواجہ دے گھر ۱۸۶۹ء نوں پیدا ہوئے۔ اصل ناں چراغ دین سی آپ چوہڑہ مفتی باقر لاہور وچ رہندے سن۔

۱۸۵۷ء دی آزادی دی جنگ مکروں تحریک خلافت، غازی علم الدین شہید، مسجد شہید گنج تے جلیا نوالہ بارغ دے سانچے دے حوالے نال پنجابی مسلماناں وچ اک نویں لہر پیدا ہوئی۔ غیر جذوں قائد اعظم دی راہنمائی وچ علامہ اقبال دے سُفنے دی تعبیر پاکستان دے رُپ وچ اک حقیقت بن کے سامنے آون لگ پئی تے لاہور دے تاریخی اقبال پارک وچ ۱۹۴۷ء نوں پاکستان دے قیام دی قرارداد منظور ہو گئی۔ اوس سمے توں پنجابی شاعراں، ادیبان تے دانشوراں دیاں سوچاں تے قلمان دے رُخ پاکستان نوں قائم کرن ول مڑ گئے۔ اوہناں شاعراں وچ اُستاد عشق لہر داناں سب توں اُچالے۔

ڈاکٹر شہباز ملک دے مطابق ملک لال دین قیصر، کریم امرتسری، ڈاکٹر فقیر محمد فقیر، محمد دین میر، ظہیر نیازیگی، داتم اقبال، داتم، محمد بخش مسلم، امام دین مجاہد، صحرائی گورداسپوری، طالب جالندھری، ملک عطا، اختر لاہوری، حافظ امرتسری، جوگی جہلمی، حکیم ناصر، چراغ دین جونیکے، میراں بخش واقف، فیروز دین شرف، عبدالغفور اطہر، اطہر نظامی، موسیٰ امرتسری، نقشب ہاشمی تے اسماعیل متوالا دے ناں ایس سلسلے وچ ذکر دے قابل نیں۔ اُستاد عشق لہر ہوراں نے بھانویں ظاہری علوم حاصل نہیں کیتے پر اللہ تعالیٰ نے اوہناں نوں روشن دماغ دتا سی۔ آپ میاں فضل دین دے شاگرد سن۔ کجھ چریلوے کیرج شاپ وچ ملازمت کیتی۔

فیروز گار دے سلسلے وچ بصرہ تے افریقہ چلے گئے۔ ۱۹۳۹ء وچ ریٹائر ہوئے تے ۲۶ نومبر ۱۹۴۸ء نوں وفات پاتی۔

آپ برصغیر دے مسلماناں واسطے آزادی دی تڑپ دل وچ رکھ دے سن۔ زبان صاف ستھری تے شہری پنجابی شعراں وچ ورتدے سن۔ اوہناں دیاں کتاباں برطانوی اقبال، گل تے عاشق، دامن حضرت یوسف، پنجابی نظم، غیرت دا جھگڑا، نغمۂ پاکستان، عشق دی لہر، لوہیتاں مشہور نیں۔

کلام عشق لہر

مولا کرم کر بہند دے حال اُتے مسلمان ایہدا مسلمان ہووے
دلوں کڈھ کڈورتاں ساریاں نوں اک دوسر توں قربان ہووے
سارے فیصلے ہوں قرآن اُتے اگے وانگ اسلام دی شان ہووے
عشق لہر کہہ نیی دا واسطہ امی ایس ملک اندر پاکستان ہووے

دل دریا سی دولتاں روڑ حدے رہے ایہہ نہ سوچیا کجھ بچالیے
پانی وانگ جیہناں ساڈا مال پیستا ہُن اوہ کہن غلام بنا لیے
سُٹی چنگ حریفان نے وچ لکھاں بھانبر بھڑکیا کیوں بچالیے
چڑھیا بحرِ نفاق دا مارٹھاٹھاں لاوے ڈھانہ بنھ بنا لیے
بیڑی قوم دی گھمن گھیر اندر چپوونج مہانیوں لالیے
غیراں نال نہ نبھدی اے بھانی والی حصّہ اپنا ونڈ ونڈا لیے
ڈلھے بیراں دا وکڑیا کجھ ناہیں چُن چُن جے جھولی وچ پالیے
عشق لہر سب مشکلاں حل ہوون پاکستان جے کدے بنا لیے

احمد علی سائیں

احمد علی سائیں ۱۸۵۹ء نوں پشاور وچ پیدا ہوئے آپ دا اصل ناں احمد علی سی تے ماں بولی پشتو سی۔ اوہناں واجبی تعلیم حاصل کیتی۔ طبیعت وچ لا اُبالی پن سی ۱۹۱۸ء وچ راولپنڈی آگئے۔ فیر ساری حیاتی ایسے شہر وچ گزار دتی۔ شاعری وچ اُستادِ مضبوط شاگرد ہو گئے۔ طبع موزوں سی ایسی لہی بوہت چھیتی شعر آکھن لگ پئے۔

پوٹھوہار وچ خاص طور تے سارے پنجاب وچ عام طور تے اوہ بیست بازی تے چوبڑیاں پاروں بوہت مشہور نیں۔ سائیں ہر یں اخیر لی عمر۔ پشاور ٹرگئے تے اوہ تھے ای ۱۹۳۷ء نوں وفات پائی۔

احمد علی سائیں ہوریں اک فطری تے پیدائشی شاعر سن۔ اوہناں نے پہلاں فارسی تے پشتو وچ شاعری کیتی، پر راولپنڈی آکے پنجابی زبان دارس تے مٹھاس اوہناں دی تخلیقی قوت اُتے کھل گیا۔ اوہ اپنا کلام زبانی یاد رکھ دے سن تے شائع کراؤن دے خلاف سن۔ پہلی داری اوہناں دا کلام ۱۹۲۱ء وچ سائیں دی بسنت دے ناں نال شائع ہويا۔ بعد وچ ”کیات سائیں احمد علی مرحوم“ دے عنوان نال اک کتاب ۱۹۴۹ء نوں گجراتوں چھپی۔ اوہناں دی اک ہور کتاب ”تحفہ کمال“ دی چھپ چکی اے۔

سائیں ہوراں دے شاگرداں وچوں پیر فضل گجراتی، جوگی جہلمی، مرزا عبد الکرم تے غلام نبی کمال دے ناں مشہور نیں۔

آپ دے کلام وچ سادگی، رس، سوز، رندی تے متسی پور کا طرہاں مچھتی ہوتی اے۔ ایس توں دکھ تصوف تے اخلاقی مضمون وی سائیں دی شاعری دے خاص موضوعات نیں۔ کلام وچ پنجنگی تشبیہاں تے استعارے تے روزمرہ محاورے دی بندش کمال دی اے۔

سی حرفی / ابیت

الف - اڑی خودی تکبر نہ کر بندے، دس توں تے تیرا ممکن کتھے
 اوہ دارا سکندر محمود مٹ گئے دس اوہناں داناں نشان کتھے
 جس دے تخت نوں پریاں اڈانیاں سن وڈی شان والا ایمان کتھے
 سائیاں موت نے مارناہ کیتا مالک حکمت داتاہ لقمان کتھے

ل - لٹک کیا کچھ عشق دے بول دی اے ایہہ تال داجانے ہنصوب جانے
 بن بینائی کچھ نظر نہیں آسکدا حال زگرس دا چشم رنجور جانے
 کیسی تپش ہے حُسن دے جلویاں دی اس نوں جاکے کلمہ یا طور جانے
 سائیاں پارے کنڈھے دی یاس حسرت گھریا شوہ وچ بیڑی دا پور جانے

د - دُکھ جتھے او تھے سکھ ہوندا، جتھے سکھ او تھے دُکھ ہزار ناے
 جتھے غم او تھے شادمانیاں بھی، جتھے شادی او تھے غم اغیار ناے
 جتھے دل ہوندا سارا جسم او تھے، جتھے عشق او تھے شور شار ناے
 سائیاں ایہہ بھی رسم قدیم دی اے جتھے گل ہونے او تھے خار ناے

پیر فضل گجراتی

اصل نام فضل حسین سی، گجرات دے و سنیک سن۔ ایس لئی علم تے ادب دی دنیا وچ
فضل گجراتی دے نام نال مشہور ہوئے۔ ۱۸۹۷ء نوں پیر مقبول شاہ دے گھر پیدا
ہوئے، جیہڑے صوفی بزرگ شاہ دولہ دریائی دے سجادہ نشین سن۔

پیر فضل نے مڈھلی تعلیم جس وچ قرآن پاک توں وکھ عربی تے فارسی دیاں کتاباں سن،
اپنے والد کولوں پڑھیاں۔ بعد وچ میٹرک ۱۹۱۷ء وچ پاس کیتا تے اسلامیہ کالج لاہور وچ
داخل ہو گئے۔ فیر گھر وکی مجبوریاں پاروں تعلیم ادھوری چھڈ کے میونسپل کمیٹی گجرات وچ
ملازم ہو گئے۔ ایستھوں ای سپرنٹنڈنٹ دے عہدے توں ریٹائر ہوئے تے ۲۲ اگست
۱۹۷۲ء نوں انتقال فرمایا۔

پیر فضل گجراتی نوں بال پن توں ای مذہبی، علمی تے ادبی ماحول میسر سی۔ مرزا
نثار حسین مبصر نے اردو تے احمد علی سائیں ہوراں نے پنجابی وچ شعر لکھنے سکھائے۔
تھوڑے عرصے وچ ای پیر فضل گجراتی پنجابی غزل دی فکری تے فنی اعتبار نال شناخت
بن گئے۔ آپ دے کلام وچ بے پناہ روانی، تخیل دی اچی اڈاری تے سوچ دی
ڈنگھائی موجود اے۔ نوکیلے استعارے سوہنیاں تشبیہاں تے معنی خیز رمزاں آپ دی غزل
دیاں ٹومیاں نیں۔

آپ نے غزل توں وکھ عقیدت تے محبت بھریاں نعتاں وی لکھیاں نیں،
جیہناں وچ روایتی مضمون بیان کرن دی تھاں نویاں سوچاں تے نویں مہاڑ موجود
نیں۔ آپ دیاں نعتاں دا مجموعہ ”قطبی تارا“ دے نام نال چھاپے چڑھ چکیا اے۔ آپ
دیاں غزلاں دے دو مجموعے ”ڈونگھے پنڈے“ تے ”ٹگوراں“ چھپ کے لوکائی توں

مقبولیت دہی سد حاصل کر چکے ہیں۔

پیر فضل گجراتی پنجابی دی شعری ریت وچ اک عظیم غزل گو دے حوالے نال
سدا جیونڈے رہن گے۔

غزل

کیہ ہویا سینہ ونھ گیا یا جگر اساڈا چیر گیا
ایہہ خوشی اسانوں تھوڑی اے نہیں غالی تیر گیا
گل میری نسبت کیتی اے اک نویں لباساں والے نے
ایہہ لیراں لتھا کدھرے دا کیہ چمیرے وانگوں لیر گیا
جد ویکھن میرے سوہنے نوں سوہنے شرمندہ ہون پئے
گنتی وجدی پھوک چراغاں نوں اوہ جدھر مہر نہیر گیا
اکھاں وچ دوسے متی دے خوشیاں وچ لوہے آون پئے
اک جھٹ کھلوتا کول جدھے اوہ بدل اوہدی تقدیر گیا
بس اوہ دُنیا تے دین دیاں قسداں توں ہوا زاد گئے
پا اپنی زلفت مسل دی اوہ جہناں نوں زنجیر گیا

رل سونا ہٹی نال گیا جد سونے نوں ہتھ پایا میں
 اوہ ہتھ وچ لے کے مٹی نوں مٹی نوں کر اکیر گیا
 کے کول بہا کے فضل کدی میر دل دیاں گلاں سنیاں نہ
 میں مایا ہو یاد درداں دا راہواں وچ گھت دہیر گیا



ڈاکٹر فقیر محمد فقیر

ڈاکٹر فقیر محمد فقیر گوجرانوالہ شہر دے اک کشمیری خاندان وچ ۵ جون ۱۹۰۳ء نوں پیدا ہوئے آپ دے والد حکیم لال دین سن جیہڑے گوجرانوالہ دے مشہور حکیم سن۔

فقیر محمد فقیر نے مولوی رمضان کولوں قرآن پاک پڑھیا۔ فیر قاضی نذیر حسین کولوں عربی فارسی تے منطق دی تعلیم حاصل کیتی۔ طب آپ واجدی ہشتی پیشہ سی۔ ۱۹۱۵ء وچ میڈیکل کالج لاہور دی لیبارٹری وچ ملازم ہو گئے۔ کچھ عرصہ مگروں ”سرالوالہ چلے گئے“ حکمت شروع کر دتی تے ڈاکٹر فقیر محمد فقیر تہور ہو گئے۔

حکمت چھڈ کے لاہور آ گئے تے ٹھیکیداری شروع کر دتی پاکستان دی تحریک وچ حصہ لیا تے پنجابی زبان تے ادب دی خدمت نوں اپنا مشن بنا لیا۔ سبھ توں پہلاں اک رسالہ ”پنجابی“ دے ناں نال جاری کیتا۔ فیر پاکستان پنجابی ادبی اکیڈمی ”سورنال جڑ گئے“ تے دن رات اکیڈمی دی ترقی خاطر کم کر دے رہے۔ آپ نے نہ صرف پنجابی وچ مضمون، شاعری تے کتاباں لکھیاں سگوں دوجے عالماں تے فاضلاں کولوں وی پنجابی وچ لکھوایا۔ آپ نے بھروی علمی تے ادبی حیاتی گزار دی۔ اخیر ۱۹۷۴ء نوں وفات پائی۔

ڈاکٹر فقیر محمد فقیر ہوراں نکی عمرے ای شعر کہنے شروع کر دتے سن۔ شاعری وچ منشی ابراہیم عادل آپ دے استاد سن۔ آپ نے شاعری دی ہر صنف وچ طبع آزمائی کیتی۔ آپ نے غزل، نظم، نعت، مثنوی، دوہڑے تے رباعیاں لکھیاں۔ پر آپ دیاں رباعیاں بوہت مشہور ہوئیاں۔ ایس پاروں آپ نوں پنجابی داعمر خیام آکھیا جاندا اے۔

آپ اُچے تے سچے نقاد، محقق تے مرتب دی سن۔ آپ نے بوہت ساریاں کتاباں مرتب کر کے شائع کیتیاں تے ایس طرحاں آپ دیاں کوششاں پاروں کلاسیکی ادب ضائع

ہوں توں بچ گیا۔ آپ دیاں لکھتاں وچوں ”مواتے“ نیلے تارے۔ ”رباعیات فقیر“ چنگیاڑے
 ”صدائے فقیر“ پاٹے گلہیں۔ ”بیخ ہادی“ تے ”مہکے پھل“ مشہور نیں۔

غازی تے شہید

اللہ دے قلعے فولادی نیں دل جگرے پاک جواتاں دے
 ایہہ مان نماں لکھاں دادر دی دکھیاں انساناں دے
 راکھے رب آپ بنائے نیں ایہہ دوویں مالاں جاناں دے
 وارث نیں غازی دھرتی دے تے مرد شہید آسماناں دے



گل حقی توں سردارن دی ایہناں دی ریت قدیمی اے
 ضرب ایہناں دی فرعونیاں لئی موسیٰ دی ضرب کلیمی اے
 ایہہ جاناں وار نہ بھاندے نیں کیتے ہوئے قول زباناں دے
 وارث نیں غازی دھرتی دے تے مرد شہید آسماناں دے



بھوتے ہوئے خونی ظالم دا ایہہ نام نشان مٹاندے نیں
 ایہہ راکھے نیں مظلوماں دے طلباں دیاں اکھیاں لاہندے نیں
 بن بہندے سنگی ساتھی نہیں ایہہ جھوٹے شان گماناں دے
 وارث نیں غازی دھرتی دے تے مرد شہید آسماناں دے



ایہہ چڑھ کے چڑھ سٹو فاناں دے وانگر چڑھ دے جانے نیں
 لڑپین جے نال پہاڑاں دے مُڑ لڑ دے لڑ دے جانے نیں
 جانیاز دھنی تلواراں دے ایہہ مرد جری میہ اتناں دے
 وارث نیں غازی دھرتی دے تے مرد شہید اسماناں دے



حکیم شیر محمد ناصر

حکیم ناصر ہوراں دا اصل نال شیر محمد سی۔ ناصر تخلص کر دے سن۔ پیشہ حکمت سی ۱۹۰۸ء نوں حکیم الہ دین سندھو دے گھر لاہور شہر وچ پیدا ہوئے۔ بارہاں سال لاہور دی عمر وچ قرآن مجید حفظ کیتا تے نال نال اپنے والد کوں حکمت دی سکھدے رہے۔ بعد وچ طبیہ کالج لاہور توں حکیم حاذق دی سند حاصل کیتی۔ مزنگ لاہور وچ اپنا مطب کھولیا تے آخری ساہتیک انسانیت دی خدمت کر دے رہے۔ حکمت دے نال نال شعر و شاعری دا مشغلہ جاری رکھیا۔ استاد فیروز ہوراں کوں اصلاح لئی تے بڑی چھیتی حکیم ناصر لاہور دیاں علمی ادبی محفلاں تے مشاعریاں دی چند جان بن گئے۔

۴ جنوری ۱۹۷۲ء نوں دل دا دورہ جان لیوا ثابت ہویا تے خالق حقیقی نال جا ملے۔ حکیم شیر محمد ناصر پنجابی شعری ریت وچ نویں خیالاں، نویاں سوچاں تے نویں مہاڑاں دے نمائندہ شاعر نیں۔ آپ دے کلام وچ نویاں ادبی، سیاسی، سماجی تے معاشی تحریکاں دے نقش وی ملدے نیں تے پنجابی دی کلاسیکی شعری روایت دے پرچھانویں وی ایس طرحاں حکیم ناصر ہوراں نوں قدیم تے جدید شاعری دے سنگم دا شاعر آکھیا جاسکدا اے۔ آپ دی شاعری کلاسیکیت تے جدیدیت وچ یکار مضبوط پُل دا کم دیندی اے۔

۱۹۶۱ء وچ آپ دیاں غزلاں تے نظماں دا مجموعہ ”سحر اسُورج“ چھاپے چڑھیا۔ ایہ توں دکھ اپنی بولی تے اپنا اصلا ”دو جا مجموعہ“ اے۔ تحریک پاکستان دے حوالے نال حکیم ناصر نے آزادی دی جوت جگاؤن تے مسلم تشخص نوں ابھارن لئی بوہت ساریاں نظماں لکھیاں ایس طرحاں پاکستان بناؤن وچ آپ نے قلمی حصہ پایا۔ ایہ توں اڈ پنجابی زبان تے ادب دی خدمت آپ دا مشن سی۔

اپنی سہان

تُوں مسلم ہیں دنیا دے وچ تُوں اللہ دا جانی بن
 نبیؐ توحید دا بانی تیرا، تُوں وی توحید دا بانی بن
 دین تیرے دی ریس نہ جگتے تُوں وی تے لاثانی بن
 بندہ رب دا نبیؐ دی اُمت تے عامل قرآنی بن
 جد تیری دُنیا دی آگو تُوں وی امام زمانی بن

نہ پنجابی، نہ سرحدی، نہ سندھی مکرانی بن
 سب کچھ ہوندیاں سب تُوں پہلاں تُوں اک پاکستانی بن



دُنیا مادے تے پی مردی، تیرے ہتھ روحانی جیناں
 یجن دے اندر جا کے وی تے لوکاں ہونا یس تیرا جیناں
 تینوں کٹھا کرنا پیناں اے، لو کی جو پتے ڈوٹھن چیناں
 رسکاں وچ سکندر مرسی آب حیات خضر ہے پیناں
 ہتھیں دی کچھ کر اوتے شیرانہ تُوں شیر نہ بانی بن

نہ پنجابی نہ سرحدی نہ سندھی مکرانی بن
 سب کچھ ہوندیاں سب تُوں پہلاں تُوں اک پاکستانی بن



چن سورج توں پہلاں ہالی کر لے توں دھرتی دی سیوا
 دنیا دی ایہہ ریت ای پکّی سیوا دا بلدا تے میوا
 قوماں دی مُندری دا ہیرا توہیں اک انمُلا تھیوا
 تک خاں اپنے وڈیاں وکے کھہہ ہے سی اوہناں اشیوا
 اپنا آپ سہان کے ناصر توں جوہیں اوہ جانی بن

نہ پنجابی نہ سرحدی نہ سندھی مکھڑی بن
 سب کچھ ہونڈیاں سب توں پہلاں توں اک پاکستانی بن



دائم اقبال دائم

دائم اقبال دائم ۱۹۰۹ء نوں ضلع گجرات دے شہر منڈی بہاء الدین دے نیڑے موضع واسو وچ پیدا ہوئے۔ آپ دے والد داناں غلام محمد سی۔ دائم نے پرائمری اپنے پنڈ وچ تے دسویں جماعت تیک تعلیم منڈی بہاء الدین دے اسلامیہ ہائی سکول وچ حاصل کیتی، پھر وکی مجبوریاں پاروں میٹرک دا امتحان نہ دے سکے تے اپنے والدناں رل کے اپنا آبائی پیشہ کھوہ کڈھن دائم شروع کر دتا۔ شاعری وچ آپ دا کوئی استاد نہیں پر روحانی طور تے مولانا روم تے علامہ اقبال توں بوہت متاثر سن۔ آپ نے علامہ اقبال نال ملاقات دا شرف وی حاصل کیتا۔

دائم اقبال دائم اک عوامی شاعر سن۔ آپ دے من وچ آزادی دی تڑپ موجود سی۔ ایس لئی تحریک پاکستان وچ عملی تے قلمی حصہ لیا۔ اخیر ۱۳ اکتوبر ۱۹۸۳ء نوں وفات پائی۔ دائم اقبال دائم نے مذہبی، اخلاقی، سماجی، سیاسی تے روحانی موضوعاں اُتے ۷۷ دے لگ بھگ کتاباں لکھیاں جیہناں وچوں کمبل پوش، شاہنامہ کربلا، ابراہیم ادھم، پاک شمشیر آئینہ معرفت، سکندر تے قلندر، دل دریا دیاں موجاں، سوہنی سرکار، قصص الحسنین ہیلی مجنوں، ہیر سیال، شکوہ پاکستانی و جواب آسمانی وکر دے قابل نیں۔

دائم اقبال دائم اک درویش تے سیلانی شاعر سن۔ آپ دے کلام وچ عشق حقیقی تے مجازی اک دوجے نال رے ملے وکھالی دیندے نیں۔ آپ نے شاعری راہیں لوکاں اندر اخلاقی تے مذہبی قدراں نوں کھلاریا۔ ایس توں اڈ لوکاں دے دکھ درد تے مسائل نوں شاعری دا موضوع بنایا۔ آپ نے استحکام پاکستان دے حوالے نال وی نظماں تخلیق کیتیاں۔ آپ نے نظم توں اڈ نثر وچ وی لکھیا۔

توقیر حسین رضی

زندہ باد تے ابد الابد روشن لازوال توقیر حسینؑ دی اے
ترجمان لسان القرآن جس دا شان آیہ تطہیر حسینؑ دی اے

غوث قطب قلندر اسیر جس وچ ادھ زلف زنجیر حسینؑ دی اے
علم عشق حیا صفا محبت صبر فقر جا گیر حسینؑ دی اے

ہر ذرہ کائنات دے وچ سینے بھری ہوئی تاثیر حسینؑ دی اے
بنین، چرخ، ابر، باراں، قمر، انجم روز و شب تفسیر حسینؑ دی اے

خون برسا وچ تاریخ آدم سُرخ پوشش تحریر حسینؑ دی اے
عشق وستی دی دیکھ تدبیر سازی دستگیر امیر حسینؑ دی اے

جانے مہر نبوت توقیر جس دی ادھ توقیر توقیر حسینؑ دی اے
بوسہ گاہ بشیر السنذیر دائم ادھ تصویر تصویر حسینؑ دی اے



شریف کنجاہی

شریف کنجاہی دا اصل ناں محمد شریف اے ۱۳ اکتوبر ۱۹۱۵ء نوں گجرات دے مشہور قصبے کنجاہ وچ مولانا غلام محی الدین دے گھر پیدا ہوتے۔ آپ نے مڈھلی تعلیم اپنے والد کوں حاصل کیتی۔ فیر کنجاہ دے اسی ساتن دھرم ہائی سکول توں میٹرک دا امتحان پاس کیتا۔ گورنمنٹ کالج گجرات توں انٹر میڈیٹ دی سند حاصل کیتی تے کنجاہ دے اسلامیہ ہائی سکول وچ مدرس مقرر ہو گئے۔ ملازمت دے نال نال پڑھائی دا سلسلہ جاری رکھیا۔ پہلاں بی اے کیتا، فیر ۱۹۴۱ء وچ بی ٹی دا امتحان پاس کیتا۔ ملازمت دے دوران مختلف شہراں وچ ہیڈ ماسٹر رہے۔ نال نال ایم اے فارسی تے ایم اے اردو دے امتحان پاس کیتے تے فارسی دے لیکچرار ہو گئے۔ گورنمنٹ کالج اٹک، راولپنڈی، گوجران، جہلم، تلہ گنگ تے لالہ موسیٰ وچ پڑھاندا رہے۔ ۱۹۷۴ء وچ ریٹائر ہو کے پنجاب یونیورسٹی دے شعبہ پنجابی وچ پینج ورھے پڑھانے رہے۔ فیر اسلام آباد چلے گئے تے مقتدرہ قومی زبان دے علمی تے ادبی جریدے دے مدیر مقرر ہو گئے۔ اج کل گجرات وچ علمی، ادبی تنقیدی تے تحقیقی کم وچ رُجھے ہوئے نیں۔

شریف کنجاہی اک عہد ساز شخصیت تے اپنی ذات وچ انجمن نیں۔ آپ پنجابی دی جدید نظم دے موڈھی شاعر نیں۔ ”جگراتے“ آپ دیاں پنجابی نظماں دا پہلا مجموعہ اے۔ دو جا مجموعہ ”اوڑک ہندی لو“ اے۔ آپ نے تنقیدی مضموناں دا مجموعہ ”جھاتیاں“ دے ناں نال چھاپیا۔ ایس توں اوڈ ”خطبات اقبال“، جاوید نامہ۔ علم الاقتصاد ذہنی پاک دے خطبے تے پنجسورہ دا ترجمہ پنجابی وچ کیتا۔ آپ نے پنجاب یونیورسٹی لئی پنجابی نعت وی تیار کیتی۔ آپ دے کلام وچ پنٹل نیاں یتل رسماں، انگ، ساک، عالمی جنگ دی تباہی، پنجاب دی مٹی دی خوشبو، دھچھوٹے دا دکھ، مت دیاں گلاں تے ڈونگے جذبیاں دی مکمل ترجمانی موجود اے۔

اورک ہندی لو

انج دلا نہ چھتھیاں پو
 انج نہ رات غماں دی مگدی
 انج نہ ہندی لو
 انج ہواواں وچ نہ گھل دی فجراں دی خوشبو۔
 نھیرے دے وچ چمکن تارے
 نورے کھوجی میرے تیرے دانگوں سارے
 اپنے آپ نوں ڈوب کے اوہناں
 دُبتے ہوئے سورج تارے
 جان اپنی تے ہیل کے پیچھے جو منزل تے پُچھے
 چہرہ اپنی رت دے قطرے راہ وچ دیوے گو
 انج دلا نہ چھتھیاں پو
 اورک ہندی لو



غزل

میرے تن تے داغ نہ دھبہ ایویں میں شرانواں کیوں
دن سوتے کپڑے پا کے اپنا آپ لکھاؤاں کیوں

اپنے ہتھیں کشتی توڑی، پھٹوٹے مرضی نال
ہُن جد ڈبن ویلا آیا دس خاں میں پچھتاؤاں کیوں

میں عاشق سورج دا، چن دا، کرناں دا، رُشنائی دا
پھر دا میرے اگے تچھے میرا ای پرچھاؤاں کیوں

میرا ای کوٹھا کچا نہیں اے سبھ گھرایتھے کچے نہیں
کالے بدل چڑھدے دیکھ کے میں ایناں گھبراؤاں کیوں

شیراں دانگ میں ہک وچ نیزہ کھا کے مرنا سکھیا اے
بزدل بن کے کنڈ وکھا کے اپنی جان بچاؤاں کیوں

دچھڑے سبناں دا غم عارف میں کیویں بھُل سکدا ہاں
جس نے مینوں کُندن کیتا میں اوہ اگ بچھاؤاں کیوں



احمد راہی

احمد راہی ہو ری ۱۲ نومبر ۱۹۲۳ء نوں امرتسر وچ پیدا ہوئے۔ ایہناں دے والد صاحب داناں خواجہ عبدالعزیز سی تے اوہ شالاں دا کاروبار کر دے سن۔ احمد راہی داناں پہلاں غلام احمد رکھیا گیا بعد وچ نور شیدا احمد رکھ دتا گیا، پر علم تے ادب دے میدان وچ اوہ احمد راہی دے ناں نال مشہور ہوئے۔ ۱۹۴۲ء وچ میٹرک دا امتحان پاس کیتا۔ ایم۔ اے۔ او کالج امرتسر وچ بارہویں کلاس وچ سن کہ آزادی دیاں تحریکاں وچ حصہ لین پاروں کالج وچوں کڈھ دتے گئے۔ شالاں دے کاروبار دے سلسلے وچ کلکتہ چلے گئے۔ قیام پاکستان دے ویلے امرتسر توں لاہور آ گئے۔ کچھ عرصہ ”سوریا“ دے مدیر رہے۔ ۱۹۵۴ء وچ فلمی دنیا وچ کیتاتے ہُن تیکر فلماں دیاں کہانیاں تے گیت لکھ رہے نیں۔

احمد راہی دے سکے مامے صادق امرتسری اک چنگے شاعر سن۔ اوہناں دی صحبت وچ رہ کے راہی صاحب وی شعر آکھن لگ پئے تے میٹرک دے دوران اردو شاعری دے حوالے نال پچھانے جان لگ پئے۔ قیام پاکستان دے نیڑے تیرے پنجابی شاعری وی شروع کر دتی اوہ پنجابی دی جدید نظم دے بانیوں وچ شمار کیتے جاندے نیں۔ اوہناں دیاں پنجابی نظماں دا مجموعہ ”ترنجن“ کئی واری پاکستان تے بھارت وچ شائع ہو چکیا اے۔ ایس مجموعے وچ نظماں کچھ گیت تے بولیاں وغیرہ شامل نیں ”ترنجن“ دے دو حصے نیں پراہناں وچ اک ارتعائی وحدت موجود اے۔ پہلا حصہ اک داخل اُٹھان اے جس وچ اٹھ تے ٹوک جذبے نیں پر اخلاقی ذمہ داری دا احساس وی موجود اے۔ دوجے حصے وچ ہجر وچھوڑے دے گیت نیں۔ ایس وچھوڑے وچ اوس کڑی دے دین وی شامل نیں جیہڑی ماپیاں دے گھروں دُور سوہرے گھر تے جاندی اے تے ۱۹۴۷ء دے فساداں دے دوران ماپیاں توں چھڑن

والیاں دھیاں دے نوے وی شامل نیں۔ احمد راہی دیاں نظماں تے گیتاں وچ دھوئے
 دے درد دا بڑا ڈونگھاتے سوز بھریا اظہار بعد اے۔ احمد راہی نے اپنیاں نظماں وچ
 پنجابی لوک گیتاں دے انداز نوں سامنے رکھیا اے۔ زبان شہری پنجابی ورتی اے تے
 ادھناں دا اپنا اک سلیس، سدھاتے اثر کرن والا بیان دا ڈھنگ اے۔

نواں نواں بُور

اُجے نواں نواں اُبمیاں نوں بُور

اُجے ہونٹاں وچ اُن چھوٹیاں کلیاں دے رُس
 اُجے باہواں وچ سَجریاں شاخاں دی ہلور
 اُجے اُن کھڑے پھلّاں جیہی ہاسیاں دی دکھ
 اُجے ٹوراں وچ چڑھیاں پینگاں والا زور
 اُجے ماہیے، ٹپے، ڈھولیاں دے نئے نئے رنگ
 اُجے دلال وچ سدھراں دا سُستا سُتا شور
 اُجے ترنخاں وچ کلیاں گتیاں دے چار
 اُجے پیلیاں وچ پیلاں پُون، سکھتے نہیں مور
 اُجے ساہواں وچ سہیلیاں دے ساہواں می ہواڑ
 اُجے سہیلیاں ای چن تے سہیلیاں چکور
 اُجے کتھیاں دے نال نال کھڑیاں نے بیڑیاں
 اُجے دُور بیڑیاں توں چھلاں دُور
 اُجے نواں نواں اُبمیاں نوں بُور

باقی صدیقی

باقی صدیقی دا اصل ناں سائیں محمد افضل اے۔ آپ ٹیکسلا دے اک پنڈ بہام وچ ۱۹۰۹ء نوں پیدا ہوئے۔ انکی عمرے یتیم ہو گئے تے دسویں جماعت پاس کرن مگروں اک پرائمری سکول وچ مدرس ہو گئے۔ فیر بمبئی جا کے فلمی کہانیاں تے گیت لکھ دے رہے۔ کجھ چرفوج دے محکمہ ایم ای ایس وچ کلرکی کیتی۔ جدوں راولپنڈی پر تے اک ہفت روزہ رسالہ ”راہ و منزل“ دے ادارتی عملے وچ شامل ہو گئے۔ کجھ ورہیاں مگروں ریڈیو پاکستان راولپنڈی نال منسلک ہو گئے۔ ریڈیو لٹی گیت، فیچر تے ڈرامے لکھے۔ بیمار ہوئے تے اپنے پنڈ بہام چلے گئے، جتھے ۸ جنوری ۱۹۷۲ء نوں وفات پائی۔

باقی صدیقی نے شروع وچ اردو غزلاں لکھیاں۔ فیر پنجابی وچ نظماں تے غزلاں تخلیق کیتیاں۔ انکی بحروچ غزل تے نظم لکھن وچ اوہناں دا کوئی جواب نہیں، حالانکہ انکی بحروچ شعر کہنا بڑا اوکھا کم اے۔ باقی صدیقی نے بڑی آسانی نال سادہ زبان وچ غزلاں تے نظماں لکھیاں نیں۔ حیاتی دے کہاں چڑھا تے حیاتی گزارن دے دوران پیش آؤن والے دکھاں درداں نے اوہناں دیاں ادبی تخلیقاں اُتے ڈونگھا اثر پایا اے۔

پنجابی وچ اوہناں دی شاعری دے دو مجموعے ”زخمی پیار“ تے ”کچے گھڑے“ شائع ہو چکے نیں۔ ”کچے گھڑے“ انکیاں نکیاں نظماں دا اک خوبصورت مجموعہ اے، جس وچ باقی صدیقی نے روایت تے جدیدیت نوں اک رک کر دتا اے۔ پوٹھوہاری لہجے نے اوہناں دے فکری اسلوب تے فنی بصیرت نوں چار چن لا دتے نیں۔ اوہناں دیاں نظماں وچ پوٹھوہاری علاقے دے لوک گیت، ایتھے دے وسنیکاں دے سماجی تے معاشی روگ، ہجرتے فراق دی کیفیت تے اپنے عہد دا شعور پوری طرحاں موجود اے۔

ہک بوٹا

ہک بوٹا گھل مگھلا
سڑنے پلنے راہیاں کی
پتراں نی پکھی جھوے

کتنے چیرے، کتنے صافے
ہاڑے جیٹھے نی دھپاں وچ
دُنیا نی نظراں توں اوہلے
اس بوٹے نی چھاویں بہہ کے
دلاں نی بولی بولے

آن مسافر جان مسافر
ایہہ پتراں نی وٹھاں وچوں
ہر راہی آں بٹ بٹ تکے
کوئی اس ناراز نہ سمجھے
کوئی نہ دل پھروے

ایہہ بوٹا پینکاں نا جھوٹا
کوئی اس نے پتر ڈھائے
کوئی اس نیاں ٹاہنیاں کپے

فردی ایہہ اتملا سنگی
 ساریاں تے رت ڈوہلے
 ہک بوٹا گھل مکھلا
 سڑنے پلنے راہیان کی
 پتراں نی پکھتی جھوٹے -



منیر نیازی

منیر نیازی ۹ اپریل ۱۹۲۸ء کو ہوشیار پور دے اک پنڈ خان پور وچ فتح محمد خاں دے گھر پیدا ہوئے پرائمری تیک تعلیم اپنے پنڈ وچ حاصل کیتی، میٹرک دا امتحان ہوشیار پور دے ہائی سکول توں پاس کیتا۔ فیرنی اے تیک تعلیم جالندھر، سرینگر، بہاول پور تے لاہور دے کالجوں وچ حاصل کیتی۔ پاکستان دے قیام مگروں ہجرت کر کے ساہیوال آگئے تے ایتھوں دے علمی ادبی حلقیاں دی جان تے کچھان بن گئے۔

لاہور آ کے اک اشاعتی ادارہ قائم کیتا تے اعلیٰ قسم دیاں کتاباں شائع کیتیاں۔ آزاد منش تے سیلانی طبیعت دے مالک منیر نیازی نے ساری حیاتی تخلیق دی دنیا آباد رکھی تے ایہہ دنیا آج دی قائم دائم اے۔

منیر نیازی دی شخصیت وچ خاص طرح دی کھچ اے۔ اوہ ساری کائنات نوں خوبصورت دیکھن دے پیا ہویاں میں۔ اوہناں نے ادھی توں ودھ دنیا گھم پھر کے دیکھی اے، پر پاکستان نال انساں دا پیار اے۔

ہن تیکر منیر نیازی دی پنجابی شاعری دے تن مجموعے شائع ہو چکے نیں "سفر دی رات" "چار چپ چیزاں" تے "رستہ دسن والے تارے" بعد وچ ایہہ تے مجموعے تے کچھ ہور کلام جمع کر کے کلیات دی شکل وچ "کل کلام" دے عنوان نال شائع کیتا گیا۔ منیر نیازی بنیادی طور تے نکی نظم دا شاعر اے۔ اوہناں نے غزلاں دی لکھیاں نیں پر اوہناں دی شہرت نظم نگاری پاروں اے۔

منیر نیازی نکی توں نکی نظم لکھن تے اوہ دے موضوع نوں مکمل طور تے بیان کرن وچ اپنا ثانی نہیں رکھدا۔ اوہناں دیاں بعض نظماں اک اک مصرعے دیاں نظماں نیں تے اوہناں دے عنوان

بڑے معنی خیز تے نظم دا حصہ نہیں۔ منیر نیازی نے حیاتی دے دکھاں درواں تے سماجی برائی
 نوں بھوت بچن تے چڑیل دی علامت بنا کے پیش کیتا اے۔

تن نظماں

اللہ ولوں گُن دی حفاطت

بوہت اُداس جدوں میں ہوواں سُکھ دا سندیہ آندا
 مشکلاں وِچ جدوں تھک جاواں کجھ غیب لوں ہو جاندا
 جدھروں مینوں خبر نہیں ہوندی اودھروں حوصلہ آندا
 ہنیریاں کچھماں سامنے پھٹدی پورباں ولوں لالی!
 آس نہیں میری مٹن دیندا ایس جہسان دا والی
 میریاں مدداں کر دی رہندی اک مخلوق خیالی



میں تے ایہہ شہر

بُھل گئے مینوں طور طریقے، کوں میں ایتھے رہنا
 کوں میں ایتھے دن کٹنا اے کوں میں اُٹھنا بہنا
 کس دیلے کیہ کم کرنا اے کد میں جاگنا سوتا
 کس موقعے میں خوش لگنا اے کد میں خوش نہیں ہونا

اصل کولوں خوف

ایدھر اودھر دے پھر دے
اصل دے کولوں نہ دے
جس نوں گل اسی دسنی ہوندی
او سے نوں نہیں دے



انور مسعود

انور مسعود ۸ نومبر ۱۹۳۵ء نوں گجرات وچ پیدا ہوئے۔ والد داناں محمد عظیم اے۔ آپ نے پنجاب یونیورسٹی توں ایم اے فارسی دا امتحان پاس کیتا تے لیکچرار مقرر ہو گئے۔ مختلف کالجوں وچ پڑھاندے رہے۔ گورنمنٹ کالج راولپنڈی وچ فارسی دے استاد رہے۔

انور مسعود ایس دُکھاں درداں دی ماری دنیا واسطے ہا سے تخلیق کردا اے تے لوکائی نوں غماں توں نجات دیواندا اے۔ اوس دے شعر پڑھن دا انداز ایڈا دلکش تے اثر انگیز اے کہ اوس دا کلام لوکاں دے ذہناں اُتے نقش ہو جاندا اے تے دلاں وچ اُتر جاندا اے اوس نے پنجابی توں اڈ فارسی تے اردو وچ وی شعر لکھے نیں۔ پنجابی زبان وچ اوہدا کو مجموعہ ”میلہ اکھیاں دا“ دے سرائوئیں نال چھپ چکیا اے جس نے لوکائی توں مقبولیت دی سند حاصل کیتی اے۔

اک تے اوہدا کلام گلاب دیاں پنکھڑیاں ہار کھڑیا ہوندا اے تے سونے اُتے سہاگہ اوہدا دل نوں موہ لین والا پڑھن دا انداز اے۔

اوہدی پنجابی شاعری وچ جتھے مزاح اے او تھے نال ای طنز دے ڈونگھے تے ترکھے نشتر دی موجود نیں، جیہڑے ذہن اندر کھُپ جاندے نیں۔ آکھیا جاندا اے کہ طنز وی اک طرحاں ذاتی تشدد اے پر انور مسعود دے طنز وچ تشدد وی تھاں اصلاح دا کچھ نمایاں اے۔ اوہدے محول پچھے کوئی نہ کوئی اخلاقی سبق ضرور موجود ہوندا اے۔ نظماں توں اڈ انور مسعود نے کچھ پنجابی قطعات تے رباعیاں وی لکھیاں نیں، جیہڑیاں حالے چھاپے نہیں چڑھیاں۔

جمعہ بازار

سبزی مریج مسالے سارے جمعہ بازارے دیکھے
 کیسے کیسے عجب نظارے جمعہ بازارے دیکھے
 سارے بند بازار تے کھلا ایہہ بازار بازار
 مسجد دا ہمسایہ میلہ چوکھی رونق والا
 ہُم ہما کے آیا ایتھے سارا آل دوالا
 آبا، چاچا، تایا، پھپھ، امی باجی خالہ
 لوک ولیتی دیسی سارے جمعہ بازارے دیکھے
 کیسے کیسے عجب نظارے جمعہ بازارے دیکھے

رنگ برنگی کاراں والیاں لگیاں ہویاں پالاں!
 ہر کوئی ایتھے میرے وانگوں ڈبا وچ نچالاں!
 کھڑی چیز خریدیاں ایتھوں کھڑا سودا ٹالاں!
 اوتھے چوکھا بھیڑ بھڑ کا جھڑی تھامیں دالاں
 مٹی دھوڑ، غبار، غبارے جمعہ بازارے دیکھے
 کیسے کیسے عجب نظارے جمعہ بازارے دیکھے

کھڑی شے نہیں دیکھی ایتھے دیکھے نہیں ہوانے
 ایس بازارے وکدے دیکھے اُساں مکتی دے دانے
 وٹ سونے دیکھے ایتھے کبل لیفت سرہانے

کاراں دے وِج ڈکے ہوتے ڈٹھے بال ایا نے
ہندے روندے تے کر لاندے بال وچارے دیکھے
کیسے کیسے عجب نظارے جمعہ ہزارے دیکھے

لنڈے داسا مان خریدن لو کی ڈر دے ڈر دے
ہنڈے ورتے کوٹ، سوٹر چکدے دیہندے دھڑے
فیشن نویں نبھاو ن دے پتے سستے چارے کر دے
گھروا پردہ رکھن نوں پتے لین پُرانے پر دے
اور کوٹ، حیرا باں شالاں سو دے سارے دیکھے
کیسے کیسے عجب نظارے جمعہ ہزارے دیکھے

نویں زالی جاپی جس نے جو آواز لگائی !
کہے ملوکاں والا بھائی کشمش وکنے آئی
مونگ پھلی نوں آکھے کوئی پتے دی بھیر جانی
گنے دیکھن والا کو کے لٹی گئی مٹھیا ئی
برنی دی آواز سنی تے شکر پارے دیکھے
کیسے کیسے عجب نظارے جمعہ ہزارے دیکھے

کوئی جوُس اناراں والا نوش پیا فرمانداے !
کوئی مرغی ذبح کرا کے تھیلے وِج پیا پانداے !
کوئی گاہک ہزاراں دا قالین خریدی جانداے

خالی کھیسے والا کوئی اکھیاں نون ترسانداے
 مہارتڑ ساتھی کتی وچارے جمعہ ہزارے دیکھے!
 کیسے کیسے عجب نظارے جمعہ ہزارے دیکھے

شرابیں ستے ویکچن لگ پئے سوڈے ویکچن والے
 ایہو موقع دیکھ رہے سن کتی خریدن والے
 ایدوں بعد ملنگاں وانگوں بیٹھے بیٹھن والے
 سوڈے والی خالی پیٹی بال کے سیکن والے
 لات ہنیرا، بھانیر، تارے جمعہ ہزارے دیکھے
 کیسے کیسے عجب نظارے جمعہ ہزارے دیکھے



فرہنگ

۲

آپ مہارے	اپنے آپ	اُربع عناصر	چار عناصر رگ ہوا پانی مٹی
آزار	تکلیف	اُڑی	ضد
آگو	راہنما	اُسارے	تعمیر کیتے
آل دوالا	ارد گرد	اُسد اللہ	اللہ داشیر
آمنہ صَدَقَات	میں سچ کر منیا	اُسرار	بھیت
آواگت	اچن چیت	اِعترا ف	قبول کرنا
آیت	ماں	اکیر	موثر دوا
ابدالاباد	قیامت تیک رہن والا	اکھوتری گل	فالتو گل / جملہ مُعترضہ
اُپڑ	پہنچ	اَنگاں ساکاں	رشتے داراں
اتو لویں	بے حساب / ہٹھیلی اُتے	اُگ سگ	وُصول کرنا
اُٹے سَٹے	اندازے	الانی	خالی
اُجل	موت	اَلَم	دُکھ
اُچرج	انوکھی	اُمیر پری	ماں
اُچھ	خاص	اُمک	ہو لے جیہے
اُچ پدھر	اعلیٰ سطح	اُنک	حصہ
اُدبیر	ٹھکانہ	اُنڈر گراؤنڈ	زمین تھلے
اُدیک	انتظار	اِنشار	کھلنا پلرنا

اک پاسے / باہر	بَئے	قیمتی	آئملا
بدنامی	بھنڈی	حد	آنت
ہستی / موجود	بود	جیننوں نوں متھ نہ لایا ہوک	آن چھوٹیاں
بدحواس	بونسٹل	تارے	آنجم
ڈوب دیاں	بورساں	منکراں	آنڈیشے
بہتری / بھلائی	بہبود	جیہدا اگے پچھے کوئی	اوترا نکھترا
بے قرار	بیتاب	نہ ہوئے / بے اولاد	
ہجوم / مصیبت	بھیڑ	آخر کار	اوڑک
پ		گھوڑے دی ڈھول وال	ایال
وجہ / سببوں	پاروں	ب	
وڈ / تقسیم	پارٹیشن	واپس	پاپس
راہیاں	پاندھیاں	قسمت / نصیب	بھاء
قطاراں	پالاں	وجود	بت
اُپڑے	پُچھے	حیرانی	بٹ بٹ
خاندان	پروار	گرم ہونا	بھنخناں
ترغیب دتی	پریرے	جُدائی	برہوں
کھلریا	پسریا	حیرانی نال تکنا	بٹر بٹر
چھالاں	پلاٹکھاں	بندہ	بشر
پھٹ پیا	پنگریا	خوشخبری دینے والا	بشیر
لباس / لیٹرے	پوشاک	ضائع ہونا	بکریاں ہونا
مشرقی	پورباں	شاواٹے	بٹے
درد	پیڑ		

پیرھی	نسل	جَم	جمشید بادشاہ
پینڈا	سفر	جماد	جمادات / پتھر وغیرہ
پینی	انگلستان دانتھاسکے	جماندرو	پیدائشی
	ت	جھمب	واچھڑ
تانگھ	آس	جو بن	حُسن
تجلی	چانن	جرنا	برداشت کرنا
تربت	قبر	چ	
ٹریواں	ٹردی جاواں	چت	دل
تطہیر	پاکیزگی	چھتیاں	کاہلیاں
توڑے	بھانویں	چھجلی	پھن
توقیر	رعزت	چھل دیسی	دھوکہ دے گا
تیغوں	تلواروں	چنگ	چنگاری / چو اقی
تینڈرے	تیرے	چوداں طبق	ست زمیناں ست آسمان
	ٹ	چیتے	یاد
ٹابیریاں	قیلے	چیناں	دلنے
ٹوہ	بھال	چیلے	مرید
ٹھٹھمبر	سہم	چھیکڑواری	اغیرواری
	ج	ح	
جاپی	لگی	حکمت	دانائی
جپ	ذکر	خ	
جَت	ملا تم وال	خاک	مٹی

د	دُراڈی	دُور دی	سنگی	ساتھی
	درکار	چاہیدا / ضرورت	سوانیاں	زنانیاں
	دھنی	ماہر	سُنی	کلم کلمی / ویرانی
	دیس واسی	وطنی	سومندیاں	چنگیاں لگدیاں
	دیدن	دیکھنا / زیارت کرنا	سویلے	سویرے
			سینزل	موسہی
ر	رائی کیناں	امیراں شوقیناں	سُوتے	وڈے کھال
	راشن	کھان پین داسامان	شُتر	اُونٹ
	رُشتائی	چانن	شادمانیاں	خوشیاں
	رُکھ	درخت	شوگراں	اُچیاں آوازاں
س	ساج	ساز	ض	
	سائل	سوالی	ضرب	سُٹ / چوٹ
	سپاہی	سپ پالن والے	ط	
	سُخن	کلام	طالب	چاہیوان
	سَدھارنا	روانہ ہونا	طالع	قسمت
	سُک	چاہت	طاقی	کھڑکی / باری
	سمے	ویلے	طیب	حکیم
	سندی	دی / والی	ع	
	سندیہ	سینہا / پیغام	عظیم	وڈا
			عیان	ظاہر

غ

غاصب

ناجا ترقبہ کرن والا

ف

فرٹ

مخاز

فعل

عمل

فیکون

ہو گیا / کائنات بن گئی

ق

قابلیت

لیاقت

قدیمی

پُرانا

قول

گل

ک

کا کورولا

شور

کتھائیں

خطائیاں

کرتب

عمل

کھیل

تکلف

کدورتاں

نفرتاں

کُننگی

بھیرا دوست

کُن

ہو جا

کُنڈن

سونا

کُنوں

کولوں

کھنڈنا

کھلنا

کُنڈ

کمر

کوء

کوئی

کہانا

ذبح کرانا

کویل

دیر

گ

گجٹ

گڑٹ

گجائیاں

پنڈ والے

گھڑاڑے

خراٹے

گھلم گھلا

کلا / تنہا

گوہ گوچری

غور سے قابل

گور

قبر

گہکدے

ہس دے

گوڑے

اندازہ

ل

لاٹانی

بے مثال

لام

جنگ

لازوال

ہمیشہ رہن والا

لسان القرآن

قرآنی زبان

لو

چانن - روشنی

لیہا

اُن داکیرا

ناتفاقی / پھٹ	نفاق	م	مانا
نہ / اپنی ذات دا انکار	نفی	غور	مٹیاں
کونہ / کنارا / کھونجا	نمکر	جوان کڑیاں	محرم
وڈا ڈھول	نقارہ	واقف	مخبر
نماز	نماج	جاسوسی کرن والا	ماڑیاں
شام ویلے	نماشاں	دو منز لے مکان	مرسل
وچارے	نمانے	گھلیا گیا / رسول	مسٹر
عاجز / غریب و چارا	نماناں	پیماں / بکیراں والا کاغذ	
شرمندہ / غمگین	نمو جھان		مٹھرہ
یڑا کہیے	تندیے	موکلا / وسیع	منبر
اکاس بیل	نیلی دھار	داعظ دی اُچی کرسی	مہار
اڈھا	نیم	نکیل	مہانے
	و	ملاح	مہا
واضح	واضیا	وڈی	ملوگرہ
خوشبو	واشنا	نرم نازک	مہرمنیر
خیالاں دا تبادلہ	وچار وٹاندر	روشن چن	
سال	ورھے	ن	نابری
وہم / گمان	وسوسہ	بغاوت	ناقہ
رہائش / آبادی	وسوں	اُونٹنی	نبات
مُعاشرہ سماج	وسیب (وسیبے)	نباتات / گھاہ وغیرہ	نخلستان
ونپیکاں (ونپیک)	باشندیاں	صحرا وچ رکھاں دا جھنڈ	

دُن سونے	رنگ رنگ دے	ہنٹھ والا	ضدی
ونڈ	تقسیم	ہرج مرج	نقصان
دیہندی	ٹُپیندی	ہم ہما کے	خوشی نال اکٹھے ہو کے
ویس	لباس	ہنڈے درتے	استعمال کیتے ہوتے
	۴	ہول	خوف
مانا کار	رولہ چیخ پکار	ہیل کے	برداشت کر کے

ماخذات

- ۱- اکھیا بابا فریدؒ: مرتبہ محمد آصف خان
- ۲- ابیات سلطان بابو: سلطان الطاف علی
- ۳- احسن القصص: مولوی غلام رسول عالمپوریؒ
- ۴- اکلا پیے دامافر: عارف المتین
- ۵- پنجابی ادب: مدیر محمد آصف خان
- ۶- پنجابی ادب کے سالک: مرتبہ ڈاکٹر عبد السلام خورشید
- ۷- تحفہ رسولیہ: میاں محمد بخشؒ
- ۸- ترنجن: احمد راہی
- ۹- ٹاہلی تھلے: اشفاق احمد
- ۱۰- چار چپ چیزاں: منیر نیازی
- ۱۱- دیوان فریدؒ: مرتبہ نور احمد فریدی
- ۱۲- ڈونگھے پنڈے: پیر فضل گجراتی
- ۱۳- رتہ دسن والے تارے: منیر نیازی
- ۱۴- تاراں دن: ڈاکٹر فقیر محمد فقیر
- ۱۵- سحر سورج: حکیم ناصر
- ۱۶- شاہنامہ کربلا: داتم اقبال داتم
- ۱۷- کچے گھڑے: باقی صدیقی
- ۱۸- ککاسے شہم شاہؒ: مرتبہ ڈاکٹر فقیر محمد فقیر
- ۱۹- کلام شاہ حسین: مرتبہ ڈاکٹر نذیر احمد
- ۲۰- کلام عشق لہر: استاد عشق لہر
- ۲۱- کلام گلے شاہ: مرتبہ ڈاکٹر نذیر احمد
- ۲۲- کلام شاہ مراد: شاہ مراد
- ۲۳- کلیات علی حیدر: مرتبہ ڈاکٹر فقیر محمد فقیر
- ۲۴- کہند اساتیس: مرتبہ افضل پرویز
- ۲۵- لہراں منشا یا ونیمو: مدیر ڈاکٹر اختر حسین اختر
- ۲۶- محمد صلی اللہ علیہ وسلم: مولوی محمد سعید
- ۲۷- میلہ اکھیاں دا: انور مسعود
- ۲۸- نویس زاویے: ڈاکٹر سید اختر جعفری
- ۲۹- ہٹھ: ڈاکٹر محمد باقر
- ۳۰- ہیروارث شاہ: مرتبہ عبد العزیز ایڈوکیٹ

پنجابی وچ لفظ سازی دے طریقے

پنجابی وچ لفظ سازی دے کئی طریقے نیں جیہناں نال اک لفظ توں اگے کئی لفظ بنائے جاسکدے نیں۔ ایہھے طالب علماں دی راہنمائی لئی کجھ طریقے درج کیتے جاندے نیں۔

نئی بنان دے طریقے

۱۔ کسے لفظ وچ نفی دے معنی پیدا کرن لئی اوس دے شروع وچ ”الف“ داوا دھا کر دتا جاند اے مثال دے طور تے

مٹ۔ امٹ موڑ۔ اموڑ جوڑ۔ اجوڑ

مر امر لونا الونا

۲۔ لفظ وچ نفی دے معنی پیدا کرن لئی اوس دے شروع وچ ”ک“ داوا دھا۔ مثال دے طور تے :

راہ : کُراہ پیچ کُچ

پُت کُپت ڈُھب کُڈھب

ویلا کویلا

ذات کذات

۳۔ کجھ لفظاں دے شروع وچ ”الف، ن“ لگا دتا جائے۔ مثال دے طور تے :

پڑھ اُن پڑھ

جان اُنجان

تھک اُن تھک

جھک اُنجھک

۴۔ ”بے“ دا شروع وچ واو ادا کر ن مال کجھ لفظاں دے معنے ”نفی“ بن جانداں نیں۔ جویں ایہہ لفظ :

سواد	بے سواد	ہوش	بے ہوش
سمجھ	بے سمجھ	فیض	بے فیض

۵۔ ”ن“ دا واو ادا کر دین نال وی نفی بن جاندا اے۔ مثال دے طور تے :

ڈر	نڈر
کھو	نکھو
مرد	نمرد
دیدہ	ندیدہ

۶۔ صرف ”ب“ دا واو ادا کر دین نال وی بعض لفظ نفی دے معنے دین لگ پیندے نیں جویں ایہہ لفظ :

شرم	بشرم
ہوش	بیہوش

۷۔ کجھ لفظاں دے شروع وچ فارسی دے طریقے مطابق سابقہ لاکے وی نفی دے معنی پیدا کیتے جاسکدے نیں۔ جویں ایہہ لفظ :

حاضر	غیر حاضر
زور	کم زور
سمجھ	نا سمجھ
بخنتی	کم بخنتی

مخفف بنان دے طریقے

پنجابی وچ بعض ویلے نکتے نکتے ایہے لفظ وی بولے جاندے نیں جیہڑے زیادہ

لفظاں دامفہوم ادا کر دے نیں۔ مثال دے طور تے :

۱۔ مکھے میں آکھیا دامخفت اے۔

۲۔ اکھے اوس آکھیا دامخفت اے۔

۳۔ پن پئسیری یا پئسیری - پنج سیری دامخفت اے

۴۔ پن پانی دامخفت اے۔ ایہدے توں اگے لفظ پن بجلی، پن چکّی تے پنکھٹ بناتے جاسکدے نیں۔

۵۔ وچ دا "و" اڈا دین نال خالی "چ" رہ جاندی اے پر معنے پورے نکلدے نیں جو یں

گھر چ ، بزار چ ، سکول چ ، کالج چ ، دفتر چ

۶۔ شیشے دامخفت شیش - مثلاً شیش محل

۷۔ کلا دامخفت کل - کل جگ ، کل موٹھاں ، کل جیہا

امتحانی پرچوں کی تدوین کیلئے سفارشات

الف : گیارھویں جماعت

نثر - ۲۰ نمبر (سیاق و سباق کے ساتھ مفہوم / تشریح - ۳۰ نمبر

خلاصہ / مرکزی خیال ۱۰ نمبر

نظم - ۳۰ نمبر (اشعار کی تشریح مع شاعر کا نام)

لوک اصناف - ۱۵ نمبر (اکھان : لوک شاعری کی اصناف)

شعرا کی زندگی و فن ۱۵ نمبر

کل نمبر ۱۰۰

مطالعے لئی کتاباں

مرتبہ سلطان الطاف علی	۱	ابیات سلطان باہور	۱
مولوی غلام رسول عالمپوری	۲	احسن القصص	۲
عارف عبدالمستین	۳	اکلاپے دامافر	۳
مرتبہ محمد آصف خان	۴	آگھیا بابا فرید نے	۴
مرتبہ حفیظ تائب	۵	پنجابی نعت	۵
مرتبہ مقصود ناصر چودھری	۶	پنجاب دے لوک گیت	۶
عبدالغفور قریشی	۷	پنجابی ادب دی کہانی	۷
مرتبہ ڈاکٹر شہباز ملک	۸	پکی روٹی	۸
احمد راہی	۹	ترنجن	۹
میراں بخش منہاس	۱۰	جٹ دی کرتوت (ناول)	۱۰
(مرتبہ محمد آصف خان)	۱۱	جنگ ہند پنجاب	۱۱
شریف گنجہاہی	۱۲	جگر اتے	۱۲
پیر فضل گجراتی	۱۳	دُونگھے پینڈے	۱۳
نواز	۱۴	دُونگھیاں شاماں	۱۴
ڈاکٹر اسلم رانا	۱۵	رنگ سنگ	۱۵
عبدالکریم شم	۱۶	سچی سرکار	۱۶
ہاشم شاہ	۱۷	ستی	۱۷
میاں محمد بخش	۱۸	سیف الملوک	۱۸

منیر نیازی	۱۹	سفر دی رات
فضل شاہ نواں کوٹی	۲۰	سوہنی مہینوال
مرتبہ ڈاکٹر نذیر احمد	۲۱	کلام بلھے شاہؒ
مرتبہ ڈاکٹر نذیر احمد	۲۲	کلام شاہ حسینؒ
نجابت	۲۳	نادر شاہ دی وار
ڈاکٹر سید اختر جعفری	۲۴	نویں زاویے
حافظ بر خوردار	۲۵	مرزا صاحبان
ڈاکٹر رشید انور	۲۶	منزلاں
ڈاکٹر فقیر محمد فقیر	۲۷	مہکدے پھل
ڈاکٹر سید اختر جعفری	۲۸	ویرے
مرتبہ عبدالعزیز ایڈوکیٹ / مرتبہ شریف صابر	۲۹	ہیر وارث شاہؒ
ڈاکٹر محمد باقر	۳۰	ہنٹھ (ناول)
ڈاکٹر اسلم رانا	۳۱	عرف حقیقت
ڈاکٹر اسلم رانا	۳۲	رمز روایت
ڈاکٹر عصمت اللہ زاہد	۳۳	ادب سمندر
ڈاکٹر عصمت اللہ زاہد	۳۴	آکھے نوشتہ قادریؒ



اس کتاب کا کوئی حصہ نقل یا ترجمہ نہیں کیا جاسکتا اور نہ ہی اسے ٹیپسٹ پیپر، گائیڈ
بکس خلاصہ جات، نوٹس یا امدادی کتب کی تیاری میں استعمال کیا جاسکتا ہے



فرمان قائد اعظم

”میں چاہتا ہوں کہ آپ بنگالی، پنجابی،
سندھی، بلوچی اور پٹھان وغیرہ کی
اصطلاحوں میں بات نہ کریں“

(۲۱ مارچ ۱۹۴۸ء، دھاکہ کا جلسہ عام)



تمباکو نوشی صحت کے لیے مضر ہے

13515

سیریل نمبر

ایڈیشن	طباعت	تاریخ اشاعت	تعداد اشاعت	قیمت
اول	دہم	اپریل 2000ء	15,000	14.45